

# **EKALESIA FAAPOTOPOTOGA KERISIANO SAMOA**

## **Matagaluega A'oa'oga Kerisiano**



**MATAUPU VASEGA FEOLOLO 2017**

## **MATAUPU VASEGA FEOLOLO 2017**

**MANATU AOAQ: O LE ATUA MALAMALAMA**

**FEPUARI: E AFUA MAI LE ATUA LE MALAMALAMA**

12 **(ASO SA TUPULAGA)**

Na saunia muamua e le Atua le malamalama  
Kenese 1: 1 – 5

19 Ua pupula mata o le tauaso  
Ioane 9: 1 – 7

26 Ua faamalamalama e le Atua le ala o Isaraelu  
Esoto 13: 19 – 22

**MATI: O TAUA O LE MALAMALAMA O LE ALII**

5 O le malamalama o le Alii – Tatou te lē fefefe ai  
Salamo 27: 1 – 2

12 O le malamalama o le Alii – E tatau ona faailoa atu  
Mataio 5: 14 – 16

19 O le Loto Faamagalo – E toe maua ai le fealofani  
Kenese 45: 1 – 8

26 Mafuta faatasi i le malamalama o le Alii  
1 Ioane 1: 1 – 10

## **APERILA: E MAFAIA E LE ATUA MEA UMA**

- 2 Ua toe faamanuiaina Iopu e le Atua Iopu 42: 12 – 17
- 9 **(Aso Sa Laupama)**  
Ua afio mai le Tupu o Isaraelu Ioane 12: 12 – 15
- 16 **(Aso Sa Toetu)** Ua toetu Iesu Mareko 16: 1 – 8
- 23 Ua sopoia e Isaraelu le Ioritana Iosua 3: 14 – 17
- 30 Ua matala noanoaga o Paulo ma Sila  
Galuega 16: 25 – 31

## **ME: E TAITAI LE ALII I O TATOU ALA**

- 7 Ua tausia Iakopo e le Atua i lana malaga  
Kenese 28: 10 – 15
- 14 **(Aso Sa Tinā)** O le tinā faatuatua  
1 Tupu 17: 8 – 16
- 21 **(Malologa Fono Tele)**
- 28 Ua taunuu manuia Iesu ma ona matua i Nasareta  
Mataio 2: 19 – 23

## **IUNI: IA LILIU ESE MAI AMIOGA A LE LALOLAGI**

- 4 Ia toe fuataiina o tatou loto Roma 12: 1 – 2
- 11 Ia 'alo ese mai amioiga leaga Esoto 23: 1 – 5
- 18 O tagata faafia-amiotonu ma Iesu Mataio 22: 15–22
- 25 E lei faavaivai Neemia i taufaamata'u Neemia 6: 1 – 14

## **IULAI: O AMIOGA A TAGATA O LE MALAMALAMA**

- 2 Ua agalelei Raava i tagata e to'alua Iosua 2: 1 – 7
- 9 'Aua le fa'aalialia la outou amiotonu Mataio 6: 1 – 4
- 16 Sa mafai e Peteru ma Ioane ona faamalolo le pipili  
Galuega 3: 1 – 10
- 23 Ia ola mataala 1 Samuelu 26: 1 – 12
- 30 Ua filifili uluai tiakono Galuega 6: 1 – 6

## **AUKUSO: MANATUA APOAPOAIGA A LE ALII**

- 6 Ua apoapoa'i atu Mose ia Isaraelu Teuterename 8: 10 – 18
- 13 (**Aso Sa Tamā**) Ua manatua e Peteru le fetalaiga a Iesu  
Mataio 26: 69 – 75
- 20 Ua ta'u atu e Iesu le poloaiga fou Ioane 13: 31 – 35
- 27 E le galo ia Noa ma lona aiga le alofa o le Atua  
Kenese 8: 15 – 22

## **SETEMA & OKETOPA:**

### **FIAFIA E FAAILOA ATU LEALII**

#### **SETEMA:**

- 3 Fiafia e tala'i atu le Tala Lelei Galuega 5: 33–42
- 10 Faalogo iā Iesu ma talia o Ia Mataio 7: 24 – 27
- 17 Ua faalagolago Tavita i le suafa o lona Atua  
1 Samuelu 17: 38 – 53

24 O Iesu, o le Alo lava o le Atua Galuega 9: 19–22

**OKETOPA:**

1 }  
8 } Malologa – Lotu Tamaiti  
15 }

22 Ia auauna muamua pei o Iesu Mareko 10: 35 – 45

29 Ua liliuina le tupu Tanielu 3: 28 – 30

**NOVEMA: TALITONU I LE ATUA SOIFUA**

5 O le Atua Soifua, e lē faatusaina i se tupua  
Galuega 17: 22 – 34

12 Ua soloia e Kitiona fata faitaulaga o Paala  
Faamasino 6: 28 – 32

19 Ua pepelo Anania ma Safaira Galuega 5: 1 – 11

26 Ua vavao e Iesu le matagi Mareko 4: 35 – 41

**TESEMA: O LE ALII O LE FAAOLATAGA**

3 O le tama ua fanau mai Isaia 9: 6 – 7

10 Ua fetaia’i Kaperielu ma le taupou o Maria  
Luka 1: 26 – 33

17 O meaalofo mo le pepe Mataio 2: 7 – 12

**MANATU AOAQ: O LE ATUA MALAMALAMA**

**MANATU TAIALA O FEPUARI: E AFUA MAI LE ATUA  
LE MALAMALAMA**

E moni lava e afua mai le Atua le malamalama, auā o Ia lava o le malamalama mo le lalolagi. O le malamalama na te faamalalamaina o tatou tagata o i le pogisa.

**ASO SA: 12 FEPUARI 2017 (ASO SA O  
TUPULAGA)**

**MATAUPU: NA SAUNIA MUAMUA E LE ATUA  
LE MALAMALAMA**

**SINI:** Ia malamalama le vasega, o le uluai vaega o le foafoaga paia a le Atua na Ia faia, o le malamalama.

**TUSI FAITAU:** Kenese 1: 1 – 5

**FESOASOANI MO FAIAOGA:**

Faatalofa atu ia te outou le fanau i lenei taeao. O lenei Aso Sa, ua toe amataina ai foi a tatou Aoga Aso Sa o lenei tausaga fou (2017). Atonu na maua uma e i tatou se malologa manuia, aemaise foi o le Kirisimasi ma le Tausaga fou. Tatou faafetaia ai le alofa o lo tatou Tamā i lana tausiga i o tatou ola.

Tamaiti – O le tatou mataupu amata la o lenei tausaga, **“NA SAUNIA MUAMUA E LE ATUA LE MALAMALAMA”**

Tamaiti, o le tala i le foafoaga paia a le Atua, o se mea lava tatou te maofa ai, pe afai tatou te vaavaai atu i mea uma ua siomia ai tatou. E le gata i lena, ae o le faia foi o i tatou o tagata i foliga ua tatou i ai nei.

O le vaega o le tusi sa tatou faitauina, ua faamatalaina ai le amataga o le galuega foafoa a lo tatou Atua. O le faasologa ua faiai le potō o le Atua, auā ua ia mua’i faia lava le malamalama, auā a leai se malamalama, o le a lē mafai ona iloa le matagofie o mea uma ua Ia faia. A o nunumi le lalolagi eleai se mea o i ai, sa lēmafai ona iloa atu se mea auā na ufitia lava e le pouliuli. Peitai sa i ai lava i lea taimi le Agaga o le Atua, o lo o fegaoioia’i ai. Sa na ona fetalai atu lava o le Atua, “Ia malamalama” – ona faapea lava lea ona malamalama. Na silafia e le Atua ua lelei atoatoa le malamalama, ona ia tuu eseese ai loa lea o le malamalama ma le pouliuli. Na ia faaigoa foi le malamalama ‘O le ao’ ao le pouliuli ‘O le po’.

Tamaiti, e ese le potō o lo tatou Atua ma le fuafuaga tataua na Ia faia ai lana foafoaga. Ua tatou iloa ai lava, o Ia lava o le malamalama. O lona malamalama, o le fa’aaliga lava lea o lona alofa, e le gata i mea uma na Ia faia ma tuu i le lagi ma le lalolagi, ae ole faamatalaina lava lea o lona alofa i le tagata, e pei ona taualuga i ai lana foafoaga i le aso ono.

O le tala i le foafoaga, ua a’oa’oina ai tatou e uiga i lo tatou Atua ma i tatou. O le Atua na te pulea ma faatonutonu le lalolagi. Ae mo i tatou foi tagata, ua tatou iloa ai o le Atua lava na faia i tatou, ma e i ai lo tatou taua i lona silasila mai ia i tatou, e sili atu i lo meaola o le foafoaga.

O le aso muamua lava o le foafoaga a le Atua, na Ia faia ai le malamalama, lea ua i ai le ao ma le po.

O le Atua o le malamalama, ae le o le pouliuli. O le ala foi lena na a’oa’o atu ai Iesu ia Iutaiama fetalai atu – “O a’u nei o le malamalama o le lalolagi, ae ia te ia le malamalama o le ola.” Tamaiti, afai tatou te tausī ma faataitai i ala o Iesu, ona tatou maua lea o le ola. Ae a tatou ola i le ala o le pouliuli ma le agasala, a tatou le maua foi leola mai le Alii.

## GALUEGA FAATINO: SAILIGA O UPU

O le paso (puzzle) ua tuuina atu, o lo o i ai upu e 20 mai le tatou Tusi Faitau. Saili mai ni upu e mafai ona e maua faatatau i le taimi

A	E	A	A	O	G	I	A	A	F	I	T
F	I	M	A	L	A	M	A	L	A	M	A
I	T	A	G	A	G	A	O	P	I	U	M
A	A	T	U	A	N	A	O	M	O	N	A
F	E	A	F	O	G	A	T	A	I	U	I
I	A	G	I	A	L	A	T	E	F	N	T
M	O	A	T	G	A	O	G	A	O	S	I
L	A	G	I	A	U	L	U	P	V	E	G
F	E	G	A	O	I	O	I	A	I	N	A
L	A	L	O	L	A	G	I	E	L	E	L

- |               |                |
|---------------|----------------|
| 1. AGAGA      | 11. LAGI       |
| 2. ATUA       | 12. LALOLAGI   |
| 3. AMATAGA    | 13. LELEI      |
| 4. AO         | 14. MALAMALAMA |
| 5. ULUAI      | 15. MOANA      |
| 6. FAAIGOA    | 16. NUNUMI     |
| 7. FEGAOIOIAI | 17. PO         |
| 8. FETALAI    | 18. TAEAO      |
| 9. FOGATAI    | 19. AFIAFI     |
| 10. GAOGAO    | 20. UFITIA     |

**PESE:**           1.       Na faia e le Atua  
                           Le lagi, lalolagi i le amataga  
                           E ui i le nunumi  
                           Ae na gaioi pea lona Agaga  
                           O lana fetalaiiga, na faia ai le foafoga  
                           Le mea muamua ua faia



O le malamalama

Tali: Ua silasila atu o Ia ua lelei tele  
Malamalama, pouliuli ua tuu eseese

2. Le malamalama ua igoa nei i le ao  
Le pouliuli ua taua lava nei o le po  
Maeu le alofa o le Atua mo ona tagata  
Le afiafi ma le taeao o aso uma lava.

### **A’OA’OGA:**

1. O Iesu le malamalama
2. Ia fiafia i ala o le malamalama.
3. Fa’aaoga tataua le malamalama o le Alii.

**TATALO:** Faaiu e lau susuga i le faiaoga le mataupu amata o  
lenei tausaga i se tatalo.

.....

**ASO SA: 19 FEPUARI 2017**

**MATAUPU: UA PUPULA MATA O LE TAUASO**

**SINI:** Ia malamalama le vasega, o le  
faapupulaina e Iesu o mata o le tagata  
tauaso, o lona tuuina atu lava lea o le  
malamalama e ola fiafia ai.

**TUSI FAITAU:** Ioane 9: 1 – 7

## FESOASOANI MO FAIAOGA:

Tamaiti, o ai ua vaai i se tagata tauaso? Lelei e te iloa la o le a le manaoga faapitoa o lo o naunau i ai le tagata ua tauaso? Ioe, o lona mana’o o lo o fia maua mai mo lona ola, o le fia pupula lea o ona mata, sei ona iloa atu ai le matagofie o le lalolagi ma mea uma ua i ai.

Ao i ai Iesu i lana galuega faaola i totonu o Iutaia, sa latou ui ane ma ona so’o i le tasi aai, ma ia silafia ai le tagata tauaso. O lenei tagata tauaso, e fanau mai lava o tauaso. Nailoa e ona so’o lenei tauaso, ona latou fesili lea ia Iesu “Rapi e, po o ai ea na agasala, po o ia nei, po o ona matua, ina ua fanau mai o ia o tauaso?” O le fesiligia e le au so’o o Iesu i lenei fesili, ua latou faailoa atu ai ia Iesu, le talitonuga taatele o tauave pea e tagata Iutaia e faapea, o faigata ma puapuaga e feagai ma le tagata i le olaga, e faapogai mai ona o le agasala.

Tou te iloa tamaiti, e lei faamatalaina e Iesu lea talitonuga i le fesootaiga o le agasala ma le mafatiaga po o puapuaga ua feagai ma le tagata i le olaga. Pau lava le tali atu a Iesu i lenei fesili, e lei agasala lenei tagata po o ona matua, ae o se avanoa e fa’aalia ai galuega mamana a le Atua ia te ia. O se avanoa ia a’oa’o mai ai e tagata uma, e mafaia e le Atua mea uma. O le faapupulaina e Iesu o mata o lenei tauaso – O se faailoga e viia ai le suafa o le Atua i lona mana alofa. O se faailoga foi o le faatuatua i le alofa o Iesu. O le fesoasoani o Iesu i le tagata o feagai ma tiga, o lona finagalo alofa foi lea mo i tatou uma, ina ia tatou amanaiaina ai ma fesoasoani atu i tagata puapuagatia. Ia fai i tatou ma ala o faamafanafanaga e tuu atu le faamalosiua i le ua mafatia, ma ia viia ai le Atua i la tatou auunaga.

E ese le matagofie o le alofa o le Alii o Iesu. Na silafia loa e Iesu lenei tagata tauaso, e lei toe faatali pe tau faalogo i se tala a ona so’o. Na ia iloa ma galue loa, aua fai mai Iesu –“E tatau ona ou faia galuega a le ua auina mai a’u, manu o ao; e oo i le po, e le

mafaia e se tasi ona galue ai.” Ua uma ona fetalai atu o Ia, ona Ia feanu ifo leai le eleele, ona faia ai lea o le palapala i le feanuga ma nini ai mata o le tauaso. Ona ia faapea atu lea e alu ile taelega i Seloā. Ua alu o ia e mulumulu ai, faauta foi ua toe foi mai, ua vaai

Na auina mai Iesu e lona Tamā i le lalolagi, e faaola tagata i le tino, mafaufau ma le agaga. O Ia o le malamalama e aumai le ola mo e o saisaitia i le pogisa. Ma o se avanoa lelei foi lenei mo le tagata tauaso, e ofo atu ai lona tagata ma’i e talia ma avea Iesu ma ona Alii i aso uma o lona ola.

Tamaiti, afai e maua i tatou i ma’i, ia tatou mafaufau ia Iesu ma valaau ia te Ia e fesoasoani mai. Ia tatou fiafia foi e agalelei i o tatou matua ma isi tagata, pe a mafatia i ma’i eseese.

### **Uiga o Upu:**

- i) Rapi - o le ta’u lea ua igoa ai faiaoga o le tulafono a le lotu Iutaia.

### **GALUEGA FAATINO:** Faatulagaga

Faatulaga mai i le faasologa sa’o i le mea na tupu muamua, se ia oo i le mea na tupu mulimuli, e tusa ma le tala o le tatou mataupu.

- a) Ua tali atu Iesu i ona so’o.
- e) Ua iloa e Iesu ma ona so’o le tagata tauaso.
- i) Fetalai Iesu ..... o a’u o le malamalama o le lalolagi.
- o) Ua o atu Iesu ma ona so’o i le aai.
- u) Ua fesili atu so’o o Iesu ia te Ia.
- f) mulumulu mata o le tauaso i Seloā
- g) faia e Iesu le feanuga i le palapala
- l) nini mata o le tauaso i le palapala.
- m) feanu ifo Iesu i le eleele.

Tali: 1. (o)      2. (e)      3. (u)      4. (a)      5. (i)  
        6 (m)      7. (9)      8. (1)      9. (f)

**PESE:**                    A’oa’o le pese lea ma faitaga

1.    O Iesu ua maliu atu ma na silafia  
      Le tauaso o lo o faatalitali mai ia te Ia  
      Pau lava lona mana’o ia pupula ona mata.  
      Le pouliuli ia suia i le malamalama.
  
2.    E lei agasala o ia po o ona matua  
      Peitai ia viia ai o le Atua  
      O Iesu ua galue atu ma le fiafia  
      I so o se tasi ua ma’i ma mafatia.

(fati – “Sau ta o ia Iesu, le faaolataga – by Misiluki S)

**A’OA’OGA:**

1.    Alofa i tagata mama’i.
2.    Valaau ia Iesu pe a e mafatia.
3.    Faaeteete i o tatou mata e vaai ai.
4.    ‘Aua le maimauina mata e pupula ai i mea lē aoga, pei o telefoni.

**TATALO:**

Faaiu le mataupu e se tamaitiiti i se tatalo.

.....

**ASO SA:** 26 FEPUARI 2017

**MATAUPU:** UA FAAMALAMALAMA E LE ATUA  
LE ALA O ISRAELU

**SINI:** Ia malamalama le vasega, ua ta'ita'i le  
Atua i le malaga a lona nuu o Isaraelu.

**TUSI FAITAU:** Esoto 13: 19 – 22

### **FESOASOANI MO FAIAOGA:**

Tamaiti, o le a le mea na te faamalamalamaina i tatou i o tatou ala i le ao? Ioe, o le la. O le la na te aumai le malamalama i le lalolagi, lea e mafai ai ona tatou iloa atu mea eseese o le foafoaga, aemaise o o tatou ala tatou te savavali ai. Ae faapefea la, pe afai ua goto le la? Sa'o lelei, e mafai ona tatou fa'aaogaina se moli po o se sulu, e faamalamalama ai o tatou ala.

Ina ua tuua e Isaraelu le nuu o Aikupito mo la latou malaga i le nuu o Kanana, sa latou malaga faatasi lava ma lo latou Atua. I le amataga lava o lo latou o ese mai Aikupito, na latou tuua ai le tasi aai o Aikupito e igoa ia Sukota, ma tolauapi i le isi foi aai e igoa o Etama latalata i le sami ulaula.

Tamaiti, e lei tuulafoa'iina e le Atua ona tagata i taimi uma. Sa afio le Alii i o latou luma ileao faaniutu i le ao, e taitai ai i o latou ala. E faapena foi ile po, sa taitaiina o latou ala e le afi faaniutu i le po, e faamalamalama ai i latou, ina ia savavali i le ao atoa ma le po. O ala o le Atua, o ala lava o le malamalama ua ia finagalo e savavali ai ona tagata. O ia foi ala malamalama mo lona nuu, ua fa'aaliaai lona malosilisi ese aemaise lona alofa i ona tagata. O le ao faaniutu ma le afi faaniutu na taitai ai le malaga a Isaraelu, sa latou vaavaai pea i ai i taimi uma, ma manatua ai le upu alofa a lo latou Atua. "Oute aveina a'e outou ai le puapuga o i Aikupito e o atu ile nuu o sa Kanana (Esoto 3: 17). O lona

uiga sa savavali faatasi lava ma le mautinoa, o i ai le Atua ia i latou.

Tamaiti, ua ia i tatou foi le upu a le Atua, tatou te iloa ai lona faatasi ma i tatou i le faigamalaga o lenei ola. A lea ua ia i tatou lana Tusi Paia. O lana upu lea mai lona agaga e a'oa'i ma a'oa'o ai tatou i lana amiotonu. O Afioga Paia a le Atua, o le sului o tatou vae ma le malamalama i o tatou ala. O lo tatou faitau so'o i le Tusi Paia i le ao ma le po, o lo tatou iloa lava lea, o Ia o lo o faatasi mai ma fesoasoani i la tatou malaga o lenei ola.

### **Uiga o Upu:**

- i)    ao faaniu    }    O le vavega na faia e le Atua i le ao. A oo  
      afi faaniu }    i le ao ona malamalama lea o le lalolagi. A  
                  }    oo foi i le po, ona mumu lea O le ao faapei  
                  }    o se afi ua susulu i le pogisa. Faapei o se  
                  }    niu e tu sa'o i luga
  
- ii)   to lauapi:       malolo ma mafuta faatasi i se fanua.
- iii)  pito vao:         se vaega o le vao matua e tuaoi ai le isi nuu  
                          i le isi nuu.

### **GALUEGA FAATINO:** Faamatala

Faamatala mai po o le a le mea ua ta'ua ai upu ma faaupuga o i lalo i le tala.

1.   malaga
2.   to lauapi
3.   afi faaniu
4.   aveesea
5.   pito vao

**PESE:** Toe a'oa'o faatasi ma tamaiti le pese o le Aso Sa talu ai, ona e fou le fati.

**A'OA'OGA:**

1. E faatasi mai le Atua ia i tatou i taimi uma.
2. Toaga e faitau le Upu a le Atua (Tusi Paia)
3. O lo o tatou malaga faatasi ma le Atua.

**TATALO:**

Faaiu o se tasi i se tatalo le mataupu.

.....

**MANATU TAIALA O MATI: O TAUA O LE MALAMALAMA O LE ALII**

O lo tatou ola i le malamalama o le Alii, tatou te lē palaaai ai e galulue, ae faigofie ai ona tatou feso'otai i isi tagata. O lona uiga e tāua lo tatou fiafia e ola ma faailoa atu lea malamalama i isi tagata o lo o ola i le pogisa.

.....

**ASO SA: 5 MATI 2017**

**MATAUPU: O LE MALAMALAMA O LE ALII, TATOU TE LĒ FEFEFE AI**

**SINI:** Ia malamalama le vasega, pe afai e saisaitia le tagata i faigata, 'aua nei fefe ai, ae ia faatuatua i lona Atua. O Ia lava le

malamalama o le ola e faaolaina ai i tatou uma.

**TUSI FAITAU:** Salamo 27: 1 – 3

### **FESOASOANI MO FAIAOGA:**

E i ai se tamaitiiti o i ai se mea o fefe ai i lona aiga? Ae a lau aoga ma lounuu? Ioe, e i ai lava mea tatou te fefefe ai, ae ia tatou manatua le Alii i taimi e oo mai ai le fefe. A e mafaufau i le Alii, tatou te lagona foi le fiafia ma le loto tele. Tamaiti, o le tatou tala o lenei Aso Sa, ua tatou molimauina ai le faatuatua o Tavita i lona Atua, i taimi e tele o lona ola, sa feagai ai o ia ma faafitauli ma puapuaga e tele. Ua ta'u mai e Tavita, e toatele tagata amio leaga na sii taua mai ia te ia ina ia faamanu'a ma faatamaia lona tino. Na ia iloa lava i latou na ita ma fia faaoo le oti ia te ia.

Peitai na mafai lava e Tavita ona faatoilaloina ona fili, auā na ia manatua lava ma lona loto tele, o lo o iā te ia lona Alii. E manino lava i lana vaai mea leaga uma o taumafai tagata leaga e faia iā te ia, auā o lona Alii le malamalama ma lona faaolataga i taimi uma. E lē mafai e ona fili ona faapogisaina lona iloa atu o lona Atua, pe a oo mai tiga ma puapuaga o lona ola. E le'i fefe foi Tavita i se tasi na lamalama mai ia te ia. Sa lamalama Saulo e fasioti ia Tavita, ae sa solasola lava o ia, auā o Saulo o le tupu o Isaraelu na faauuina e le Atua. E faamagalo lava Tavita iā te ia, ona o le auauna filifilia a le Atua. O Apisaloma foi le atalii lava o Tavita, sa taumafai e foua le nofoaiga tupu a lona tamā. Peitai, sa tuu pea e Tavita i lona Atua e lavea'i ma fesoasoani ia te ia. O nei mea leaga uma na faasaga ia Tavita, sa faalēaogaina uma lava. O lona Alii o le Tamā malosi, e faamalosi i lona loto. O lona Atua foi e ana le olao soifua ai, auā o le Alii o le ola, e soifua pea lava o Ia. Afai o le Alii, o le pogai o le ola ma e soifua pea, o ai la se isi e toe fefe ma mata'u i ai? O le ala lena na i'u-vale ai tagata leaga



uma na fia faaoo le leaga ia Tavita, auā sa talitonu pea Tavita i le malamalama o le ola mai o le Atua.

Tamaiti, o le fefe o se ata pogisa lea e siomia i tatou. Na te lokaina manatu lelei i totonu ia i tatou, ma na faapologaina i tatou i taimi e aafia ai. Tatou te lagona le fefe pe a teena ma lē amanaiaina i tatou e nisi tagata. A tatou lē malamalama ma mautinoa lelei i se mataupu faigata i lau aoga, e te lagonale popole ma le fefe. E faapena foi pe a tatou mama'i, pe mama'i foi ou matua manisi o lou aiga. Afai foi emaliuse isi tagata, tatou te fefefe foi. Peitai, tatou te faatoilaloina lea fefe, pe a tatou mafaufau ma faatuatua i le malamalama o lo tatou Alii, e aumai ai le ola ma lagona fiafia i o tatou loto. A tatou manatu e ave ese le fefe ma le mata'u ia i tatou, manatua lou Alii pei ona faimai ai le fai-Salamo. "O le Alii, o lo'u malamalama ia, ma lo'u olataga." O Ia e alofa ma lavea'i mai, pe a tatou feso'otai atu ia te Ia. 'Aua nei pulea tatou e le fefe, nei malo Satani ia i tatou.

Tamaiti, o le isi lea fili leaga e faavaivaia i tatou i a tatou a'oa'oga, o le fefe ma le palaai. Ua tatou fefefe e fesili i faiaoga i mea ua tatou le malamalama ma pogisa ai. Ua tatou fefefe e su'esu'e i mataupu faigata o le aoga, ona pulea lea o i tatou e le paie ma faapalapala.

A o galue foi lo tatou Alii Faaola i le lalolagi, e toatele tagata na lamalama e fasioti ia te Ia. O nisi sa faitio ma upu leaga ia Iesu. Peitai na tali atu lava o Ia i upu filemu ma le alofa aemaise o lona toe a'oa'o atu o ia tagata i ala tonu e tatau ona ola ai.

E lē tatau lava ona manumalo le fefe iā i tatou, ae ia manatua lo tatou Alii alofa e fesoasoani mai lava i le vaivai.

### **GALUEGA FAATINO:** Faatumu avanoa

Faatumu avanoa o i fuaiupu i upu nei mai le tusi faitau: **-pau'u, amio leaga, ola, malamalama, mata'u, fefe.**

1. O lou \_\_\_\_\_ ma lo'u olataga o le Alii ia.

2. E leai se isi na \_\_\_\_\_ i ai Tavita, ua na o lona Alii na \_\_\_\_\_ i ai.
3. O le malosi o lo'u \_\_\_\_\_ o le Alii lea.
4. Na sii taua tagata \_\_\_\_\_ ia Tavita.
5. O ē na ita ia Tavita, sa \_\_\_\_\_ i latou.

**PESE:**

Iesu le malamalama  
 O Ia foi lo'u olataga  
 Taimi o faigata  
 E lē fefe ai lava  
 Le malosi Ia o lo'u ola  
 O ai ea ou te fefe i ai  
 Iesu lo'u matai  
 O Ia e lavea'i mai.

(fati – Oka, oka la'u honey – by Five stars)

**A'OA'OGA FOU:**

1. Mafaufau i le Alii i taimi uma ma taimi e te fefe ai.
2. O le malosi ma le ola, e mai le Alii
3. O Iesu lo tatou malamalama.

**TATALO:**

Faaiu le mataupu e se tama po o se teine o le vasega.

.....

**ASO SA: 12 MATI 2017**

**MATAUPU: O LE MALAMALAMA O LE ALII, E TATAU ONA FAAILOA ATU**

**SINI:** Ia malamalama le vasega, e mana’o Iesu ina ia tatou faailoa atu o Ia i isi tagata, o e ua latou lē iloa ma malamalama ia te Ia.

**TUSI FAITAU:** Mataio 5: 14 – 16

### **FESOASOANI MO FAIAOGA:**

Tamaiti, o le vaega o le tusi a Mataio sa tatou faitauina, ua a’oa’o atu ai Iesu i le motu o tagata, ina ia latou iloa lelei, o i latou lava o le malamalama i le lalolagi. Ua latou faalogologo i ana a’oa’oga, e moomia foi le ola ai, ma avea Iesu o le Faaola ma Alii Tupu i o latou olaga. O le tagata o le malo o le Atua, ua pulea e le Alii lona ola. Ia ola i uiga ma amioga faa-Iesu, e tetea atu i le tiapolo ma ana faaososoga e tupu ai le agasala. E mana’o Iesu i tagata ua talia o Ia, ina ia le nanaina lolatou iloa o Ia. Afai ua ia i latou le malamalama o le Alii, ‘aua le tuua i lalo, ae faasusulu atu i isi tagata ua latou le iloa ma talitonu ia te Ia.

Tamaiti, so o se fale po o se aai e tu i luga o se mauga, e le mafai ona le iloa atu e tagata i le po, pe afai e mumu ona moli. Po o fea foi le mamao e tu mai ai, e iloa atu lava e tagata.

E faapena tonu le manao o Iesu ia i tatou. E tatau ona faailoa atu i isi au uo amioga ma aga faa-Iesu, e ao ina latou ola ai foi. E malamalama le fale atoa, pe afai e tutu le moli ma tuu i luga o se tuugamoli.

Tamaiti, e tatau ona pupula atu lo tatou iloa o Iesu, i luma o tagata. Ia fa’aali atu i ou matua, o ou faiaoga, ma tagata o lou nuu, o oe o le tamaitiiti amio lelei. Fa’aali atu i isi tagata lou fa’aaloalo, lou loto fesoasoani, fialia ia iloa e isi au uo, lou

onosa'i, loto maulalo ma le alofa. Pe a tatou faia ia amioga lelei, o lo tatou ola lava lena i le malamalama o le Alii. Ae sili lava, o le a a'oa'oina ai foi isi a tatou uo, ma fiafia ai foi latou e iloa le Alii ma vivii atu ai foi i lo tatou Tamā o i le lagi.

Tamaiti, 'aua tatou te palaaai e tautala i le malamalama o le Alii. 'Aua nei faapogisaina le malamalama o le Alii ua ia te oe, e amioga leaga ma le agasala. Tatala atu lou malamalama i isi tagata.

### **GALUEGA FAATINO:** Tusitusiga

- A. Lisi mai ni amioga lelei se 5, e iloa ai o oe o le tamaitiiti ua e ola i le malamalama o le Alii.
- E. Ta'u mai foi ni amioga le lelei se 5, e le tatau ona tatou faia, auā o amioga o le pogisa.

(Tuu atu i lau susuga, e faamalamalama le galuega a tamaiti)

**PESE:** This little light of mine (O si o'u malamalama laitiiti)

### **A'OA'OGA:**

1. Faailoa atu amio lelei i isi tagata.
2. Fiafia e talanoa atu i isi i tala iā Iesu.
3. Vivii atu i le Alii i taimi uma.

.....

**ASO SA: 19 MATI 2017**

**MATAUPU: O LE LOTO FAAMAGALO, E TOE MAUA AI LE FEALOFANI**

**SINI:** Ia malamalama tamaiti, o le malamalama o le Alii tatou te toe maua ai le nonofo fealofani.

**TUSI FAITAU: Kenese 45: 1 – 8**  
**FESOASOANI MO FAIAOGA:**

**Fautuaga Taua:**

E lelei tele pe afai e toe silasila lau susuga i le faiaoga i le tala atoa o Iosefa, se ia oo mai lava i le vaega ua fa’aaoga i le tatou mataupu. Tau ina faitau ma suesue i ai, e maua ai le iloa i le ala na oo ai Iosefa i Aikupito ma le toe feiloaiga ma lona aiga.

Tamaiti, o le tatou tala o lenei Aso Sa, o lo o faatatau i le faailoa atu e Iosefa, o ia lava i ona uso moni. O le taimi na omai ai ona uso mai Kanana e faatau atu ni a latou saito i Aikupito, sa iloa lava e Iosefa i latou. Peitai o ona uso, e lei iloa e i latou Iosefa, auā sa faatagata ese Iosefa ia i latou.

Tamaiti na alu ese Iosefa mai totonu o lona aiga, ona o le feita ma le inoino o ona uso ia te ia. Talu ai ona sa sili le alofa o lona tamā o Iakopo ia te ia, nai lo isi ona uso aemaise foi o ana miti na fai. O lo latou inoino ia Iosefa, ua latou faatau atu ai Iosefa i tagata Mitiana, ma toe faatau atu ai loa e tagata Mitiana ia Potifara le auuuna sili a Farao le tupu o Aikupito. O iina i Aikupito na faaeaina ai e le Atua le olaga o Iosefa. Ua tuu atu ai e Farao le pule o lona aiga ma lona nuu uma ia Iosefa.

O le foi faalua atu la o le sailiga meaa ai a ona uso o Iosefa i Aikupito. Ole taimi tonu lena na faailoa ai e le Atua ia i latou, o

Iosefa o lo latou uso moni. O le Atua na ia saunia le ala malamalama latou te feiloai ai ma Iosefa.

Ua tagi Iosefa i o latou luma ma fai atu i ona uso, “O a’u o Iosefa; o ola mai pea ea lou tamā? Ina soso mai ia ia te a’u. O a’u o lo outou uso o Iosefa, na outou faatau mai i Aikupito...” O lo latou te’a eseese ma Iosefa i tausaga ua mavae, o le finagalo lava o lo latou Atua e muamua i Aikupito ina ia faasaoina lo latou ola, aemaise le sauniaina o le ala mo se amataga manuia o lo latou nuu o Isaraelu. O fuafuaga a le Atua e le iloaina e se tagata ae o lo o i ai le faaolataga mo ona tagata. O la latou gaiouga leaga na fai ia te ia, e aumai lava e le Atua lona malamalama e toemaua ai se fealofaniga lelei, auā e le mafai e le pouliuli na latou faia ai le mea leaga ia te ia, ona toilalo ai le malamalama, i le alofa moni o le Atua.

Tamaiti, e a’oa’o mai lenei vaega o le tala ia Iosefa ma ona uso ia i tatou, ina ia tatou iloa ai, pe tatou te ita i o tatou uso ma tuafafine, e saunia lava e le Atua ala o lona malamalama, e ao ina toe faatasia ai ma maua ai lo tatou nonofo fealofani. E finagalo Iesu ia tatou fealofani ma o tatou uso ma tuafafine, ae lō o lo tatou feaina’i ma ola felamata’i.

## **GALUEGA FAATINO: PASO (PUZZLE)**

Faatonuga – Saili mai upu nei i totonu o le paso. E mafai foi ona ave i le fale e faauma ai pe a le taua le taimi i le vasega.

ALAGA	IOSEFA	USO	FAAOLA
AIKUPITO	OONO	FARAO	FAAALI
ATUATUVALE	OLA	FAATA	LAGON
AIGA	OGE	FAASAOINA	TAGI
LALOLAGI	MANATU	SOSO	TIGA
MUAMUA			

A	G	A	L	A	I	G	A	A	F	M	E
I	E	T	N	I	O	A	L	O	A	A	F
K	E	U	A	U	S	O	I	M	A	N	P
U	L	A	U	A	E	U	N	U	S	A	I
P	O	T	M	T	F	F	H	O	A	T	L
I	U	U	A	A	A	M	S	N	O	U	A
T	T	V	U	A	R	O	A	F	I	A	A
O	A	A	M	F	A		T	A	N	T	A
S	G	L	A	G	O	N	A	G	A	S	F
T	I	E	K	R	T	P	K	I	H	O	N
V	S	R		H	A	R	F	T	S	V	M
L	A	L	O	L	A	G	I	S	E	F	O

**PESE:** Tapena le faiaoga mo se pese talafeagai e faauma ai le mataupu.

**A’OA’OGA:**

1. Ia ola fealofani
2. Alofa i ou uso, tuafafine ma tuagane
3. Ia loto faamagalalo.

**TATALO:**

Faaiu e se tamaitiiti le mataupu i le tatalo.

.....

**ASO SA: 26 MATI 2017**

**MATAUPU: MAFUTA FAATASI I LE MALAMALAMA O LE ALII**

**SINI:** Ia malamalama le vasega, e mana’o le Alii ina ia tatou ola ma savavali faatasi ma Ia, i ona ala malamalama.

**TUSI FAITAU:** 1 Ioane 1: 5 – 10 (mo le Faiaoga)  
1 Ioane 1: 5 – 7 (mo le Vasega)

### **FESOASOANI MO FAIAOGA:**

Tamaiti, o le a se mea e tupu ia te oe, pe afai e te fealua’i i se po pogisa? Ioe, tatou te fesea’i i le auala o savavali ai. Aisea? Auā foi ua leai se malamalama tatou te iloa ai le ala. Ae a pe a tatou feoi ileao? Sa’o lelei, tatou te iloa lava le auala ma mea uma o i o tatou autafa, auā o lo o susulu mai le la e aumai le malamalama ia i tatou. O ai la na faia le malamalama? Ioe o le Atua.

O le tatou Tusi Faitau na faitauina, sa tusia e Ioane o se tasi o so’o esefululua o Iesu. O lona uiga, o le tagata na feoi, mafuta, faalogo ma vaavaai i mea uma na faia e Iesu, a o i ai le Alii i lana galuega i le lalolagi. O lana lava molimau faamaoni ua ia ta’u mai ia i tatou, o le Atua, o le malamalama lava o Ia, a e leai lava se pouliuli o ia te Ia. E le gata o le malamalama ua aumai e le la, masina ma fetu pei ona tatou masani ai, ae o le malamalama o mea lelei, mea mama, mea moni ma mea e paia, e manuia ai lo tatou ola, pe a tatou ola ai i aso uma.

Tamaiti, e eseese lava le malamalama ma le pouliuli. Afai tatou te fesea’i pe a savavali i le pouliuli, e faapena tonu foi, pe afai ua tatou fiafia e ola i le agasala ma amioga leaga. Afai ua ta’u mai e Ioane ia i tatou – O le Atua o le malamalama, o lona uiga, o le Atua e matuā atoatoa lona paia, ma lona faamaoni, ma na o ia foi



emafai ona taitai ese mai tatou i le pouliuli o le agasala. Afai tatou te fia maua le feso’otaiga ma le Atua, e tatau ona tuuese ala leaga ma le agasala o le olaga, pei o le pepelo, taulamalama, fai kegi, faitala ma isi, ae ia tatou talia le upu moni (truth) e ola ai. Afai ua tatou folafola atu o lo o tatou mafuta pea ma le Alii, ae o lo o savavali pea tatou i le pouliuli ma le leaga, o lona uiga ua tatou pepelo ia te Ia.

Le fanau e, o le aoga lena o le aoga Aso Sa. E a’oa’oina ai tatou i le upu moni a le Alii, ina ia le gata ina a’oa’o i ai, ae ia tino foi ia tatou amioga i le olaga. E moomia lo tatou fiafia e mafuta ma talatalanoa ma isi tamaiti i le upu a le Alii, auā e tupu ai lo tatou manatua pea o Iesu Keriso lo tatou Alii Faaola, sa faamaligiina lona toto, e faamamaina ai a tatou agasala. E ui ina puapuaga, maliu ma tanumia i le tuugamau ona o le pule a tagata o le pouliuli, ae o lona toetu manumalo, ua fa’aalia ai o Ia lava o le malamalama moni, e ola ai i tatou tagata agasala.

### **GALUEGA FAATINO:** Faatumu avanoa

Faatumu le avanoa o i fuaiupu taitasi o i lalo, i le upu talafeagai mai le tatou Tusi Faitau.

1. E le tatau ona tatou ola i ala o le \_\_\_\_\_
2. O le Atua o le \_\_\_\_\_ lava Ia.
3. E tatau ona tatou fiafia e \_\_\_\_\_ ma le Atua i taimi uma.
4. O le \_\_\_\_\_ i le Atua, lo tatou fai atu ua tatou mafuta ma Ia, ae o lo o tatou savavali pea i le pouliuli.
5. O le \_\_\_\_\_ o Iesu Keriso e faamamaina ai i tatou i agasala uma.
6. Sa molimau Ioane i le \_\_\_\_\_ na latou faalogologo ai mai le Alii.



**TUSI FAITAU:** Iopu 42: 12 – 17

**FESOASOANI MO FAIAOGA:**

I le mataupu muamua (1) o le tusi a Iopu o lo o faamatalaina ai, o Iopu o se tagata sa tele lona tamaoaiga ma faamanuiaga na ia maua. A o le mea aupito sili ona taua ia Iopu, o ia o se tagata amiotonu ma sa’o lana amio (Iopu 1: 1 – 5)

O le amiotonu lea o Iopu na mana’o ai Satani na te faaososoina pe mafai ona taofi mau i lana amiotonu pe iu ina faifai ai i le Atua.

O le mafuaaga lea o le oo o puapuaga e tele ia Iopu. Ua maua o ia i se ma’i papala e sili ona leaga. Ua fasiotia uma lana fanau, o ana lafu manu ua faoa e tagata o ana auaua foi ua fasiotia le toatele. O le mea moni ua leai se tamaoaiga o totoe ia Iopu ua aveesea uma.

Peitai, e lei avea ia mea ua tutupu, e fai ma mea e agasala ai Iopu pe upu vale ai i le Atua, ae sa tali Iopu e faapea “Na ou sau lē lavalavā mai le manava o lo’u tinā, o le a ou foi atu i ai ua lē lavalavā, na foa’iina mai e le Alii, ua aveeseina foi e le Alii (Iopu 1: 21). O upu tatou te iloa ai, o se tagata amiotonu tele Iopu.

A o ma’i Iopu sa fautuaina e lona toalua ina ia faifai i le Atua. E lei taliaina e Iopu le fautuaga a lona toalua ae ua tali i ai “Ua e tautala mai, e pei ona tautala mai o se tasi o le vao o fafine valea, ua tatou talia mea lelei mai le Atua, ae tatou te lē talia ea ma mea leaga?” O ni manatu lava ua iloa tino ai le moni o le faatuatua o Iopu.

O le tatou mataupu o lenei Aso Sa “Ua toe faamanuiaina Iopu e le Atua” O lo o taua ai i le Tusi Faitau e faapea - “Ua sili foi ona faamanuia e le Alii o le gataaga o Iopu i lona amataga...” Ua tele atu le tamaoaiga ua maua e Iopu i le taimi mulimuli nai lo le amataga. Ua faaluaina le tamaoaiga ua ia te ia. Sa fitu afe ana mamoe sa i ai i le amataga, ae o lea ua toe faaopoopo le isi fitu

afe ona sefulufaafe ai lea. E faapena foi i kamela o povi ma asini, ua faaluaina lo latou faitau aofai.

Ua toe maua foi e Iopu le isi fanau e toasefulu, e fitu tama ae toa tolu teine. O ona afafine e toatolu, o ni tamaitai lalelei i totonu o le nuu. O igoa ua faaigoaina ai, o loo faamatalaina ai lo latou lalelei tele. Tamaiti, o le manuia ua toe maua e Iopu, ua mafua ona o lona taofi mau i lona faatuatua i le Atua. E tigā ona tele faigatā ma puapuaga na oo ia te ia, ae sa tumau pea lona talitonu i le Atua. E lei avea puapuaga ma faafitauli na oo ia Iopu ma lona aiga e fai ma mea e faavaivai le ola talitonu o Iopu i le Atua.

O se faataitaiga lelei foi lea mo i tatou le fanau, ia tatou maua le loto tele e tutumau ai le avea ma fanau ua a'oa'oina i ala ma a'oa'oga o le Tala Lelei iā Iesu. Ua tele suiga fou ua aliali ma i totonu o lo tatou atunuu i lenei vaitaimi. O nisi o suiga ua oo mai ai ma faafitauli ua afaina ai le ola o tupulaga ma fanau. E manaomia lo tatou mataala ma faamoemoe i le Atua e mafai ai ona tatou manumalo. O le faafeagai ai foi o outou ma a'oa'oga, e tele lava luitau ma faafitauli e faalavelave i lo outou ola taumafai. Tamaiti, a aunoa ma le Atua e taitaiina o tatou ola e lē mafai ona i'u manuia a tatou taumafaiga. Ua na o Iama lona Mana e maua ai le malosi tatou te manumalo ai.

O Iesu foi, sa fetaia'i ma puapuaga i lana galuega faaola, peitai o lona faalagolago i le Atua na mafai ai ona manumalo. Ua faapaleina o ia i le manuia e faavavau, ua nofo i le itu taumatau o le nofoalii o lona Tamā.

### **Uiga o Upu:**

- i) Iemaima - o lona lalelei e faatusaina i le ao (malamalama)
- ii) kesia - faatusaina i le uu manogi (Sal 45:8)
- iii) Kerenapuka - faatusaina i le nifo e teu ai le vali mo mata.

## **GALUEGA FAATINO:**

Tali mai Fesili:

1. A o lei oo puapuaga ia Iopu, o le a se tulaga na i ai lona olaga?

Tali: Sa tele lona tamaoaiga ma manuia na ia maua.

2. O a ni mea na tamaoaiga ai Iopu?

Tali: Sa i ai lana fanau e toasefulu, sa tele foi ana lafu mamoe, povi, kamela ma asini, sa tele foi ana auauna.

3. O le a se meana tupu i le manuia na maua e Iopu?

Tali: Na aveeseina uma i le aso e tasi feoti lana fanau, faoa ma faaumatia ana lafu manu ma fasiotia ana auauna.

4. O le a se lagona na oo ia Iopu ina ua ta’u atu le mea ua tupu i lana fanau ma lona tamaoaiga?

Tali: Fai mai Iopu “Na ou sau lē lavalavā mai le manava o lo’u tinā, o le a ou foi atu i ai ua lē lavalavā, na foa’iina mai e le Alii, ua aveeseina e le Alii ia faamanuina le suafa o le Alii.”

5. Na toe faamanuia le Alii ia Iopu, aisea?

Tali: Auā sa tumau pea le faatuatua o Iopu i le Atua, e le’i agasala foi o ia ona o mea na tutupu ia te ia.”

**PESE:** O le Atua e tele (My God is so big)

## **A’OA’OGA:**

1. E faamanuia le Atua i le tagata e faatuatua faamaoni.

2. O le Atua e pule aoao i mea uma.



ua ave lau o pama mao mai e faafetaia’i iā Iesu ma latou alalaga – “Osana! Ia manuia le afio mai i le suafa o le Alii, o le tupu o Isaraelu.

O le alaga a tagata ua leva ona faatalitali mo se lavea’i, o tagata ua fia maua se fesoasoani. Ae o le uiga lea o le upu Osana o le “Faaola mai.” O le manatu lea sa i ai tagata Isaraelu e uiga i le Mesia o le a afio mai. O le Mesia e sau e lavea’i i latou mai i o latou fili. Manatua tamaiti, ua tele tausaga e le i toe i ai lava se tupu o Iuta talu mai lava le tafeaga. Peitai, sa i ai lava valoaga a perofeta e faatatau i le Mesia o le a afio mai o le tupu o Isaraelu, o le toa malosi e faatoilaloina fili o latou fili. O le afio mai la o Iesu, ua taunuu ai valoaga a perofeta ina ua maua e Iesu le asini ma tietie ai. “Aua e te fefe, o oe letama fafine a Siona, faauta e afio mai lou tupu, o lo o tietie i le tamai asini.” O se vaaiga la lea ua iloa e tagata i lea aso, o le Mesia lea ua afio mai e pei ona valoia e le perofeta o Sakaria (Sakaria 9:9). O lona uiga, o lo latou manatu ua oo mai le faaolataga mo le nuu. Ua sau le Mesia e tau le taua mo le nuu. Peitai, o lo latou manatu, ua lē o le finagalo lea o le Atua, auā o le afio mai o Iesu o loo sau e aumai le filemu mo le lalolagi ma faaola tagata maii le agasala. O le faailoga o le tupu o lo o afio mai i se ala maulalo ma le filemu.

### **Uiga o Upu:**

1. tausamiga - o se faigaai mo ni aso faapitoa.
2. faafetaiai - faafetaui
3. Osana - “Ia faaola mai”

### **GALUEGA FAATINO:**

Faatumu avanoa i upu nei:- **afio, Alii, asini, oe, Osana, faauta, Isaraelu, fefe, manuia, Siona, suafa, tama, tamaiti, tietie, tupu.**

1. “Aua e te \_\_\_\_\_ o \_\_\_\_\_ le \_\_\_\_\_ fafine o \_\_\_\_\_; \_\_\_\_\_ e \_\_\_\_\_ mai lou \_\_\_\_\_ o lo o \_\_\_\_\_ i le \_\_\_\_\_.”
2. “\_\_\_\_\_! Ia \_\_\_\_\_ le afio mai i le \_\_\_\_\_ o le \_\_\_\_\_, o le Tupu o \_\_\_\_\_.”

**PESE:** (Osana Pepese tamaiti uma).

**A’OA’OGA:**

1. E taua le fa’aaloalo ma ava i tagata.
2. O Iesu le tupu ua afio mai.
3. Ia tatou ola loto maulalo.

.....

**ASO SA:** (TOETU)16 APERILA 2017

**MATAUPU:** UA TOETU IESU

**SINI:** Ia malamalama le vasega ua toetu Iesu.

**TUSI FAITAU:** Mareko 16: 1 – 8

**FESOASOANI MO FAIAOGA:**

Tamaiti, o le a se mea taua sa faamanatuina e le au Kerisiano i le aso Faraile lea na tea nei? Ioe, o le maliu puapuaga o la tatou uo o Iesu. Lea sa faasatauroina e fitafita Roma i luga o le mauga o



Korokota, ona aveina ai loa lea o lona tino ua tuu i le tuugamau. Sa lagona le faanoanoa ma le fememea'i o le auso'o o Iesu atoa ai ma i latou uma sa mulimuli ia te ia ina ua maliu Iesu. Peitai o le aso lenei, o loo faamanatuina ai e le au Kerisiano le tala fiafia o le tala o le manumalo, ina ua Toetu mai Iesu.

O le toetu mai o se tasi mai i le oti o se mea e faigata ona taliaina i loto o tagata. O se tulaga foi e le masani ona tupu i le soifuaga. Peitai, o le mataupu o lenei Aso Sa - "UA TOETU IESU"

E eseese lava mau a tusitala o Evagelia e fa i le aofa'i o tinā na o i le tuugamau o Iesu i lea taeao. E faapena foi i igoa o tinā. Atonu o le a le afaina lea, pau le mea taua o tinā na o e asi le tuugamau o Iesu.

I le tala la a Mareko, e lei mafaufauina e Maria le Makatala ma Maria le tinā o Iakopo, ma Salome se mea o le a tupu i lea taeao. Pau le manatu sa ia i latou, sei o i le tuugamau e uu le tino o Iesu i mea manogi ua latou faatauina. O le faafitauli o loo mamafa i loto o tinā nei, o le ma'a o lo o i le gutu o le tuugamau po o ai se tasi na te fuli'eseina.

I lo latou taunuu atu i le tuugamau ua iloa ai ua uma ona fuli'eseina le ma'a tele sa i le gutu o le tuugamau. Ua latou ulu atu i totonu sa iloa ai se taulealea o nofo i le itu taumatau o lo o ia ofu i se ofu pa'epa'e tatapuvae. Na oo le fefe ma le mata'u i tinā ona o lea vaaiga, peitai, na faalogoina o faapea mai le taulealea. "Aua tou te matata'u, o lo o outou saili ia Iesu le Nasareta o le na faasatauroina; ua tu o Ia e le o iinei ina matamata ia i le mea na latou tuuina ai o Ia. A ia outou o atu, ina ta'u atu i ona so'o atoa ma Peteru e muamua atu o Ia ia te outou i Kalilaia, toute iloa ai o Ia i lea mea, faapei ona fetalai atu ai o ia ia te outou." E le'i toe faatali tinā ae ua sosola i fafo mai le tuugamau ma agai ese ona o lo latou fefefe ma le matata'u. Talofa e, i nai tinā, ua oo le fefe ia i latou auā foi latou te lei manatu e iai se mea faapea o le a tupu. Ua faateia i latou ona o le tala ua tau mai e le taulealea. E ui lava i le fefe na oo ia i latou ae ua liua i le fiafia ona o le tala ua latou faalogo "Ua toetu Iesu"

Tamaiti, atonu o se lagona faapea e oo ia i tatou ona o le tala e uiga i le toetu mai o Iesu. Tatou te fesiligia le moni ma le sao ma tupu ai lagona o le fefe ma le lē mautonu. Tamaiti o le toetu mai o Iesu o le atoaga lea o le galuega faaola na afio mai a i le lalolagi. Ana maliu Iesu ma gata ai i le tuugamau semanu e lē faamagaloina a tatou agasala. O lona Toetu, o le faailoga o lona manumalo i fili uma aemaise ai le oti ma le tuugamau.

### **Uiga o Upu:**

- i) sapati - o le Aso Sa faamamalu e Isiraelu e tapuai ai i le Atua.
- ii) vaisapati - va o le isi sapati i le isi sapati.
- iii) ofu paepae - ofu paepae e gata i laloo vae/ofu talaloo tatapuvae

### **GALUEGA FAATINO:**

Tali mai i Fesili

1. O ai igoa o tinā na o i le tuugamau?

Tali: O Maria le Makatala, Maria le tinā o Iakopo ma Salome

2. Aisea na, o ai nei tinā i le tuugamau o Iesu?

Tali: E ave mea manogi e faauu ai le tino o Iesu.

3. O le a se mea ua mamafa i loto o tinā ao agai i le tuugamau?

Tali: Pe faapefea ona fuliese le ma'a o lo o i le gutu o le tuugamau.

4. Faamatala le vaaiga na faateia ai tinā ina ua taunuu?

Tali: Ua latou vaaia le ma'a sa i le gutu o le tuugamau, ua uma ona fulieseina.

5. O a ni upu a le tagata sa nofo i totonu o le tuugamau i le itu taumatau na fai ane i tinā?

Tali: “Aua tou te matatau, o lo o outou saili ia Iesu le Nasareta o le na faasatauroina, ua tu o ia; e le o iinei ina matamata ia i le meana latou tuuina ai o ia.

**PESE:** Sauni ia le Pese Fou (Pese & Viiga 51)

### **A’OA’OGA:**

1. Ua toetu Iesu.
2. Ua manumalo Iesu i le oti ma le tuugamau.
3. Tatou talitonu ma fiafia ua toetu Iesu.

.....

**ASO SA:** 23 APERILA 2017

### **MATAUPU: UA SOPOIA E ISRAELU LE IORITANA**

**SINI:** Ia malamalama le vasega o le Atua e toatasi, na mafai ai e Israelu ona sopoia le Ioritana.

**TUSI FAITAU:** Iosua 3: 14 – 17

### **FESOASOANI MO FAIAOGA:**

O se tasi lenei o vavega ofoofogia na faia e le Atua mo lona nuu o Israelu o le vaeluaina lea o le vaitafe o le Ioritana, ae sopoia atu ai e lona nuu le isi itu.

O le vaitafe o le Ioritana a oo ina tafe e osofia ona auvai. E loloto ma tafe tetele; e le mafai e se tagata ona tu ai. O Isaraelu o lo o i le isi itu o le vai, ma o lo o faamoemoe e agai i Ieriko ma oo atu ai i le nuu o Kanana, peitai e le mafai seiloga ua sopoia le vai o Ioritana.

O le faatonuga la mai le Atua i le mea e faia e lona nuu e mafai ai ona sopoia le vai lea ua latou faataunuuina. E muamua i luma faitaulaga latou te aveina le atolaau o le feagaiga. O le taimi lava e pa'i ai pe tutu ai vae o faitaulaga i le auvai ona tu ai lea o le vai, pe ua le tafe ae ua tupu i luga e pei se mapuepue ma ua mate foi le isi itu o lo o tafe agai i le sami ma ua vavaeina ai le vai, ona sopoia ia lea e le nuu uma o le iliti vai matutu ma agai atu e feagai ma Ieriko. O le taimi lea o lo o tutu ai pea faitaulaga ma le atolaau o le feagaiga i totonu o le Ioritana. O le i ai o le atolaau faatasi ma le nuu o Isaraelu, o le ata manino lea o le auai o la i lona nuu. Le atolaau o loo iai i totonu nisi o mea taua e pei o Papa Ma'a o le Tulafono, To'oto'o o Mose, Manai ma isi mea taua. O fea lava la e o i ai Isaraelu, e ave ai lava ma le atolaau. O lona uiga afai, o lea ua faamuamua ia faitaulaga ma le atolaau o le feagaiga o le Atua lava la lea ua muamua e vaeluaina le vai ae sei sopoia e lona nuu.

Tamaiti, e leai se mea e faigata i le Atua. E mafai e le Atua ona faia omea uma tatou te mananao i ai, pe afai tatou te faatuatua ma talitonu ia te Ia. O le faafeagai ai o outou ma a'oa'oga, e tele faafitauli eseese e faalavelave i le ola taumafai. E i ai taimi e lagona le augata ma le vaivai e suesue ma sailiili i mea aoga ona o le faigata. O nisi taimi e malosi mai faaosooso o mea faafiafia ma suiga o le olaga ua iai. O le lē lava foi o le tamaoaiga e faatupe ai a'oa'oga e ave ma ala e lē tini ai le faamoemoe. Aua nei galo tamaiti, e leai se mea e faigata i le Atua. Ua na o le Atua lava e maua ai le tali o mea tatou te mananao ai. Ia tatou faatuatua ma mafuta ia te Ia e ala i le tatalo ona mautinoa lea le manuia o mea uma tatou te faia.

## **Uiga o Upu ma Fuaitau:**

- i) atolaau o le feagaiga - atolaau a le Atua
- ii) seleselegasaito - taimi ua matua ai le saito ma fa'aaoga.
- iii) auvai - autafa o le vai/lata i le pau matu

## **GALUEGA FAATINO:**

Tali mai i Fesili

1. O le a le laasaga lea o le a agai le nuu e fai e oo ai i Ieriko?

Tali: O le a o atu e sopoia le Ioritana.

2. O le a sou iloa i le mea na tupu i le vaeluaina o le Ioritana?

Tali: O le vavega na faia e le Atua.

3. O ai na faia le tonu ina ia sopoiaina o le vai?

Tali: O le Atua na faatonuina mea uma.

4. Na faapefea ona sopoia e Israelu le Ioritana?

Tali: Na ave e faitaulaga le atolaau ma muamua. O le taimi lava e papa'i ai vae o faitaulaga i le vai o le taimi foi lea e vaeluaina ai ae savavali ai le nuu.

5. O le a se faailoga o le i ai o le Atua ma lona nuu?

Tali: O le atolaau o le feagaiga.

**PESE:** (fati: O Iesu lou Alii, o Ia lou papa)

Israelu, le nuu o le Atua ua fia oo atu i Kanana,  
Ae e le mafai, seiloga ua latou sopoia le Ioritana.  
O se vaitafe tele, e le mafai ona sao atu ai se tagata,  
O le Atua, o le Atua, e mafaia.

O le Atolaau, o le Feagaiga e muamua ma ositaulaga,  
E papa'i (tutu) loa o latou vae i le auvai o le Ioritana.  
Ona vaeluaina loa lea ae savavali atu ai o tagata,  
le Atua, o le Atua, e mafaia.

O faafitauli, ma mea faigata e tutupu i le olaga,  
Ua fiu e saili, o se vaifofo i le poto faaletagata.  
Ia aua nei galo, ia manatua na o le tasi lava o le ala,  
O le Atua, o le Atua, e mafaia.

### **A'OA'OGA:**

1. E faigofie mea uma i le Atua.
2. E faatasi le Atua ma ona tagata.
3. Ua sopoia e Israelu le Ioritana.

.....

**ASO SA: 30 APERILA 2017**

**MATAUPU: UA MATALA NOANOAGA O PAULO  
MA SILA**

**SINI:** Ia a’oa’o le vasega ia malamalama pe na faapefea ona matala noanoaga o Paulo ma Sila.

**TUSI FAITAU:** Galuega 16: 25 – 31

### **FESOASOANI MO FAIAOGA:**

O Paulo ma Sila, o auaua a le Atua na malaga e tala’i le tala ia Iesu i nuu ese. I le nuu la e igoa o Filipi, o iina na pue ai e tagata o lea nuu ia Paulo ma Sila ua fetoso i totonu o le malae, ma taitai i laua i luma o faamasino ma molia i laua o ni tagata faasoesa, i lo la folafola o tu e faasa ona talia pe faia e tagata Roma, a e o i laua o ni tagata Iutaia.

Ua avea upu ia a tagata ma mafuaaga o le ita o faamasino ua latou saei ai ofu o auaua a le Atua ma faatonu i tagata e sasa i laua i laau. E le gata ina sasa ae ua fai atu i leoleo ia tuuina atu Paulo ma Sila i le falepuipui ma ia vaavaai lelei. Ua tuu nei Paulo ma Sila i le potu malu puipuia lelei o le falepuipui a e sa faapea foi ona loka o la vae i laau. O se faiga ia mautinoa lelei ai, e lē mafai ona sosola ese mai i le falepuipui.

E le’i faavaivai ai Paulo ma Sila ae ua le mapu lo la pepese ma tatalo i le tulua o po ma ao i le Atua. O le mea moni, afai o lea sa sasa i laau ia auaua a le Atua, o lona uiga ua tataua ona vaivai o la tino, peitai o lea e tatalo ma pepese i le Atua e ui ina leva le po. A o tatalo ai ma pepese Paulo ma Sila sa faafuasei ona lulu se mafuie tele ua luluina ai faavae uma o le falepuipui ma matala uma ai faitotoa. E oo foi i noanoaga ma laau na loka ai vae o pagota ua matalatala. O se mea ofoofogia lea ua tupu ae o le mea moni ua faafofoga le Atua i le tatalo ma pese a Paulo ma Sila, lea ua tali mai i ai.

Ua ala mai le leoleo na moe ma iloa le mea ua tupu ona manatu lea o le a pule i lona ola auā ua ia manatu ua sosola pagota. Na faateia o ia i le valaau atu o Paulo “Aua nei faia e oe se mea e

leaga ai oe; auā o iinei matou uma lava.” O le aso lava lea na talitonu ai le leoleo o le falepuipui ia Iesu. Ua faaolaina o ia atoa ma lona aiga.

### **Uiga o Upu:**

- i) luluina - ua gatete le eleele
- ii) noanoaga - o maea ma filifili na saisai ai vae
- iii) manunu - matalatala

**GALUEGA FAATINO:** Ia fai se faatinoga o le tala.

Tagata e tatau ona i ai – Paulo ma Sila, leoleo o le falepuipui, o ni pagota ma le aiga o le leoleo (tinā ma le fanau)

**PESE:** Le alofa o le Atua.

### **A’OA’OGA:**

1. Ia tatalo i le Atua i mea e manao i ai.
2. Ia faasoa atu le alofa o le Atua i isi tagata.
3. Talia le talalelei ia Iesu pe a folafola mai.

**MANATU TAIALA O ME: E TA’ITA’I LE ALII I O TATOU ALA**

O le galuega taitai a lo tatou Alii mo i tatou, o lona faasino mai lea o ala tonu ma sa’o e ao ina tatou savavali ai. E finagalo o Ia ia taunuu manuia la tatou savaliga i le taunuuga lelei o faamoemoe i ai. E solo lelei foi lo tatou ola, pe afai tatou te savavali faatasi ma le Alii i so o se mea tatou te fai. Tusa lava pe fetaia’i tatou ma faigata ia manatua pea le Atua.



**ASO SA: 7 ME 2017**

**MATAUPU: UA TAUSIA IAKOPO E LE ATUA I LANA MALAGA**

**SINI:** Ia malamalama le vasega e taitai lava i tatou e le Atua i o tatou ala, pe afai tatou te faalagolago ia te Ia.

**TUSI FAITAU:** Kenese 28: 10 – 15

### **FESOASOANI MO FAIAOGA:**

Tamaiti, o le tatou mataupu o lenei Aso Sa, o le tala lea i le malaga a Iakopo, mai Peresepa e alu i Karana. O matua o Iakopo, o Isaako ma Repeka. O le mana’o o ona matua, e alu Iakopo i Patanarama, i le tamā o lona tinā o Petueli le igoa ina ia fai avā i se afafine o Lapana le tuagane o lona tinā.

A o alu le malaga a Iakopo, sa malolo o ia i le tasi mea auā ua goto le la. O le mea moni, na lagona e Iakopo lona vaivai i lana savaliga. Na ia ave ni ma’a nai lea mea ua fai ma ona aluga ma moe ai i le po. Tamaiti e ofoofogia le mea na iloa e Iakopo a o moe o ia. Na fai lana miti e faapea, o le apefa’i ua faatuina i le eleele, ua oo lona iu i le lagi. I luga o lea apefa’i na ia iloa atu ai agelu a le Atua, o lo o a’ea’e ma ifoifo ai. O le pito i luga o le apefa’i, o lo o tu mai ai le Alii, o lo o fetalai mai ia te ia. “O a’u o le Alii le Atua o Aperaaamo lou tamā, ma le Atua o Isaako, o le fanua e te taoto ai ou te avatu ai ia te oe ma au fanau....”

Tamaiti, o le folafolaga ua faia e leAtua ia Iakopo, o le folafolaga lava lea na Ia faia foi ia Aperaaamo le tamā o lona tamā faatasi foima Isaako lona tamā. O lona uiga ua i ai foi Iakopo i lea feso’otaiga ma le Atua, i faamanuiaga mo le atinaeina o le aiga o Isaraelu. O lona uiga foi la, o i tatou uma ua tatou maua le feso’otaiga ma lo tatou Atua, auā o i tatou o fanau a le

tamāfaatuatua o Aperamo. O Iesu foi lo tatouAlii faaola, e tupuga mai lava i le gafa e amata mai ia Aperamo.

Sa folafola foi e le Atua ia Iakopo e ala i lana miti, e avea ana fanau pei o le efuefu o le eleele. O le faailoga o le faatuputeleina o tagata i le laueleele. Ma e faasalalauina solo foi tagata i so o se itu uma o le lalolagi. O nei foi fanau e manuia ai aiga uma o le lalolagi.

Tamaiti, e lei tu'uaunoaina e le Atua Iakopo i lana malaga. Sa taitai lava o ia i laasaga uma na ui ai. Sa tausi le Atua ia te ia i le ala. Peitai, e ui lava o lo o malaga Iakopo ia oo i le nuu o Karana i Patanarana, ae lē iu iina lana malaga. O le finagalo o lona Atua, na te toe faafoisiaina lava Iakopo i Kanana, le laueleele na filifilia e Ia mo ona tagata. E maeu le alofa o le Atua ia Iakopo ma lana malaga. O le mea lava lea na fa'aali ai o Ia ia Iakopo, auā sa alu Iakopo ma le loto talitonu i lona Atua, e lavea'i o ia i mea uma lava.


### **Mo Faiaoga:**

E lelei foi ae silasila lau susuga i le faafanua o i tua o le Tusi Paia. E lelei foi ae faasino i tamaiti, e iloa ai nuu ma aai o taua i le mataupu.

### **GALUEGA FAATINO:**

Faatonuga:- O le ata o i lalo, ua fa'aalia ai le TALA FAASOLOPITO O LE AIGA O APERAAMO, E PAU MAI IA IAKOPO. Tuu le igoa sa'o o le tagata i le pusa, e tusa ma le faamatalaga o i lalo ifo o le ata.

Mo le Faiaoga:- E fautuaina le fa'aali muamua i tamaiti o le ata o tusia ai igoa, ona tuu lea i ai o se ata o i ai igoa o Tara, Aperamo, Nakori, Iakopo, ae faatumu latou isi pusa i igoa o i le faamatalaga.



Faamatalaga:

O le toeaia o Tara, o lana fanau o Aperaamo ma Nakori. O le ava a Aperaamo e igoa ia Sarai a o le ava a Nakori o Meleka. O le tama a Nakori ma Meleka e igoa ia Petueli. O le fanau a Petueli o Lapana ma Repeka. O Isaako o le tama a Aperaamo ma

Sarai lea na faaiipoipo atu ia Repeka le afafine o Petueli. E toalua le fanau a Isaako ma Repeka, o le tama o Esau ma Iakopo. O avāia Iakopo, o afafine e toalua o Lapana e igoa ia Rasela ma Lea.

**PESE:** A’oa’o le pese lea

- |  |   |
|--|---|
| 1. Iakopo ua alu le malaga<br>Faamoemoe mo Karana ha!ha!<br>Le Atua na taitai o ia<br>Ia taunuu ma le manuia                                 | 4. Mo oe ma lau fanau<br>Le fanau lea e faavavau<br>Ia to’atele o ou tagata<br>Salalau i le atulaulau |
| 2. Sa malolo i le ala<br>oe<br>Talofa na aluga i le maa ha!ha!<br>faamoemoe<br>Le Atua leoleo lona ola<br>Fia oo i Patanarana<br>faamanuiaga | 5. E manuia le lalolagi ia te<br>oe<br>Le Atua i lona<br>E te toe foi lava i Kanana<br>Le mafuaaga o  |
| 3. A o moe sa fai lana miti<br>Fa’aali ia te ia le Alii,ha!ha!<br>Le apefa’i ua tu mai<br>Agelu o lo o feoai ai.                             |   |

**A’OA’OGA:**

1. E taitai lo tatou ola e le Alii
2. Fiafia e feso’otai ma le Atua i le tatalo
3. O Iesu le taitai sili

**TATALO:**

Faaiu le mataupu i se tatalo saunia e se tamaitiiti.

**ASO SA:** 14 ME 2017 (ASO SA O TINĀ)

**MATAUPU:** O LE TINĀ FAATUATUA

**SINI:** Ia malamalama le vasega, a tatou faatuatua i le Atua, o Ia lava na te faia mea lelei mo i tatou.

**TUSI FAITAU:** 1 Tupu 17: 8 – 16

### **FESOASOANI MO FAIAOGA:**

Tamaiti, o le a se mea taua ua tatou faamanatuina i lenei Aso Sa? Ioe, o le Aso Sa lenei (AsoSa e lua o Me) i tausaga taitasi, ua faailogaina e lo tatou atunuu, o le Aso Sa mo tinā. O se Aso Sa tatou te toe to manatu ai ma manatua le galuega alofa o lo o faia e o tatou tinā ia i tatou ma o tatou aiga. Tamaiti, o a ni upu e te faamatalaina ai lou tinā? Lelei e alofa, onosai, toaga, galue ma isi lava uiga lelei faapena.

O le tatou tala la o lenei AsoSa mo tinā, o le tala i le fafine po o le tinā i lenuu e igoa o Sarefata. O lenei tinā, e ui o ia o se tinā o nuu ese, ae e talitonu ma faatuatua i le Atua Soifua o tagata Isaraelu. O iina i le nuu o le tinā lea sa faatonuina ai e le Atua i le perofeta o Elia, e alu e nofo ai. O iina foi i lea aai, na fetaia’i ai Elia ma le fafine po o le tinā ua oti lana tane, ua faatonu e le Atua na te fafaga ma tausi i le perofeta.

E taunuu atu le perofeta i le faitotoa o le aai, o lo o fai fafie mai le tinā lea. Na valaau i ai Elia mo sina vai itiiti i se ipu se’i inu ai. Tamaiti, e lei i ai se upu na tali atu ai le tinā, ae ua na ona liliu lava ma alu loa e aumai. E lei mamaoatu le fafine, ae toe valaau atu le perofeta – “Se’i e aumai i lou lima se fasi areto ma a’u.” Na alu le fafine e aumai se vai taumafa mo le perofeta, auā e moni lava, o lo o i ai le vai i lona fale. Peitai o le potoi areto na toe mana’o mai ai le perofeta, e moni lava e le o i ai lea i lona

fale. E faamaoni lava le tinā. O le ala lea na ia tali atu ia Elia – O lo o soifua le Alii lou Atua, e leai se potoi areto iate a’u.....” Na ia faapea atu foi, ua na o le luutaga o falaoa i le kate. O lo o i ai foi ma le suau’u itiiti i le fagu. Na ia faailoa atu foi i le perofeta, na sau e fai fafie e tunu ai se potoi areto ma la’ua ma lana tama e aai ai, ona la oti ai lea.

Tamaiti, o le popole ma le fefe o le fafine ona o le itiiti o mea ua ia te ia, na iloa lava e le perofeta a le Atua. Peitai na alu lava e tapena mai auā o le tinā agalelei, alofa ma faatuatua. E ui I lona fememea’i, ae na tupu lona fiafia ina ua valaau atu le perofeta, e ‘aia le fefe. O le Atua lava ua na faailoa mai – “E le uma le kate falaoa, e le faaitiitia foi le suauu i le fagu, seia o’o i le aso e foa’iina mai ai e le Alii le ua i le laueleele.”

Tamaiti o le faatuatua o lenei tinā i le Atua, na talitonu ai lava ma faia mea uma na faatonu ai le perofeta ia te ia. O le taunuuga manuia o lona faatuatua, sa mafai ona latou aai faatasi ma Elia ma lona aiga i mea ua ia saunia ma o lo o totoe pea mea o isi aso e tele. Na iloa foi e le fafine, e moni lava le afioga a le Alii na fai atu ai Elia ia te ia, auā sa le uma le falaoa i le kate, e le’i taitai foi le suau’u i le fagu.

E a’oa’o mai tatou le fanau i lenei tala, e fesoasoani mai lo tatou Atua alofa pe afai ua tatou lē mafai se mea. Pe a tatou fefe ma popole vale, mafaufau ma manatua lo tatou Atua i taimi uma. O Ia lava na te saunia mea lelei mo i tatou i ala e tele tatou te lei mafaufauina.

### **Uiga o Upu:**

- i) lu’utaga - o ni mea ua mafai ona e luluuina mai i se faaputuga (ftg) faaputuga araisa, suka, falaoamata (ma isi)
- ii) kate - o ituaiga fagu e fausia mai le ‘ele, e teu ai meaai a tagata Israelu (jars)

**GALUEGA FAATINO:** Faatumu avanoa

O upu nei o lo o misi mai i le parakalafa o i lalo. Toe tusi atoa le parakalafa ma tuu i ai le upu talafeagai i lona tulaga sa’o: **Elia, fagu, perofeta, falaoa, areto, Sarefata, afioga, faitoto’a, fafie, inu.**

Sa tuua e Elia le nofoaga na i ai oia, ae alu atu i le nuu o \_\_\_\_\_, e tusa ma le \_\_\_\_\_ a le Atua ia te ia. E taunuu atu le perofeta i le \_\_\_\_\_ o le aai, ma ia iloa ai se fafine o fai \_\_\_\_\_. Na valaau o ia i le fafine mo sina ipu vai se’i \_\_\_\_\_ ai, ma se fasi \_\_\_\_\_ e ‘ai ai. E ui lava ina itiiti le \_\_\_\_\_ ma le suau’u o totoe i le aiga o le fafine, ae sa ia saunia lava se meaai mo le \_\_\_\_\_ ma lona aiga uma. Sa le uma le falaoa i le kate ma le suāu’u i le \_\_\_\_\_ a lenei aiga i le teleo aso,na mafuta ai ma \_\_\_\_\_ le perofeta a le Atua.

**PESE:** Pese a Suliveta Kurene (Si luutaga)

**A’OA’OGA:**

1. E lē tuulafoa’iina i tatou e le Atua.
2. Usita’i i le auauna a le Atua.
3. Fesoasoani i lou tinā i feau

**TATALO:**

Faaiu e le faiaoga le mataupu i se tatalo.

.....

**ASO SA:** 28 ME 2017

**MATAUPU:** UA TAUNUU MANUIA IESU MA ONA  
MATUA I NASARETA

**SINI:** Ia malamalama le vasega, sa taitai le Atua i  
le malaga a Iesu ma ona matua.

**TUSI FAITAU:** Mataio 2: 19 – 23

### **FESOASOANI MO FAIAOGA:**

Tamaiti, o ai matua o Iesu? Sa’o lelei, o Iosefa ma Maria. Ao i ai Iesu ma ona matua i Peteleema le aai o Iuta na fanau ai o Ia, na fa’aali ai le Alii ia Iosefa i le miti. O le miti na faatonuina ai Iosefa, ina ia tula’i ma ave le Alii o Iesu ma lona tinā, e sosola atu i Aikupito e nonofo ai, auā o lo o saili Herota le tupu e fasioti ia Iesu. E ese le sau o lenei tupu o Herota.

E ui lava i le mata’utia ma le sau o Herota, ae na iu lava ina oti. Tamaiti, o le taimi lava na oti ai Herota, sa toe fa’aali ai foi le Alii ia Iosefa i le miti, a o latou i ai i Aikupito. O le fa’aaliga na iloa e Iosefa, o le faasinoga ia te ia, ina ia tulai ma toe foi atu ma Maria ma le tama o Iesu i Isaraelu, auā ua oti e na sailia le tama itiiti e fasioti. E ui la ua oti Herota le sili, ae ua avea ma sui ia te ia lona atalii o Arekilao. O ia foi o se tagata sau ma le fasioti tagata.

Peitai sa taitai pea ma faasino ala i le malaga le Alii, aua o lona finagalo lava, e ao ina toe foi le aiga i Isaraelu. E ui lava la ina fefe Iosefa e alu i ai, ae na taitai lava le Alii ma faasino i latou e o i le nuu o Kalilaia, o le isi itumalo e le o pulea e Arekilao. O iina i Kalilaia o lo o i ai le nuu e igoa o Nasareta, ma o le nuu tonu lea ua finagalo le Alii latou te nonofo ai. Na taunuu i Nasareta ma foliga ai o le nuu lava lea na tupu a’e ai le Alii o Iesu, ma iloa ai lava o Ia “O Iesu le Nasareta.”



O Nasareta, o se aai e tu i le vaega maualuga i le itu i Saute o Kalilaia. O se aai e latalata i le fetauaiga o ala e feoai ai tagata fai pisinisi i le faatauina o a latou oloa. E lē o se aai tele, ae sa fa'aaoga e Roma o se nofoaga mo ana fitafita e leoleoina Kalilaia. O le ala foi lea e vave ai ona maua e tagata Nasareta talafou i mea o tutupu i isi vaega o le lalolagi. Ua iloa uma e isi vaega o tagata Iutaia uiga o le ola fia tutoatasi o tagata Nasareta. E ui lava ina fai mai Natanielu i le (Ioane 1: 46) "E mafai ea ona tupu o se mea lelei mai Nasareta?" Ae ao lava ina tatou iloa tamaiti, o le nuu lava lea sa soifua ma taitai ai lava le Atua, i le soifua faa-lelalolagi o Iesu, le Mesia na valoia.

Tamaiti, o le taua o lenei tala, e a'oa'oina ai tatou, e taitai ma faasino i tatou e le Atua i mea lelei ma taunuuga manuia, pe afai tatou tefaalagolago ia te Ia i taimi uma, pei foi o Iesu. O a foi faigata sa feagai ma ia taimi o le soifuaga o Iesu, pei o le pule a Roma, ae na leoleo lava le Atua i lona Alo pele, ia tini le faaolataga mo i tatou tagata agasala.

Fautuaga taua: E fautuaina le faiaoga ina ia faasino i tamaiti le faafanua o i tua o a latou Tusi Paia, e iloa ai nuu ma aai na feafioa'i ai le Alii o Iesu.

### **Uiga o Upu:**

- i) Herota - o lo o faasino ia Herota le sili, o le na tofia e Roma e fai ma taitai sili po o se tupu foi ia Iutaia uma.
- ii) Arekilao - o le atalii o Herota le sili, sana vaaia ma pulea Samaria ma Itumia ina ua oti lona tamā.

**GALUEGA FAATINO:**

A	U	L	E	G	A	I	E	V	A
L	K	U	F	A	I	A	T	U	I
I	A	U	E	M	I	T	I	G	K
I	L	N	F	L	F	P	O	S	U
O	I	U	A	S	V	A	N	P	P
S	L	A	T	U	P	U	U	N	I
E	A	T	H	K	I	A	L	U	T
F	I	A	R	E	K	I	L	A	O
A	A	T	O	R	E	H	V	O	T
I	S	A	R	A	E	L	U	K	I

- |              |          |          |          |
|--------------|----------|----------|----------|
| <b>UPU:-</b> | AGELU    | ISARAELU | TAUNUU   |
|              | ALII     | IUTAIA   | FAAALI   |
|              | AIKUPITO | IGOA     | FEFE     |
|              | AVE      | OTI      | HEROTA   |
|              | AREKILAO | UPU      | KALILAIA |
|              | NUU      | TULAI    | MITI     |
|              | IOSEFA   | TUPU     |          |

**Faatonuga:** E 20 upu ua tuuina atu mai le tatou Tusi Faitau, saili mai ni upu e mafai ona e maua i totonu o le paso, e fua i le taimi. (E mafai foi ona faauma i le aiga le galuega lea)

**PESE:** Saunia e le faiaoga se pese e faaiu ai le mataupu.

**A’OA’OGA:**

1. E faasino e le Alii i tatou i mea lelei.
2. E taua o tatou nuu o nonofo ai.
3. Usitai i le faasinoga a matua.

**TATALO:**

Faaiu e se tama po o se teine le mataupu i le tatalo.

.....

**MANATU TAIALA O IUNI: “IA LILIU ESE MAI  
AMIOGA A LE  
LALOLAGI”**

“Aua foi tou te amio faatasi ma lenei lalolagi.....” O upu a le Aposetolo i le Ekalesia i Roma. Ao upu lava foi ia mo tatou, ona o a tatou amio faalogotata; o le lē usita’i, o le upu leaga, o le gutu oso, ma le mau amioaga o loo tatou faia pea i le tele o aso; ua lē gata i totonu o aiga ma nuu, aemaise i nofoaga faitele; lea o loo fai mai le ta’iala; ‘O amioaga a le lalolagi.’ O amioaga na e lē finagalo le Alii e faia e lana fanau Kerisiano.

**ASO SA: 4 IUNI 2017**

**MATAUPU: IA TOE FUATAIINA O TATOU  
LOTO**

**SINI:** Ia a’oa’o tamaiti ina ia iloa, o le toe fuata’iina o o tatou loto, o le alu ese lea ma amioaga a le lalolagi, ae faia le finagalo o le Atua e tusa ma lona alofa mutimutivale iai tatou.

**TUSI FAITAU:** Roma 12: 1- 2

## FESOASOANI MO FAIAOGA:

O le fuataiina, e fau mai le upu fuatai. O lona uiga, o se isi faatulagaga fou e agai iai ina ia taunuu i le manuia. E mafai foi ona faapea, o se isi fuafuaga fou, ona ua lē lelei le fuafuaga sa iai muamua. Afai sa tatou ola i se olaga e lē toaaga i le aoga Aso Sa, lē aoga i aoga a le malo, lē o i ni lotu, ola i se olaga femisaa'i, lē faalogo ma usita'i, ma le tele o le mau amio lē lelei o loo alia'e mai pea iai tatou le fanau, faapea foi totonu o o tatou aiga; Lea o le a faamanatu mai e le Aposetolo o Paulo le alafua sa faataoto mai e Iesu, tatou te ola ma sa'oloto ai.

E ui o upu a Paulo o loo a'oa'i atu ai i le Ekalesia i Roma, ae o loo lavea ai foi ma tatou pe a fua iā tatou amio o loo faia pea i aso uma, ua lē gata i totonu o aiga, o totonu o aoga, o faalapotopotoga, o amioga e fa'aalia i nofoaga tumutumu e pei o le taulaga i fale faatali pasi, o le maketi ma nofoaga faitele, ma isi nofoaga o loo alia'e mai ai le tele o amioga le talafeagai i ni tagata a'oa'oina, ma ni tagata ola faakerisiano ona faia.

Fai mai Paulo, '..... ia tuuina atu o tatou tino i le Atua, o le taulaga ola, ma le paia, ma le mālīe, e tatau ai ona o tatou faia'. Tamaiti, ia manatua, na o tatou fananau mai ma le leai o se agasala iai tatou, ona papatisoina lea o i tatou ina ia faatumauina lea mama ia i tatou. Mulimuli ane avea i tatou ma tagata Ekalesia, e ala i lo tatou taliaina o le tino ma le toto o le Alii o Iesu Keriso. O le osiga o taulaga a Isaraelu le nuu na filifila e le Atua e fai ma ona nu'u, e fai i manu e mamā ma le lē ponā. O le uiga o lea faamatalaga; O le tama'i mamoe poo le tama'i povi e lē i aveina ai se avega, e lē i avea ma manu ua matua. Ao le manu e mu'amu'a lona a'ano ma ona ponaivi o manu na e mamā e osi ai le taulaga i le Atua.

O le uiga lena o le taulaga ola; O le taulaga e faia ina ia taliaina e le Atua, ao le taulaga foi e faia ma le loto ma le agaga atoa, ina ia paia ma malie i luma o le Atua. O le uiga lena o le manatu o Paulo, ia tu'uina atu o tatou tino mamā i le Atua. O lona uiga, aua

nei faa'ele'eleaina i tatou i amioga a lenei lalolagi. E ala i agasala, o loo tatou faia i aso fai so'o, e le o ni amio na o mai ma tatou mai le Alii, ao o tatou lava loto lē usita'i.

Afai la ua maua i tatou i nei amioga a le lalolagi; Fai mai Paulo, ia toe fuata'i o tatou loto. E iloa lelei e le aposetolo le vaega o o tatou tino o loo tupu ai le agasala i le Atua. A mafai la e le tagata ona pulea e ia lona lava loto, o le tagata sili lena i luma o le Atua. O le a fai ma ana mea fiafia le ola, savali, ma tumau ai i le finagalo o le Atua. O mea ua o tatou iloa i le Atua, e lelei ma mālie, ma ato'atoa. Tamaiti, afai la o tatou amio pea faatasi ma lenei lalolagi, e ala i lo tatou faalogotātā ma lē usita'i pea i o tatou matua; Lea ua faamanatu mai le Aposetolo, ia toe fuataiina o tatou olaga, i le iloa pea o le finagalo o le Atua, ona fai lea o i tatou ma taulaga ola i luma o le Atua. Ao i latou o loo mulimuli ma faia pea lona finagalo; ia tumau ai e pei ona faia e le tatou uo o Iesu Keriso.

## **GALUEGA FAATINO:**

Vaelua le vasega i Vaega se lua:

VAEGA 1: Lisi mai ni amioga lē lelei se 4 o lo o maitauina pea iai tatou i Aso uma.

VAEGA 2: Lisi mai ni amioga se 4 e tatau iai tatou tamaiti ona ola ai.

**PESE: E LELEI LE ATUA (God is so good)**

**A'OA'OGA:**

1. Ia iloa e i tatou ona salamo mai amioga sese sa tatou ola ai.
2. Ia alo ese i tatou mai amioga ma faaososoga a le alii o le lalolagi.

.....

**ASO SA:** 11 IUNI 2017

**MATAUPU:** IA ‘ALO ESE MAI AMIOGA LEAGA

**SINI:** Ia a’oa’o tamaiti ia iloa ona ola i le olaga lelei. Ia alo ese mai amioga lē lelei a lenei lalolagi, ae ola i le finagalo o le Atua.

**TUSI FAITAU:** Esoto 23: 1- 5

### **FESOASOANI MO FAIAOGA:**

O ‘amioga’, o aga e faatino e le tagata, e mafai ona fa’aalia ai le lelei ma le leaga. A lē lelei le amio, ona faapea lea; E amio leaga le tama poo lea teine, ae a lelei , ona viia lea e tagata ma faapea ane, le tama amio lelei ma tausa’afia, le teine e ese le fa’aaloalo. Ao a ni amio lē lelei o loo taua e le tusi sa faitauina, o loo aumai ai se feau mo i tatou i lenei Aso Sa, e tatau ona tatou ‘alo ese ai?

O loo fa’aali manino mai e le vaega o le tusi a Esoto sa faitauina, amioga e lē tatau i le tagata ona ia faia. A tu’u faatasi manatu o le tusi tala i le fuaiupu (1- 3), o loo tau faailoa mai; ona iloa ai lea, o loo mana’o le tusi tala ia ‘aua ne’i avea i tatou ma tagata ‘molimau pepelo’. O le tulafono e 9; ‘Aua foi e te molimau pepelo i lē lua te tuāoi’ (Esoto 20: 16 ). Fai mai le tusi faitau; ‘aua le si’i le tala fatu fua’. O le a le uiga o lea faaupuga. Tamaiti, aua tatou te faia se tala fatu, se tala tatou te faasalalauina o se mea e le’i tupu, se tala sesē e fai ma molimau e faaleaga ai se isi uso a tagata; auā o le mea lena e ta’u o le ‘faitala pepelo.’

Aua nei o tatou ‘au i le mea sesē o loo fīnau mai ai le tagata taufaasesē. Aua o le a fai tatou ma tagata sauā i le tagata sa’o. Ia o ese mai le to’atele o loo fai le amio leaga. E lē o le toatele, ona sa’o ai lea o le mea sesē. E tatau ona malamalama lelei i le mafua’aga ma le faapogai o se mea, ona iloa ai lea o se faaiuga e tatau ona fai. E iloa lelei e le tusi tala le isi lea natura o le tagata,

o le osovale; ao le osovale lea ua faasa’o ai le mea sesē ona o le lē malamalama.

O le manatu lona lua o le tusi tala, o loo ta’oto i le fuaiupu (4- 5). ‘Ia faia le amiotonu’. Aua nei avea maseiga ma ala e ave’esea ai le amiotonu e tatau ona fai, i se meatotino a lē o loo lua masesei. Aua e le o meatotino o loo lua femisaa’i, o lou lava uso a tagata, ae o le a maumau ai fua meatotino. O le aoao tetele o manatu o le tusi tala; ‘Aua nei goto le la o tatou ita pea’, ia poo le fetalaiga a Iesu lea e teuteu ai le tulafono o le Feagaiga Tuai, e suia le mata i le mata; Ae fai mai Iesu, a po mai lou alafau, liliu iai le isi alafau. O lona uiga, a ita mai se isi iai tatou, ia o tatou faia le amio o loo finagalo iai Iesu; ia alofa pea i ai.

Tamaiti, o amio na o loo mana’o le tusi faitau e tatau ona tatou ‘alo ‘ese ai. A ia tatou fai le finagalo o le alii o Iesu e pei ona Afio mai ai i le lalolagi. Ia tatou fetausia’i i le fealolofaa’i, ma ia o tatou maua pea lona filemu, e mafai ai ona tatou faia faaiuga lelei e tusa ma lona finagalo ia i tatou.

### **Uiga o Upu ma Fuaitau:**

- i) tala fatu fua: tala pepelo e faaleaga ai se tagata.
- ii) faapi’opi’o: faasesē se mea sa’o
- iii) masesei: lē lelei le va ma le isi tagata, leaga.

### **GALUEGA FAATINO:**

E manaia foi le toe faamanatu i tamaiti Tulafono e 10. Ia taumafai e tauloto ma faamanatu atili ai pea i tamaiti le taua o nei tulafono; e tusa ma le finagalo o le Atua ia i tatou.

Va’ai le Esoto 20: 3- 17

**PESE:** Suliveta Kurene (alofa i ou tuaoi, ao e malaga)

## **A’OA’OGA:**

1. Aua tatou te molimau fua i se mea tatou te lē iloa.
2. O le ita i lou uso a tagata, o le au’upega a le fili.

.....

**ASO SA: 18 IUNI 2017.**

**MATAUPU: ‘O TAGATA FAAFIAAMIOTONU MA IESU’**

**SINI:** Ia a’oa’o tamaiti ia iloa le ese’esega o le tagata faafiaamionu ma le amionu a lo tatou Alii o Iesu Keriso.

**TUSI FAITAU:** Mataio 22: 15- 22

## **FESOASOANI MO FAIAOGA:**

O le mataupu o lenei Aso Sa tamaiti, o loo faatatau i tagata faafiaamionu ma le tatou uo o Iesu. O loo faatusatusa ituaiga tagata; poo ai le tagata lelei ma le tagata e lē lelei. O le tagata la e lelei, e tatau ona tatou faata’ita’i iai, ao le tagata lē lelei, e tatau ona tatou o ese mai ai.

O le mataupu e 21 tamaiti, o loo faamatala ai le tuli esea e Iesu o i latou na fai fefaatauaiga ma fesuaiga o tupe i le malumalu tapua’i i le Atua. O nei mea ua faia i le malumalu, mo lafoga a tagata e aoina ma ave i le malo o Roma. O le gaoiga la lea na faia e Iesu, faatasi ai ma ana a’oa’oga, o faataoto ma faamalologa, na mafua ai ona tupu le ita i le au Faresaio.



Fai mai le tala a Mataio na tatou faitau ai; Na o ane ia Iesu le au faresaio, ma taupulepule i se mea latou te mailei ai Iesu ona o ana upu. O Faresaio, o i latou ia o loo tausia tulafono mai le Feagaiga Tuai. O le ala lea o le feita i upu o a'oa'oga, o faamalologa ma faataoto a Iesu, auā e foliga mai o loo ia Iesu le pule aoao i mea uma. O le ala lea o le taumafai o nei tagata e fai se togafiti, e molia ai Iesu i luma o le faamasinoga. Ua latou auina ane o latou so'o ma le au Herotiano e fesili ia Iesu e tusa ma upu o ana a'oa'oga, aemaise o lana faatinoga na faia i le malumalu ao tau saili lafoga a tagata e ave mo le malo o Roma.

O le manatu o tagata na o ane ia Iesu pe a fua i le latou fesili, e musu Iesu e ave se lafoga i Roma. O le ala lea o le fesili tofotofu ane i le Alii, e fa'aali sona finagalo e tusa ma le lafoga e ave ia Kaisala. Fai mai tamaiti, na silafia lelei e Iesu le tupua a nei tagata; ona faapea atu lea o le Alii; "O outou tagata faafiaamionu, se a le mea ua outou tofotofu mai ai ia te a'u? Ona faatonuina lea e Iesu ina ia avane se tupe o le lafoga.

Ua fa'aali ane le tupe; ona toe fesili atu lea o Iesu, poo ai e ana le ata o loo i le tenari poo le tupe. O le tali ai latou, 'E o Kaisara'. Tamaiti, e lē tutusa le iloa o le tagata ma le silafia o Iesu. Ao le'i fesiligia le Alii, a ua leva ona iai le tali e tusa ma lo latou faafiaamionu. O le tali foi a le Alii, na iloa ai le faatauvaā o le tagata. Fai mai o Ia; '...ave le tupe o loo iai le ata o Kaisara ia Kaisara, a o oe le tagata o le Atua, e ave lau fa'aaloalo i le Atua, auā e toe foi atu oe le tagata i le Atua.' O le tupe, o loo i ai le faatusa o Kaisara. Ao le tagata o le faatusa paia o le Atua.

O le manatu o Iesu; Tu'u pea mea a le lalolagi e pule ai le lalolagi, ao le tagata na faia e le Atua, ia mulimuli atu i le Atua ma faia lona finagalo paia. Tou te iloa outou tamaiti, fai mai na o latou tu'ua Iesu ae o ese. O le faailoga o le tagata ua mateia lana tupua lilo. Po ua iloa foi lona faatauvaā, e le tutusa o ia ma le iloa o le Alii.

## Uiga o Upu:

- i) Faresaio - o tagata; o le latou matafaioi o le tausia, ma toe faia nisi fesuaiga i tulafono a Iutaia.
- ii) taupulepule - o se tonu e faia faalilolilo e aunoa ma le iloaina e se isi tagata.
- iii) Herotiano - o tagata Iutaia o loo galulue i lalo o le faatonuga le tupu o Roma, i le aoia o le lafoga, ma faaoo ane i le malo.
- iv) tenari - o le tupe siliva e pei foi o le tatou foi tupe o loo i ai le ata o Kaisara le tupu o Roma i na ona po. O le tenari e tutusa ma le tatou 10sene.

## GALUEGA FAATINO:

### Taliga Fesili:

- i) O ai e ana upu ia; “O outou tagata faafiaamionu, se a le mea ua outou tofotofo maia i te au?”  
Tali: O Iesu.
- ii) O le fuaiupu e fia o loo iai upu ia; ‘E o Kaisara’  
Tali: Fuaiupu e 21.
- iii) O foliga o ai o loo i le tenari?  
Tali: O Kaisara.
- iv) O ai e faatatau iai le upu ‘a’oa’o’ o loo i le fuaiupu e 16?  
Tali: O Iesu.
- v) O ai tagata ia o loo taulamalama iā Iesu?

Tali: Faresaio.

**PESE:** Ua ou filifili e mulimuli iā Iesu  
(I have decided to follow Jesus)

**A’OA’OGA:**

1. Aua le fia tofotofo i le Alii.
2. E lē tutusa so tatou iloa ma le silafia o Iesu Keriso.
3. E silafia lelei e Iesu o tatou vaivaiga faale-tagata soifua.

.....

**ASO SA:** 25 IUNI 2017.

**MATAUPU:** E LEI FAAVAIVAI NEEMIA I  
TAUFAAMATA’U

**SINI:** Ia a’oa’o tamaiti ia iloa, o le taufaamata’u, o le au’upega a le fili e faavaivaia ai le tagata faatuatua ma faamaoni i le Atua. Ia aua nei avea ia mea ma faafitauli i o tatou olaga.

**TUSI FAITAU:** Neemia 6: 1- 14

**FESOASOANI MO FAIAOGA:**

O le feagai ai o Neemia ma le toe atiina a’e o le pa o Ierusalem, e lē o se galuega faigofie. Aua pe a fua i le toaitiiti o tagata na loto i le toe faaleleia o le pa ma ona faitotoa, mo le malu puipuia lelei o le nuu mai le fili. Ao le puipuia o le paia o sauniga, faapea

le filemu mana'omia ao toe faaolaola le ola faale-Agaga o tagata i le Alii.

O le galuega tamaiti sa tatau ona faia e i latou sa nonofo i le nuu. Peita'i, ua va'ai atu ma le alofa Neemia i le leai o se tagata o toe fia mana'o e toe faia le pa; Na mafua ai ona ia manatu, o le a toe faia le pa e pei ona iai muamua. E lē o se galuega faigofie la pe a fua i le lē maopoopo, ma le lē loto gatasi o le nuu.

E le'i avea lea itu ma mea na faavaivaia ai le taumafai o Neemia. A ua ia taumafai atu loa mo le amataina o le galuega. E ui la ina to'aitiiti tagata na au ma Neemia mo lea galuega lelei mo Isaraelu, a ua atili ai ona malosi Neemia. Fua la lea o le taumafai ane o Sanepalata le tagata Peresia, o Tovia le sa Iuta ma Gesemu le tagata Arapi i sa latou faatasiga ma Neemia, o se auala ua fuafuaina latou te fasiotia ai Neemia; a ua atili ai ona pipi'i atu Neemia i le Atua mo se fesoasoani; Aua ua tupu ane le ita, ina ua fiu i auala o le taufaifai sa manatu e faavaivaia ai le fauina o le pa, ao lea lava ua uma mālie ane le galuega e ui ina toaitiiti sa galulue.

Fai mai le tala tamaiti, ua fia ane feau, ae lē māluelue ai le mafaufau o Neemia. Ia Neemia lava ia, e le sili ia fe'au i lo le galuega o loo faia. O le lonalima ane o fe'au, o se pepelo ua faia ma le manatu o le a oo ane ai Neemia. Fai mai ua sau le auauna ma le tusi, o le tala fatu e faaleaga ai le faitaulaga. A ua atili ai ona valaau atu Neemia i le Atua e faamalosi mai i ona lima. Ona alu lea o Neemia ia Semaia le ta'ita'i o le tasi vaega o sa Iuta o loo latou lagolagoina Sanepalata i le faifai atu i le fauina o le pa, mo sana fesoasoani. O le tali a Semaia tamaiti; e alu e lafi i le malumalu aua e o ane po tagata e fasioti ia te ia. Peita'i o le tali a Neemia, o loo iloa ai le tagata e moni lona talitonu ma lona faatuatua faamaoni i le Atua. O le tali a le tagata e lē fefe i le taufaamata'u, o mailei ma pepelo uma meana, ina ia faasalaina ai o ia. Fai mai Neemia; "E sola ea le tagata e pei o a'u? O ai ea e pei o a'u e alu i le malumalu ia ola ai o ia? Ou te le alu lava"

Ua ia aioi atu foi i le Atua ina ia aua nei taunuu mailei leaga a i latou o tau faamata'u mai ia te ia. Fai mai a ia; "Lo'u Atua e, ia emanatua Tovia ma Sanepalata e tusa ma ia mea ua la faia, atoa foi ma perofeta o e na taufaamata'u mai ia te au". E talitonu Neemia, o le pipi'i mau i le Atua, o le malosi foi lea o le tagata. E lē popole, pe fefe foi i se mea. Ua na o le Atua na te faia se faaiuga lelei i ituaiga tagata faapea.

Na oo lava foi ia Iesu uiga ia o tagata; ma iu ai i le satauro. Ae le'i faavaivai ai lava Iesu. E le'i loto foi e tau ma sui; ao lona finagalo ao tautau o Ia i le Satauro; "Lo'u Tama e, ia e faamagalo atu iai latou ona ua latou leiloa le mea ua o latou faia."

### **Uiga o Upu:**

- i) sāvāli- o se feau e ave i se isi tagata i se mafuaaga tataau.
- ii) logoa- ta'u, faailoa atu i tagata.
- iii) fatu fua - tala pepelo, tala fatu e faaleaga ai se mea.
- iv) faamata'u - faafefe

### **GALUEGA FAATINO:**

Fai se faatinoga pu'upu'u o le tala sa faatinoina.

Vaelua le Vasega i ni Vaega se lua:

O le vaega a Neemia- Faatino le atiina ae o le pa.

Vaega a Sanepalata- Taufai fai i le galuega o loo fai.

**PESE:** O Iesu e manumalo. (Jesus is a winner man)

### **A'OA'OGA:**

1. Aua le faavaivaia i tatou i le taufaamata’u mai o le fili.
2. Ia ola talitonu ma tumau i le Atua, e lē fefe ai i faigata.

.....

**MANATU TA’IALA O IULAI: O AMIOGA A TAGATA O  
LE MALAMALAMA.**

“O a’u nei o le malamalama o le lalolagi; o lē mulimuli mai ia te a’u, e lē savali o ia i le pouliuli, ae iā te ia lea malamalama”. O ai tatou te mulimuli iai e maua ai lea malamalama? O le uiga lea o le fetalaiga a le Alii o Iesu; OIa lava o le Malamalama. O le ola o le lalolagi. Na o Ia e tatau ona tatou mulimuli atu i ai, e maua ai le ola e faavavau. O Iona uiga la, e tatau ona tatou amio e pei ona faia e Iesu, ona avea lea o i tatou ma tagata o le malamalama moni o le lalolagi.

**ASO SA: 2 IULAI 2017**

**MATAUPU: UA AGALELEI RAAVA I TAGATA E  
TOALUA**

**SINI:** Ia a’oa’o tamaiti ia iloa, o le agalelei i isi tagata, o se isi lea o amioga e fiafia e faatino e le tagata ua taua o le tagata o le malamalama, e pei ona faatinoina e le fafine o Raava.

**TUSI FAITAU:** Iosua 2: 1- 7

## FESOASOANI MO FAIAOGA:

O Raava tamaiti, o lona uiga; ‘o le fiafia’. O se tamaita’i o le nu’u o Kanana, le laueleele na filifilia e le Atua e nonofo ai Isaraelu. O se tama’ita’i agasala e tusa ma le faamatalaina e le tusi a Iosua; Aua o le upu talitane o loo fa’aaogaina i le fuaiupu muamua, e atagia ai, o se tama’ita’i e fiafia i soo se tama, ae le faia sana tane. Peita’i o lana galuega na faia i tagata o le nuu o le Atua na o ane e asiasi i le nu’u o Ieriko, ua faamauina ai lea tina; o se tinā lelei o le Tusi Paia.

O le taunu’u ai o le malaga a Isaraelu i le tasi ituvai o Ioritana i le laueleele e igoa o Setima, ona poloa’iina lea e Iosua taulelea e to’alua, e o e asiasi faalilolilo i le nuu o Ieriko. Fai mai o le fale muamua lea na ulufale iai nei taulelea; ma o ina na maua ai lo la lafitaga i le ma’ema’eā o le tupu ma tagata o Ieriko ia Isaraelu, ona o mea na o latou faia i tupu o nuu na o latou faaumatia.

Manatua foi tamaiti, o Raava o le fafine o nuu ese; ae ua faalogo o ia ua o mai Isaraelu, ona mata’u ai lea o ia i le Atua o Isaraelu. Aua ua oo ane tala i le mata’utia o meana o latou faia ao malaga mai i latou i le ala. O le ala lea na ia faalalafi ai i ia taulele’a e to’alua i le pito i luga o lona fale, ona o lona mata’u tele i le Atua o Isaraelu. Fai mai ua oo ane le feau a le tupu ia Raava e tu’uina atu nei tagata iai latou. Peita’i o le tali a Raava i tagata na o ane, ua iloa ai ua iā Raava le malamalama o le Atua. Fai mai Raava; ‘ou te lē iloa le mea ua o atu iai nei tagata, a ia outou taumafai e tuliloa i ia taulelea, ina nei toe sao atu i le mea o loo iai tagata o Isaraelu’. Peita’i, o lea lava o loo lalafi nei tagata i luga o le fale o lenei tinā.

O se fafine lelei la Raava? Ioe! E lelei Raava auā ua ia te ia le malamalama o le Atua o Isaraelu, ua mafai ai ona faasaoina nei tagata Isaraelu. O le afio mai o Iesu tamaiti i le lalolagi, sa faasinoinomia, ma inosia e ona lava tagata. Ae ina ua Ia faasusulu atu le malamalama o le Atua i le lalolagi atoa, na iloa ai o Iesu lava o se tagata lelei; i galuega na ia faia mo le faaolaina

o tagata mafatia. E faapena foi ia Raava. E faasinoinomia ma ta'uleagaina e tagata i lana amio. Ao lana faatinoga na saogalemu ai tagata o le Atua, ua tatou iloa ai, sa iā te ia le malamalama o le Atua, ina ua ia faatinoina le amio e pei ona finagalo i ai lo tatou Alii o Iesu, e pei foi ona Ia faia i le lalolagi agasala.

### **GALUEGA FAATINO:**

E manaia foi ae tofi ni tamaiti latou te faatinoina se 'skit' e faatatau i le tala; ina ia toe faamanatu ai i le 'au le faalogo; ae mafai ai foi ona iloa le tagata sa faalogo lelei ao faamatalaina le tala.

**PESE:** Savali tautala i le Malamalama.

O maia tatou uma ma mafuta fiafia  
Savali, savali i le Malamalama  
Tatou fealofani sei afio mai o Ia  
Savai, savali i le malamalama  
Savali tautala i le malamalama (x3)  
Savali faatasi ma le Atua

### **A'OA'OGA:**

1. Ia faatino a tatou amio lelei i soo se tagata i taimi ma aso uma.
2. O amioga lelei e fa'aalia e iloa ai le tagata o le malamalama o le Alii.



**ASO SA: 9 IULAI 2017**

**MATAUPU: AUA LE FAALIALIA LA OUTOU AMIOTONU.**

**SINI:** Ia a’oa’o tamaiti ia iloa, o le faalialiavale, e lē o se amio lelei lea e iloa ai le finagalo alofa o lo tatou Alii o Iesu Keriso.

**TUSI FAITAU:** Mataio 6: 1- 4

### **FESOASOANI MO FAIAOGA:**

O se isi lea amio ua masani ai tatou tamaiti; o le amio lea o le fa’alialia. O le faia o se gaoiga ma le manatu, ia iloa uma mai e tagata o ia o loo faia se mea; Pe mafua foi ona faia o se mea, ona o le vaai mai o tagata. E lē faia ona o se agaga lelei, ae ona o le fa’alialia vale. E lē afaina i lona manatu pe lelei, poo se mea ta’uvalea o loo ia faia. O i latou uma o loo faia lea amio, e lē taunu’u i se lelei o latou olaga.

O le amio lea o loo fetalai ai le Alii i le motu o tagata, i le isi vaega lea o lana lauga i luga o le mauga. Ua vaai atu ma le alofa le Alii o Iesu i le motu o tagata, ma le tele o le mau faafiatauli o loo a’afia ai. Ao nei faafitauli, e mafua mai ona o le fia iloa ma le fia mata muamua o le tagata. Lea e iai ma le amio taatele lea i tagata. O le fetalaiga la a Iesu, o loo Ia taumafai e ta’u atu le a’afiaga ma le iuga o tagata fa’alialia. O se amioga e faia ina ia faamasino mai e isi tagata. O lona uiga, o lea ua maua mai tagata lona tau, ae lē o se tau mai le Atua. Ua faamasinoina e tagata lana amiotonu. Ao le silasila a le Alii o Iesu; aua nei iloa e se tasi le faatinoina o lau amiotonu. Ia tau lava o oe ma lou Tama o i le lagi. Ona fai mai lea e le Atua lou tau, ae lē o le tau mai tagata.

O le finagalo o le Alii o Iesu, o le amiotonu a le tagata ua na o le Atua na te silafia i le loto o le tagata. Aua o mea uma tatou te faia, o fua ia mai le loto; e ave ai se mea alofa ma le loto malie ma le fiafia. E foa’i ona o le alofa moni; a e lē o le vaaiga a tagata. E lē faapea o le a leiloa e le lima tauagavale le mea e faia e le lima taumatau. Ao le agaga; ‘o le lē gagana’, aua e lē mafai ona faapea atu le isi lima i le isi lima i le foa’i o le a faia; Pe fa’aalia e le lima o le a faia le foa’i i le isi lima le foa’i o le a ave. Ao le uiga taatele lea o loo maua i tagata. O le ave o le meaalofa, ae mana’o ia iloa uma e tagata o ia ua ave se meaalofa lelei pe tele foi. A lē o lena, ua ia tala’i atu i tagata lana foa’i ua fai. Ae a leai se mea, ona lafi lea. Ao se isi lea mafuaaga e ala ai ona faalau lafolafoga o le Aso Sa, ma nisi o le aganuu faa-Samoa; Ina ia fō’ia ai le faafitauli lea o loo fetalai ai Iesu. Ao se faiga lelei foi lea mo i latou o lē fia foa’i mo le lotu. O le amiotonu lena o loo finagalo iai Iesu. O le foa’i e faailoa mai e le Tamā oi le lagi, ae lē o tatou lava. O le amiotonu, o le misitelio lea ua na o le tatou Tamā o i le lagi na te silafia ma aumai so tatou tau.

## **GALUEGA FAATINO:**

Faatumu avanoa i upu o loo i lalo:

amiotonu, silafia, faalialia, tau, faafiaamiotonu.

- i) O le Atua lava na te aumaia se ..... lelei mo i tatou.
- ii) E le fiafia le Atua i le tagata e ..... vale lana amio.
- iii) O le e avatuā ni meaalofa, aua nei ilia le pu e pei o tagata .....  
.....
- iv) E tauia e le Atua le ..... a le tagata.
- v) O lo tatou Tamā foi; o le ..... i le mea lilo.

**PESE:** We are marching in the light o f God.

## **A’OA’OGA:**

1. Ia foa’i ma le amiotonu, ona o le alofa moni.
2. Aua le faalialia vale, ae mulimuli i le finagalo o Iesu.

**ASO SA: 16 IULAI 2017**

**MATAUPU: UA MAFAI E PETERU MA IOANE  
ONA FAAMALŌLŌ LE PIPILI**

**SINI:** Ia a’oa’o tamaiti ia iloa, o le galuega faamalōlō e pei ona faatinoina e le Alii o Iesu, e mafai foi ona faatinoina e tagata pei foi o tatou; pe a fai tatou te talitonu ma faatuatua faamaoni ia Iesu Keriso le Alii faola.

**TUSI FAITAU:** Galuega 3: 1-10

## **FESOASOANI MO FAIAOGA:**

O Peteru ma Ioane, o so’o sili ia ona latalata iā Iesu, i taimi o femulimulia’i ia te Ia ona so’o e sefulu ma le toalua, i le tapenaina o le ola faatuatua ma talitonu faamaoni i ana a’oa’oga ma faamalōlōga. O le naunautaiga o Iesu, ia mausalī i le loto le ola faatuatua ma talitonu faamaoni ia Iesu o le faola o tagata uma; ma ia o latou fa’aauau lana galuega i le lumanai pe a leai o Ia. Afai sa feoa’i faatasi ma Iesu, va’āi tino ma faalogo i ana a’oa’oga ma faamalōlōga, aisea la o le a lē mafai ai e ona so’o ona faamalōlō i tagata mama’i?

Fai mai le tala sa faitauina, o Ioane ma Peteru na o a'e i le malumalu i le taimi e masani ai ona fai tatalo. Ma la tau ane ai i se tagata pipili, ua fai ma masani a tagata le avane ma tu'u i le faitoto'a o le malumalu, e aisi ai i tagata e o ane e tatalo. E lē fou la lea amio, aua o aso uma o lona olaga o lana lea galuega o le aisi. Peita'i, o le ō ane o Peteru ma Ioane, na naunau ane ai o ia i se meaalofa. Na faapea le pipili o se meaalofa foi faapea, pe sili atu foi o le a aumai ma ia, ina ua faapea atu i la'ua nei; "Vaai mai ia iā maua". Ao se mea e lei mafaufauina e le pipili le faapea atu o Peteru; "E leai sana ario poo se auro, ua na o le suafa o Iesu Keriso o le Nasareta e mafai ai ona ia savali." Ua lē gata i lea, a ua tago atu ma faatu i luga, ma ua faamalosia ona vae ma tapuvae.

Fai mai ua oso i luga ma tu, ua savali o ia ma ulu atu i le malumalu, ma vivi'i atu i le Atua. O le ata o le fiafia, ina ua ia maua se meaalofa sili i lona olaga atoa, talu ona ia aisi i lea nofoaga. Peita'i, o le malosī o le faatuatua o Peteru ma Ioane ia Iesu Keriso i lona mana faaola, na mafai ai ona savali lenei pipili. Ua a'oa'o mai ai foi iai tatou, e mafai foi ona malōlō ma'i i so tatou faatauva'a, e ala i lo tatou faatuatua ma talitonu faamaoni ia Iesu Keriso le faaola o tagata uma.

**GALUEGA FAATINO:** Faatino le Tala.

Tofi ni tamaiti latou te faatinoina le tala sa faamatalaina. O tagata o loo a'afia i le tala; Vaai i le lisi o loo i lalo.

O le pipili, o tagata o loo avea le pipili i le nofoaga e aisi ai, o tagata o loo gasolo ane e tatalo i le malumalu, ma Peteru ma Ioane.

**PESE:** Savali ma oso ma vivi'i i le Atua.

## **A’OA’OGA:**

1. O le suafa manumalo o Iesu Keriso e mafai ai ona malōlō ma’i uma.
2. Ia avea i tatou ma faaolataga i nisi o fia maua se fesoasoani.

.....

**ASO SA**

**23 IULAI 2017**

**MATAUPU:**

**IA OLA MATAALA.**

**SINI:**

Ia a’oa’o tamaiti ia iloa ona ola mataala i so o se taimi o le olaga, ma ia lava le onosa’i i taimi uma, ina ne’i osofaia i tatou e le fili.

**TUSI FAITAU:**

1 Samuelu 26: 1 – 12

**FESOASOANIMOFALIAOGA:**

O le mataala o se tagata, o le fa’aalia lea o lona mafaufau lelei, i le loto atu i se mea o faananau iai le loto ia taunu’u manuia, ma le onosa’i e na te mafai ai ona lavatia faigata ma faafitauli e fetaia’i. O le fesili tamaiti; I le tala sa faitauina; O ai o Saulo ma Tavita e mataala? O Saulo tamaiti, o le ulua’i tupu lea o Isaraelu na filifilia e le Atua e tusa ma lo latou mana’o. O Tavita, o le tagata usu pese. Na o’o ane i le maota o le tupu, e fai o ia ma vai fofō i ma’i o le tupu e ala i ana pese ma le leo mālie o lana kitara. Peita’i, o lea ua fai ma fili o Saulo. O le ala lea o le solasola solo o Tavita, ma oo atu ai i le vao matua o Sifi ma lafi ai, ina nei maua o ia e Saulo. Ua avea le naunau o Saulo i lona fia maua o Tavita e faao’o i ai le oti, ma ala ua matuā vaivai ai le tino, ma ua fia maua se malologa. A ‘ua faapena foi i lana autau, ua lagona

faatasi le lē lavavā. Se'i i ai foi se tasi e mataala, i le mea o loo naunau i ai le tupu; A 'ua vaivai mai foi le tupu, ae sei tula'i mai se isi. Lea ua oo ane le tagata o loo latou fia maua, a ua leai se tasi na te iloina.

Na matuā mamao lava ma le mafaufau o Tavita, le faao'o o le oti ia Saulo. A ua ia ave le tao ma le fagu vai, e faailoa atu ai iā Saulo ma lana autau, le lē ola mataala. Ua faailoa atu iai e Tavita lo latou mata momoe. Masalo tamaiti, ana leo Tavita o se tagata e malamalama i le Atua; o le iuga o Saulo ma lana autau o le oti.

Ua faamanatu mai e le tala lea iai tatou tamaiti, le taua o le ola mataala. Fai mai ina ua foi ane Iesu sa tatalo, ma maua ane ona so'o o loo momoe, ona Ia fetalai atu lea; (Mataio 26: 41) "Ia outou mataala ma tatalo, ina ne'i oo mai le faaosoosoga ia te outou; ua mana'o iai le loto, a o le tino ua vaivai." E fia avea ma so'o ae faavaivai gofie, auā o le natura lava lea o le tagata e lē tumau ma talitonu faamaoni ia Iesu Keriso, poo le tagata foi e ola faalagolago. E faavaivaia gofie le tino ma le mafaufau, e faōa le malosi ma ave'esea le naunau, ma le loto atu i se mea o faananau iai le loto. Ae a faatusatusa tala ia e lua, e ui ina eseeese; ae manino le finagalo o Iesu; "Ia mataala ma tatalo....." O le tala foi lea iai tatou; Ia mataala i soo se taimi. O le mea lea tatou te fetai'a'i ai ma faafitauli, ona ua mata momoe i tatou. Ao le lagona o le vaivai, moeiini ma tatalo atu i le Atua, o le a maua ai le malosi e tauivi ai ma faafitauli o le olaga.

### **Uiga o Upu:**

- i) Kipea(f 1)- o le a'ai o le ituaiga o Peniamina, o le nuu o Saulo.
- ii) Iesimoni(f1)- o le ogaeleele e vaomatua le isi itu, ae toafa le tasi itu
- iii) Matavao(f4)- o sipai, poo tagata suesue nanā
- iv) Tolauapi(f6)- o ni tagata o loo nonofo i se vaega o se vaomatua, e fa'aaogaina ai ni fale ie.

## **GALUEGA FAATINO:**

Taliga Fesili (Tali i le “Sa’o” po o le “Sesē”)

1. O Saulo o se tagata alofa ia Tavita.  
Tali. Sesē
2. O Tavita o se tagata tau i ma sui ia Saulo.  
Tali. Sesē
3. O le mana’o o Apisai, ia faao’o le oti ia Saulo.  
Tali. Sa’o
4. Na ave e Tavita ma Apisai le tao ma le faguva i a le tupu.  
Tali. Sa’o

**PESE:** We are marching in the light of God.

## **A’OA’OGA:**

1. Ia ola mataala ma tatalo i taimi uma..
2. O le ola faalagolago i le Atua, e lē maua ai e le fili.

**ASO SA: 30 IULAI 2017**

**MATAUPU: UA FILIFILIA ULUA’I TIAKONO.**

**SINI:** Ia a’oa’o tamaiti ina ia o latou iloa, o le filifilia o se tagata i se galuega, e fua i le tomai ma le agava’a ua iā te ia; Ina ia fa’aaogaina tatau i se avanoa ua valaauina ai, e tusa ma ia mea alofa a le Atua.

**TUSI FAITAU:**

**Galuega 6: 1- 6**

**FESOASOANI MO FAIAOGA:**

O le tupu ma ola ai o le galuega folafola a le au Aposetolo, ua faatuputupula'ia foi le au Kerisiano e faatuatua ma talitonu faamaoni i le faaolataga a Iesu Keriso. O nisi o nei tagata ua foa'i ane lo latou tamaoiga e tufa atu ma tagata matitiva. O nisi ua faatau atu fanua ma fale, e maua ai tupe e foa'i ane i le au Aposetolo mo tagata e vaivai le tamaoiga. O le mafuaaga lea o le muimui o tagata Eleni i tagata Eperu. E manatu tagata Eleni, e manatu faapito tagata Eperu, i le lē lavea ai o fafine nofo to'atasi, poo fafine ua oti a latou tane i le faaso'a a le auso'o.

Peita'i ua ta'utino e le au so'o, e lē mafai ona o latou tu'ua le afioga a le Atua ae tufatufa i oloa. Ae a fua foi i se isi itu, e lē mafai ona faia ni galuega se lua i se taimi e tasi. O le ala lea o le manatu o le au so'o e to'asefululua, e tatau ona filifilia nisi e nafa ma lea vaega. Le ala lea o le filifilia ai o tagata e to'afitu e faia lea galuega, ina ia faasopolia tagata uma i nei fesoasoani. O ni tagata e ta'uleleia ma ola i le ola faaleagaga, ma le potu latou te faia ai lea galuega; Ae faatino pea le galuega faaso'o e pei ona valaauina ai e le Alii o Iesu Keriso, e ala i le tatalo mo se manuia o le Ekalesia, ma le folafolaina o le upu i le faaolataga a Iesu Keriso.

O tagata la ua filifila nei, ua taua o tiakono. Ua manatu le au Kerisiano o tagata e ta'uleleia i lo latou si'osi'omaga. Lea na tofia ai Setefano, Filipino, Pokoro, Nikanora, Timona, Pamena ma Nikolao. Ua tu'uina atu i latou nei e to'afitu i le au Aposetolo, ona tatalo lea ma faae'e o latou lima i o latou luga. O le uiga o lea faiga, o le faapaiaina o i latou nei e tusa ma lo latou faiva o le a feagai ai, e tusa ma lo latou soifua auuina i le Ekalesia; faatasi ai ma le faamanuia iai latou nei e to'afitu, ina ia sologa manuia le galuega.



O le faatinoga lena e faia i se tagata e ta'uleleia i se aoga, galuega, aiga, se faalapopotoga, ma soo se mea; e ave iai se tofiga taua. O le a faamanuia iai tagata taua ina ia manuia atili o latou faiva mai le Atua.

### **GALUEGA FAATINO:**

Taliga Fesili:

1. O le a le muimui a Eleni i tagata Eperu?

Tali: Ua lē lavea o latou fafine ua oti a latou tane i le tufatufaina o mea i aso fai so'o.

2. O le a le tali a le au so'o i ia muimuiga?

Tali: E le tatau ona matou tu'ua o le afioga a le Atua, ae tufatufa i oloa.

3. E toafia i latou na filifilia?

Tali: E toafitu.

4. Faauma le fuaiupu lea: 'O le ala i le pule o le.....'

Tali: tautua

**PESE:** Ua ou filifili e mulimuli iā Iesu

### **A'OA'OGA:**

1. E fa'aaogaina e le Atua le tagata ola faamaoni.

2. Ia faamaoni i tofiga ua vala'auina ai i tatou.

**MANATU TAIALA O AOKUSO:  
MANATUA APOAPOAIGA A LE ALII**

E taua lo tatou manatua o lo tatou Alii i taimi uma o lo tatou ola, auā tatou te maua mai ai mea lelei ma fesoasoani mo i tatou i so o se taimi. E galo ia i tatou le Alii pe a tatou feagai ma faigata. Peitai a tatou mafaufau ma valaau ia te Ia mo se fesoasoani, e lē mafai ona lē tali mai.

**ASO SA:                   6 AOKUSO 2017**

**MATAUPU:  
UA APOAPOA’I ATU MOSE IA ISARAEU**

**SINI:**                   Ia malamalama le vasega, e tatau ona usiusita’i i mea lelei uma ua apoapoa’i ai o latou matua ia i latou, auā e manuia ai lo latou ola i le taimi nei ma le lumanai.

**TUSI FAITAU:**       Teuterenome 8: 10 – 18

**FESOASOANI MO FAIAOGA:**

Tamaiti, o le upu ‘apoapoa’i’, e tutusa lelei lava ma le upu lapata’i po o le fautua. E masani ona apoapoa’i ma fautuaina tatou e o tatou matua, i amioga lelei ma le tatau e ao ina tatou faia. E faapena foi i o tatou faiaoga. O fautuaga aoga tatou te lelei ma manuia ai, ae lē o ni upu e leaga ai o tatou olaga. Afai la tatou te manatuaina ia apoapoaiga ma tatou tausī i ai, o le a manuia foi ma ta’ulelei i tatou e isi tagata, aemaise lo latou Atua. Tamaiti, e faapena tonu lava le faanaunauga o le Alii i tagata o lona nuu o Isaraelu. O lapataiga taua na tuu atu e le Alii ia Mose lana auauna, ina ia logo atu i le nuu o Isaraelu, pe afai e taunuu i Kanana le nuu folafolaina, ma nonofo ai. E tele ma anoanoa’i

apoapoaiga eseese mo Isaraelu mai le Alii. Afai latou te manatua ma tausi i ai, o le taunuuga lava mo latou, o le faamanuiaina.

O nisi o ia apoapoaiga taua, lea sa tatou faitauina i le Tusi Faitau. Afai e taunuu i Kanana ma aai i meaai, ma maona ai, nei galo ona faamanū atu i le Alii, ona o le nuu ma le laueleele lelei ua ia foa'i mo i latou. Afai foi latou te faia fale lelei ma nonofo ai, pe afai e tupu ma tele a latou lafu manu (mamoe ma povi); pe afai e tele a latou ario ma auro ma faateleina mea uma latou le maua, 'aua nei faamaualuga ai ma faagalogalo lo latou Atua. E tatau lava ona manatua Alii na alofa ma aumaia latou mai Aikupito sa nofo pologa ai.

O lo latou Alii na taitai latou i le vao i le tele o mea mata'utia pei o manu feai e i ai gata, akarava ma isi. O le ala na latou savavali ai, e le maua ai se vai, e naumati. Ae na faapunaina e le Alii le vai mo i latou mai le papa ala. Na fafaga foi latou e le Alii i le manai. E ui lava ina tigaina ai ile malaga umi, ae o tofotofoga ia mo i latou. Afai e tumau pea ma usiusita'i i upu ua ia apoapoai aimo i latou, o le a faamanuiaina i latou e oo i le iuga.

Tamaiti, o le a'oa'oga foi lea mo i tatou, a tatou usiusita'i i apoapoaiga mai o tatou matua, o lo tatou faia lava lena o le finagalo o lo tatou Alii. O le tamaitiiti e fa'aaoga fautuaga a ona matua ma tausi i ai, e ola manuia, maua le poto ma fiafia i ai tagata. Ae afai e lēola usiusita'i ma fiafia i amioga mataga, e itagia ma feagai ma tiga o le ola. O nisi tamaiti ua oo lava i le falepuipui ona o le leaga ma le lē fia faalogo i ni fautuaga.

### **Uiga o Upu:**

- |      |         |   |   |
|------|---------|---|---|
| i)   | faamanu | - | viia; faafetaia.  |
| ii)  | manai   | - | o meaai na aai ai Isaraelu i le vao, mai le vavega na faia e lo latou Atua. |
| iii) | amuli   | - | iuga, mulimuli  |

**GALUEGA FAATINO:** Tusiga Fuaiupu

Tusi mai ni au fuaiupu e fa'aaoga ai upu nei

1. faamanū
2. faagalogalo
3. manai
4. faatigaina
5. pologa

**PESE:** 183 (Pese ma Viiga) 'Tautuana le Alii le Faaola'

**A'OA'OGA:**

1. Usita'i i ou matua, faiaoga, faifeau.
2. Manatua apoapoaiga a tamā ma tinā.
3. 'Aua nei galo le Alii i taimi uma.

**TATALO:**

Faaiu e se tamaitiiti le mataupu i se tatalo.

.....

**ASO SA:** 13 AOKUSO 2017 (ASO SA TAMĀ)

**MATAUPU:** UA MANATUA E PETERU LE FETALAIGA A IESU

**SINI:** Ia malamalama le vasega e tatau ona tumau lo tatou alolofa ia Iesu i taimi uma.

**TUSI FAITAU:** Mataio 26: 69 – 75

**FESOASOANI MO FAIAOGA:**

Tamaiti, o le tatou mataupu o lenei Aso Sa, ua faatatau tonu lava i le faafitia e le so’o o Iesu e igoa ia Peteru, o lona matai o Iesu. A o agai atu Iesu ma ona so’o i le mauga o Olive, o iina i le fanua ua igoa ia Ketesemane, na pu’eina ai o Ia e tagata Iutaia, ma taitai atu lea ia te Ia, ia Kaiafa le ositaulaga sili. Na tuua e le au so’o uma Iesu ae sosola ese i le pala’aai ia Iutaia ua tetee ia Iesu. Na o Peteru sa mulimuli mamao atu pea i le Alii.

A o i ai la Iesu i le maota o le ositaulaga sili, sa fesiligia ai o Ia e le ositaulaga sili i fesili e tele. O le taimi tonu lena o lo o nofo Peteru i fafo i le faapaologa o le maota, ma lona popole ma le palaai, po o le a se iuga o le a oo ia Iesu. O ina tonu ua faatatau i ai le tatou mataupu, pei ona tatou faitau i ai i le Tusi Paia. Le taimi tonu lea na faafitia faatolu ai e Peteru lona Alii o Iesu, ma ia manatua ai foi le fetalaiga a Iesu na fai iā te ia (26: 34). Lea na fetalai atu ai le Alii iā te ia. “E moni, ou te fai atu iā te oe, o lenei lava po, a o le i vivini moa, e te faafiti faatolu mai ai iā te a’u.”

Le taimi ao i ai Peteru i le faapaologa o le maota, na iloa atu ai o ia e se tasi auauna teine, ma ia faapea atu iā te ia – “O oe foi sa oulua faatasi ma Iesu i Kalilaia.” Tamaiti fai mai le tali a Peteru, “Oute lē iloa le mea e te fai maina.” Ua faafitia ma faatagā lē iloa Peteru lona Alii, auā ua palaai iā Iutaia, nei pu’eina foi o ia. O lana tali atu, olona taumafai lava lea ia liliu ese mai ia te ia, le vaai a tagata, ma le mataupu ua molimau i ai le auauna teine.

Na ulufafo Peteru i le faapaologa o le fale, a ua fai atu iā te ia le tasi auauna teine. “O lenei tagata foi sa la faatasi ma Iesu le Nasareta.” Tamaiti na toe faafiti foi iina Peteru ma le augani ua faapea atu – “Ou te lē iloa lea tagata.” O se tali ua faailoa atu ai sana tautoga ma le faamaoni i le Atua, e teena ai lona iloa o Iesu. Sa toe iloa ane Peteru e nisi tagata ma latou faapea atu iā te ia –

“E moni, o oe lava lo latou; auā ua iloa oe i lau gagana.” Oka, oka, se lē alofa o Peteru iā Iesu. O fea foi ana folafola na fai ia Iesu – “E ui ina ta oti faatasi ma oe, ou te lē faafiti lava iā te oe (26:35). Le taimi lava na faafiti faa-tolu ai Peteru na te lē iloa lava lea tagata o Iesu, na vivini ai loa moa. Tamaiti o le vivini o moa na tei ai Peteru ma manatua loa le fetalaiga a Iesu na fetalai atu ai ia te ia. “E le vivini moa seia e faafiti faatolu mai iā te a’u. Ua ulufafo o ia ma le fale ua matuā tagi lotulotu lava.

Tamaiti, e silafia e Iesu mea uma ua tatou folafola atu iā te ia. Pe e te folafola atu ia Iesu, o le a e faamaoni e tausī ou matua, toaga e fai au meaaoga, toaga i lotu, ola alofa, usiusita’i, loto fesoasoani ma isi, ae tatou lē savavali ai ma faia i lo tatou ola. O lo tatou faafitia lava lena o Iesu i o tatou olaga. Mulimuli pea i mea lelei ua a’oa’o mai ai Iesu iai tatou, tusa lava pe faigata, ia tumau pea i ai, ona tatou maua lea o le manuia.

### **Uiga o Upu ma Fuaitau:**

- i) faafiti (deny) - musu e talia le sa’o teena e leai se feso’otaiga
- ii) augani - tauto atu po o le ta’utino atu
- iii) tagi lotulotu - tiga matuitui o faanoanoaga i le loto.

### **GALUEGA FAATINO: Faatinoga**

E manatu, o se galuega faatino taua e aupito sili ona tumau ai le malamalama o tamaiti i lenei mataupu, o le faatinoina lea e faiaoga ma tamaiti o le vaega o agai tonu i ai le mataupu. Ia tagi lotulotu lē o le a fai ma Peteru.

.O e moomia i le faatinoga:-

- Iesu
- Peteru

- auauna teine (1)
- auauna teine (2)
- nisi tamaiti se toalua
- se isi e vivini faamoa.

**PESE:**

1. Ua ou filifili e mulimuli ia Iesu (x 3)  
Ou te le toe foi, ou te le toe foi

I have decided to follow Jesus (x 3)  
No turning back, no turning back

(x3)

2. Le lalolagi i o’u tua, le satauro i o’u luma  
Ou te le toe foi, oute le toe foi

The world behind me, the cross before me

(x3)

No turning back, no turning back.-

3. Po ua e filifili nei, e mulimuli ia Iesu (x 3)  
Ou te le toe foi, ou te le toe foi

Will you decided now to follow Jesus (x 3)  
No turning back, no turning back

**A’OA’OGA:**

1. ‘Aua nei teena Iesu i o tatou olaga.
2. ‘Aua e te faafitia ou matua ma ou uso, tuagane, tuafafine.
3. Manatua a’oa’oga a Iesu.

.....

**ASO SA: 20 AOKUSO 2017**

**MATAUPU: UA TA’U ATU E IESU LE POLOAIGA FOU**

**SINI:** Ia malamalama le vasega e mana’o Iesu ia tatou ola i le fealofani.

**TUSI FAITAU:** Ioane 13: 31 – 35  
Ioane 15: 12 – 17  
(E mafai ona silasila le faiaoga i le Mataupu 15, e tau ina su’esu’e ai)

### **FESOASOANI MO FAIAOGA:**

Tamaiti, e masani o tatou matua ona apoapoa’i ma faatonu i tatou le fanau, ina ia tatou ola fealofani, ‘aua le femisa’i. Afai foi e o matua i se isi mea i se taimi umi, e faatonu lava tatou le fanau, ina ia nonofo lelei ma galulue faatasi ile faiga o feau, ‘aua le taua’imisa. O le mana’oga o matua, ia maua e fanau le fealofani ma ia a’oa’oina ai foi i latou i le lumanai, pe a mavae atu i la’ua i lenei lalolagi.

Ua faapena tonu lava le a’oa’oga tamaiti, o lo o aumai i le tatou mataupu o lenei Aso Sa. O le Tusi Faitau sa tatou faitau ai, ua faamatalaina ai le poloaiga fou po o le ta’iala talafeagai, ua ta’u atu e Iesu i ona so’o. O se poloaiga fou e tatau ona faatinoina i le ‘alofa’, e ao ina latou ola ai. O le poloaiga faamavae a Iesu i ona so’o, auā ua toe o nai aso itiiti ona Ia tuua lea o le mafutaga. O lea afio atu Iesu i lana malaga to’atasi e lē mafai e se tasi o i latou ona to’alua ma Ia. O le poloaiga ua ta’u atu e Iesu \_\_\_\_\_” .....



ia outou fealofani, faapei ona ou alofa atu ia te outou, ia fealofani foi outou .....

O le malaga toatasi ua sauni atu ai nei Iesu, o le savaliga i ona puapuaga se ia oo lava i lona oti. O le a tuua na o i latou, ma e mana’o Iesu ia latou nonofo fealofani. O lona uiga, ia alofa le tasi i le tasi pei ona alofa Iesu ia i latou uma. Tamaiti o le tatou uo o Iesu, e ese le alofa ia i tatou le fanau, e tatau foi ona faapena tatou. Ia alofa le isi i le isi i taimi uma. O le poloaiga fou ua tuu e Iesu i ona so’o, e tatau lava ona latou faatinoina, auāsa latou ola, mafuta, feoi faatasi ma Iesu, ma molimau i lona alofa. Ia iloa e tagata o i latou ua ola i le faasinoga na aumai ia Iesu, pe a latou maua le fealofani.

E tele faatinoga o le alofa na vaavaai ma molimau i ai le au soo a’o mafuta ai ma Iesu.

1. O le alofa e le faapito:

So o se ituaiga tagata lava, na fa’aali i ai e Iesu lona alofa. O tagata mama’i, tagata matitiva, tagata faatauavaa ma isi. E le i faailoga e Iesu lona alofa, ae sa alofa i tagata uma.

2. O le alofa ia iloa le manaoga:

Na matua oo lava Iesu i tagata na moomia lana fesoasoani. O le faatinoga o le moni o le alofa, auā ua ia silafia ai le manaoga o i ia tagata ma ia galue loa i ai.

3. O le alofa faamagalalo:

E tele mea mataga ma le lē mafaufau na fai e tagata ia Iesu. Sa latou faifai ma upu leaga ia te ia. Sa lamalama e fasioti Iesu faapea e le o Ia o le Alo o le Atua, ma isi e tele. Peitai sa faamagalalo lava Iesu i ia tagata.

4. Alofa ofo atoa atu:

Na ia tuuina atu ai lona soifua ia faasatauroina, ona o le alofa ia i tatou tagata agasala.

Tamaiti e ese le tele o a'oa'oga o i lenei mataupu. E mana'o lava Iesu ia tatou ola fealofani. E le tatau ona tatou ita, faaleaga, ma faaesea isi tamaiti i o tatou nuu, aiga poo totonu foi o aoga. E ao ina outou talanoa faatasi, ta'aalo faatasi ma mafuta faatasi ona iloa ai lea e isi tagata, o i tatou o tamaiti ola fealofani.

**GALUEGA FAATINO:** Tusiga Fuaiupu

Fa'aaoga mai upu ma fasi fuaiupu ua tuuina atu i ni au fuaiupu taitasi.

1. toe itiiti
2. saili
3. poloaiga
4. fealofani
5. tuu atu

**PESE:** Toe a'oa'o le pese masani lea – “E mana'o Iesu i le Fealofani”

**A'OA'OGA:**

1. Ia tatou ola fealofani
2. Alofa i tagata mama'i
3. O Iesu e alofa i so o se tasi.

.....

**ASO SA: 27 AOKUSO 2017**

**MATAUPU: E LE GALO IA NOA MA LONA AIGA  
LE ALOFA O LE ATUA**

**SINI:** Ia malamalama le vasega, o se tulaga tataua lava ona faafoi le viiga o le Atua, ona o lona lavea’i mai i lo tatou ola.

**TUSI FAITAU:** Kenese 8: 15 – 22

### **FESOASOANI MO FAIAOGA:**

Tamaiti, ua tatou masani i le fesili – ‘O aina fau le vaa?’ O lona tali ‘O Noa’. O le tala ia Noa ma le lolo, tatou te iloa ai le alofa o le Atua i lenei tamā o Noa ma lona aiga uma. Ua oo ina maui atu le vai, ona to’a lea o le vaa i luga o atumauga o Ararata. Na silafia e le Atua ua matūtū le laueleele, ona ia faatonu lea o Noa ma lona aiga uma, e ulufafo ma le vaa. Na aumaia foi e Noa i fafo o manu uma sa i le vaa, ina ia latou tutupu tele i le lalolagi, ia fanafanau ma ia uluola i le lalolagi.

Sa manatua lava e Noa le alofa tele o lona Atua, auā ana lē seanoa le Atua, e le faasaoina o ia ma lona aiga uma, faatasi ma manu sa i le vaa. Tamaiti, e lē gata ina manatua e Noa le agalelei o le Atua, ae na ia faia foi le fata-faitaulaga i le Alii e ofo atu ai le taulaga mu i lona Atua. O manu vaefa uma e mama, ma manu felelei uma e mama ua ia fai ai lana taulaga i le Alii, e faafetaia ai le Alii, i lona lavea’i mai ma puipui mai ia te ia, o lana ava, o ona atalii ma o latou taito’alua i le taimi o le lolo.

Na silasila ma talia e le Alii taulaga na faia e Noa ma lona aiga uma. Na lagona e le Alii le manogi lelei o le taulaga, auāna faia lava ma le fiafia e Noa ma lona aiga. O le fiafia o le Alii i le taulaga manogi na faia e Noa, na ia folafola atu ai loa ia Noa. “E ui lava ina leaga o manatu o loto o tagata e afua mai ina o tama

iti, ou te lē toe faaoo le malaia i le laueleele ona o tagata. Ou te lē toe taia mea ola uma e pei ona ou faia.”

Tamaiti, e tatau foi ona tatou faapei o Noa ma lona aiga, ina ua lavea’i ma faasao le Alii i lo latou ola. Afai foi e manuia a tatou a’oa’oga, nei galo ia i tatou ona faafoi le faafetai ma le faamanu i le Alii na agalelei mai. O le pogai lena tamaiti e faia ai e o tatou matua lotu faafetai, e faamanatu ai o tatou aso fanau ma isi sauniga faapena i o tatou aiga. E manatua ai le tausiga alofa a lo tatou Alii, i lo tatou ola.

### **GALUEGA FAATINO: Sa’o po o le Sesē**

Tali mai i le ‘**Sa’o po o le ‘Sese’** ina ua e faitau i faaupuga o i lalo.

1. E toatele ava a Noa?

Tali: Sesē

2. O mauga o Ararata na to’a ai le vaa o Noa

Tali: Sa’o

3. E tele manu sa ave i le vaa o Noa

Tali: Sa’o

4. O manu na faasaoina e Noa i lona vaa, na tutupu ma fanafanau ma uluola i le lalolagi.

Tali: Sa’o

5. Na o manu vaefa uma e mama na fai ai le taulaga mu a Noa i le Alii.

Tali: Sesē

6. E le’i taliaina e le Alii le taulaga a Noa

Tali: Sesē

7. Na faaoo e le Alii le lolo i le lalolagi, ona o le leaga ma agasala a tagata.

Tali: Sa’o

8. Na folafola e le Alii ia Noa na te lē toe faaoo le malaia.

Tali: Sa’o

**PESE:** (fati o le pese – ‘Moe i lo’u moega i le po’)

E LĒ GALO LAVA IA NOA

E lē galo lava ia Noa  
Faapea le aiga atoa  
Le alofa mai o le Atua  
I si ona aiga umā  
Mavae atu o le lōlō  
E manatua pea i le loto  
Se taulaga mu i le Tamā  
Lavea’i uma le aigā.

Tali: Oka! Oka! Praise God.

Fautuaga: E mafai foi ona faaopoopo se isi fuaiupu e le faiaoga.

**A’OA’OGA:**

1. Ia faafetaia le Alii i mea lelei ua maua.
2. Ola mamā ae lē o le agasala.
3. Puipui i meaola uma

**TATALO:**

Faaiu e se tamaitiiti le mataupu i se tatalo.

## **MANATU TAIALA SETEMA: FIAFIA E FAAILOA ATU LE ALII**

O lo tatou fiafia e faailoa atu le Alii lo tatou Atua, o lo tatou taliaina lava lea o mea lelei uma mai ia te Ia, ma ia tatou ola ai mo le vaavaai mai a isi tagata. E le gata la i lea, ae ia tatou fesoasoani atu ai i isi tagata ma a'oa'o atu i ala ma faatonuga mai le Alii, auā e viia ai tatou e nisi tagata, ae viia ai foi le Alii i le galuega talai tatou te fai.

**ASO SA: 3 SETEMA 2017**

**MATAUPU: FIAFIA E TALA'I ATU LE TALA LELEI**

**SINI:** Ia malamalama le vasega, e mana'o le Alii ia tatou tala'i atu le Tala Lelei o le Faaolataga a le Atua, i nisi tagata ua lē malamalama.

**TUSI FAITAU:** Galuega 5: 33 – 42

### **FESOASOANI MO FAIAOGA:**

E lei faigofie i so'o o Iesu, o e ua ta'ua o ulua'i Aposetolo, le galuega tala'i o le Tala Lelei. E toatele tagata Iutaia na talia le talaiga, ae na sili atu foi le toatele o tagata na tete'e ma le fiafia i la latou talaiga. E tele sauaga na feagai ma le au-Aposetolo i le galuega. O nisi sa sasaina, lafo i falepuipui ma faapologaina. Peitai, e ui lava i mea faigata na latou feagai, ae sa tumau pea lo latou faatuatua i le Alii. Sa malosi lava o latou loto i le feau, aua na taitai ma faamalosiau le Agaga o le Alii i le galuega.

O se tasi foi aso, a o faagasolo pea le tala'iga a le au Aposetolo, sa tupu le lē fiafia ma le loto ita o taitai ma tagata o le lotu Iutaia

ia i latou. Ua latou taupulepule e fasioti i le au Aposetolo. Peitai i lea aso, na tulai ai se tasi o faresaio i le fono, o Kamalielu lona igoa ma faapea atu, ia tuu atu le au Aposetolo i fafo mo sina taimi puupuu. Ua o i fafo le au Aposetolo, ona fai atu lea o Kamalielu ia i latou. “Outou Isaraelu e, ia outou ma mea a outou faia i nei tagata ...” Na ia ta’u atu foi ia i latou, sa i ai foi i aso ua mavae le tasi tagata e igoa ia Tiuta ma lana talaiga. Na pipii ma tosina ia te ia tagata pe a ma le fa selau. Na fasioti o ia ma taapeape i latou na mulimuli ia te ia. Ua mavae lea tagata ae tulai mai foi le isi tagata e igoa ia Iuta le Kalilaia. Na ia taitai ese foi le nuu ma mulimuli atu ia te ia. Na oti foi o ia, ae faasalalauina tagata na ‘au ia te ia.

O le mana’o o Kamalielu, ia faasaoina le ola o le au Aposetolo, ma taofia le eseese o i totonu o le fono faatatau i Aposetolo. E ui o ia o se faiaoga o le lotu Iutaia, ae talitonu lava o ia i le talaiga a le au-Aposetolo, auā ua toatele tagata ua talitonu ma mulimuli i ai. Na ia faapoopo atu foi – “..... auā afai ua tupu mai tagata lena sauniga ma lena galuega, e faaumatia ia; ae afai ua tupu mai le Atua, tou te lē mafai ona faaumatia, ina nei iloa ua outou fai taua i le Atua lava.”

O le tala lena a Kamalielu na liliuina ai ma usiusita’i i ai le fono, ma i’u a i le toe aami o le au Aposetolo. Na latou sasa ia i latou ma vaoia i latou ona toe tautatala i le igoa o Iesu. Na latou tuuina atu i latou e o, ona fiafia ai lea o le au Aposetolo ua ta’uaogaina i latou e le Alii i le talaiga. E lei toe mapu i latou i le talai atu o le Tala Lelei i le malumalu, aemaise o lea fale ma lea aiga.

### **Uiga o Upu ma Fuaitau:**

- i) Kamalielu - o le a’oa’o ta’uta’ua i le tulafono a Iutaia
- o se faiaoga lauiloa i le tulafono, sa avea ma faiaoga o Paulo (Galuega 22: 3)

- ii) Tiuta - o le taitai o le fa selau tagata Iutaia, o e ua faia le talaiga, na so’o ai le nuu atoa i le taimi o Herota.
- iii) Iuta le Kalilaia - na ia faamaopoopoina se talaiga, i le taimi o le tusiga o le nuu.

### **GALUEGA FAATINO: PASO**

Saili upu nei totonu o le paso. E lelei foi ae fai ma galuega a tamaiti i le fale, e faamaea ai. Saili i le alu faalava, alu i luma, sau i lalo, kolosi, luga i lalo, lalo i luga, alu i tua.

ANAANA	FONO	MULIMULI
AAMI	FAITAUINA	MAPU
ITIITI	FAASALALAUINA	
MALUMALU		
IUTA	FAAMAMAO	
KAMALIELU		
IGOA	FAAUMATIA	NUU
IESU	LOTOA	PIPII
OLIOLI	MAVAE	SAUNIGA
SASA	SOIA	SUAFA
SILI	TAUPULEPULE	TULAFONO
TOAFAGALAU	TAAPEAPE	TAUTALA
TA’UAOGAINA	TALA LELEI	TUPU
VIIA	USIUSITAI	



A	A	M	I	U	T	A	N	I	A	G	O	A	U	A	T
N	N	A	G	I	N	U	A	S	V	S	L	N	U	P	O
A	I	L	O	S	S	P	H	O	A	K	E	R	N	F	A
A	U	U	A	I	N	A	F	H	K	S	U	A	F	A	F
N	A	M	U	L	I	M	U	L	I	I	A	P	R	F	A
A	T	A	K	K	S	A	U	L	F	I	T	E	U	E	G
U	I	L	T	T	V	V	I	M	N	P	U	T	P	T	A
T	A	U	T	A	L	A	R	K	U	I	N	U	U	I	L
O	F	H	N	N	R	E	P	A	E	P	A	A	T	U	A
A	I	T	I	I	T	I	K	A	M	A	L	I	E	L	U
M	P	T	A	U	P	U	L	E	P	U	L	E	A	I	S
A	S	A	I	T	A	M	U	A	A	F	A	S	S	N	E
M	I	A	T	I	S	U	I	S	U	O	L	I	O	L	I
A	I	E	L	E	L	A	L	A	T	N	T	H	I	N	S
A	O	O	T	U	L	A	F	O	N	O	R	T	A	P	K
F	A	A	S	A	L	A	L	A	U	I	N	A	I	I	V

**PESE:** Faaiu le mataupu i se pese e filifili i ai le faiaoga

**A’OA’OGA:**

1. Fiafia e talanoa i au uo i uiga o Iesu.
2. O le amio lelei le tala lelei.
3. O le suafa o Iesu tatou te ola ai.

.....

**ASO SA: 10 SETEMA 2017**

**MATAUPU: FAALOGO IĀ IESU MA TALIA O IA.**

**SINI:** Ia malamalama le vasega, e mana’o Iesu, ina ia tatou iloa lana upu ma usiusita’i e faatino i lo tatou ola.

**TUSI FAITAU:** Mataio 7: 24 – 27

### **FESOASOANI MO FAIAOGA:**

Tamaiti, o ai e fiafia e faalogo i a’oa’oga a Iesu? Lelei tele. O a’oa’oga a Iesu, o ana fetalaiga ia ua i le Tusi Paia, lea ua a’oa’oina ai tatou i le aoga Aso Sa, mai le faifeau, aemaise foi o tatou matua. O lona uiga e taua lo tatou toaaga i le Aoga Aso Sa, i le lotu ma le faitauina o le Tusi Paia. Fai mai le tatou mataupu o lenei Aso Sa - **“FAALOGO IA IESU MA TALIA O IA”**

Tamaiti, o se mea taua tele lo tatou fiafia e faitau ma faalogo i le a’oa’o mai o fetalaiga ma saunoaga a Iesu. Peita’i, o le itu pito i sili ona taua i lo tatou Alii o Iesu, o lo tatou faatinoina lea i lo tatou ola, o upu ua Ia a’oa’o mai ai. E mana’o le Alii e faataitai ma tumau ai i lo tatou olaga a’oa’oga ua tatou maua mai ia te Ia.

O le uiga lena o le a’oa’o mai o Iesu, i le Tusi Faitau o le tatou mataupu. Ina ua maea a’oa’oga e tele na lauga atu ai Iesu i le motu o tagata mai le mauga (mataupu 5: 1 – 7: 23), ona ia faaiu lea i lona ta’u atu o le faavae malosi, e faavae ai le olaga manuia o so o se tagata Kerisiano moni. O le uiga o upu mulimuli a Iesu – O ai le tagata ua faalogo i upu ua a’oa’o atu ai, ma faia e ia, ua faatusaina o ia i le tagata poto ua fausia lona fale i luga o le papa. Auā pe a to mai uaga, sau tafega ma pesi mai foi matagi i lea fale,

e lē pau lava, auā ua faavae i luga o le papa. Tamaiti, e mausali ma malosi lo tatou ola faa-Kerisiano, pe afai tatou te faalogo ma ola ai i le upu a Iesu. Po o a lava mea faigata e oo mai i lo tatou ola, e le mafai ona maluelue ai lo tatou faatuatua i lo tatou Alii o Iesu.

Peitai, afai ua na ona tatou faalogo i upu ma a’oa’oga a le Alii, ae tatou te lē faataitai e faatino ma ola ai, ona faatusaina lea o i tatou i le tagata valea, ua faia lona fale i luga o le oneone. Ua to mai uaga, ua oo mai foi tafega, ua agi mai matagi ma pesi mai i lea fale, ona nutipalaina ai lea. O le tagata valea ua fetalai i ai Iesu, e le ona ua faaletonu le mafaufau. Peitai, ua faatusa i le tagata ua na le iloa tonu le uiga moni o lona ola. Ua na ona ola i le olaga e aunoa ma sona faamoemoe i lona taunuuga. E le gata ina toilalo pea i faigata ole ola, ae ua lē tumau le mafutaga ma le Alii. Peitai, o i latou nei, ia fesoasoani i ai, ina ia latou fiafia i le upu ma fa’aa’oa’o i ai le faatinoina o le upu, e manuia ai.

## **GALUEGA FAATINO:**

Faatonuga:

Lisi mai ni uiga ua tatou iloa ai se tagata poto. Lisi mai foi ni uiga ua tatou iloa ai se tagata valea.

Faaitaiga: O le tagata poto e, ola usiusita’i, loto fesoasoani  
O le tagata valea e, faamaualuga, loto leaga

POTO

VALEA

**PESE:** (1) Tagata poto na fau lona fale i luga o le papa.  
(Wise man build his house on the rock)

Tagata valea na fau lona fale i luga o le oneone

(2) or Faalogo ma Usita'i

**A'OA'OGA:**

1. Faalogo ma usita'i i matua, faiaoga, faifeau
2. Toaga e faitau le upu a le Alii.
3. 'Alo ese mai uiga leaga o le olaga.

**TATALO:** Faaiu le mataupu i le tatalo.

.....

**ASO SA: 17 SETEMA 2017**

**MATAUPU: UA FAALAGOLAGO TAVITA I LE SUAFA O LONA ATUA**

**SINI:** Ia malamalama le vasega, e tatau ona tatou faatuatua i le Atua i taimi uma o le ola, tatou te manuia ma manumalo ai.

**TUSI FAITAU:** 1 Samuelu 17: 38 – 50 (mo le Faiaoga)  
1 Samuelu 17: 53 (mo le Vasega)

**FESOASOANI MO FAIAOGA:**

Tamaiti, o le tatou mataupu o lenei Aso Sa, ua faamatalaina ai le faatoilaloina e Tavita le atalii o Iese, o le toa matautia ma le tino ese o le malo o Filisitia e igoa ia Koliata.

Ua sauni Tavita e ofo atu o ia e tau ma lena Filisitia, ona faaofu ai lea o ia e Saulo le tupu i ona ofu. Ua tuuina atu foi le pulou apa memea i lona ulu, faaofu ia te ia i le ufi fatafata uamea. Ua fusi

atu foi lana pelu i luga o ona ofu, ona faataitai lea e Tavita auā e lei masani ai o ia.

Tamaiti o nei teuga uma o auupega na faia e Saulo mo Tavita, e lei taliaina e Tavita, auā e lei masani ai o ia. Ua tuu ese uma a ua alu atu ma lona to'oto'o i le alia ma filifili i maa lamolemole e lima ua fafao i lana taga. Ua ia ave foi lana maata ma faalatalata atu ai lea o ia i le Filisitia mata'utia o Koliata. Ua vaai mai le Filisitia ia Tavita, ona inoino ai lea ia te ia, auā o le tama itiiti o ia. Na valaau atu foi Koliata ia Tavita, "Oute se uli ea a'u, ina ua e sau ia te au ma to'oto'o?" Na fetuu atu foi e Koliata le Atua o Tavita. Tamaiti ua faamaualuga lava le toa Filisitia lenei, ona o le vaai atu i le tino laitiiti o Tavita. Ua ta'u atu foi e Koriata ia Tavita, o le ana tuuina atu lona tino i manu felelei ma manu tata'a.

Tamaiti, e lei fefe ai Tavita i ia mau folafolaga a Koliata. Ua ia valaau atu i le Filisitia, "Ua e sau ia te a'u ma le pelu, ma le tao ma le tao leoleo; a o a'u, ou te alu atu ia te oe i le suafa o le Alii o au, o le Atua o le itu taua a Isaraelu ua e faifai i ai. O le aso nei e tuuina mai ai oe e le Alii i lo'u lima, ou te fasi ia te oe ma ave ese lou ulu ..... E iloa ai foi elenei faapotopotoga uma, e lē faaolaina tagata e le Alii i se pelu ma se tao, auā o lo o i le Alii le taua, na te tuuina mai outou i o matou lima."

Tamaiti e moni lava upu na folafola atu e Tavita i le toa Filisitia ma lo latou nuu uma. Ua tago Tavita i lana ato ma avae se ma'a, ua sasau e ia te ma'ata, ua lavea ai le Filisitia i lona muaulu. Ua goto le maa i lona muaulu ona paū faō ai lea i le eleele. Ua manumalo Tavita auā sa faalagolago tasi i lona Atua Soifua. O le suafa o lona Atua na faatuatua i ai, o Ia lava e tali mai i lona mana'o. Tamaiti, ia faapena foi tatou, a tatou feagai ma faigata i mea e tutupu o lo tatou ola, valaau i le suafa o lo tatou Alii. O Ia lava e faafofoga mai i lo tatou vaivai. E faapena foi i le aoga. Ia tatalo ma faatoga atu i le Alii e tauto'alua tatou i mataupu. E lē na ona valaau i le Alii, ae ia tatalo ma toaaga i le aoga ma meaoga.

## **GALUEGA FAATINO:** Taliga Fesili

Tali mai i Fesili nei faatatau i le tatou Tusi Faitau.

1. Aisea na lē fa’aaogaina ai e Tavita le pulou apa memea, le ufi fatafata uamea ma le pelu i le fetauiga ma Koriata?

Tali: Auā e le masani ai.

2. E fia ma’a na filifili e Tavita mai le alia?

Tali: E 5

3. O le a se lagona o le toa Filisitia, ina ua ia vaavaai atu ia Tavita?

Tali: O le inoino

4. O ai na fetuu e le toa Filistia?

Tali: O le Atua o Tavita.

5. O le a na faalagolago i ai Tavita ina ua sauni le taua ma le toa Filisitia?

Tali: O le Suafa o lona Alii

6. O fea tonu o le tino Koriata na lavea i le ma’a a Tavita?

Tali: O le muaulu.

(E mafai foi ona saunia e le faiaoga nisi fesili mo le galuega a tamaiti)

**PESE:** Saunia e le faiaoga se pese mo le mataupu.

## **A’OA’OGA:**

1. Faalagolago ia Iesu e manuia ai.
2. ‘Aua le faamauualuga i isi.
3. Faatuatua i le Suafa o le Atua Soifua.

**TATALO:**

Faaiu le mataupu i se tatalo e saunia e se tamaitiiti.

.....

**ASO SA: 24 SETEMA 2017**

**MATAUPU: O IESU O LE ALO LAVA O LE ATUA**

**SINI:** Ia malamalama le vasega, o lo tatou Alii o Iesu, o le Alo e toatasi o le Atua.

**TUSI FAITAU:** Galuega 9: 19 – 25

**FESOASOANI MO FAIAOGA:**

Tamaiti, o le a sau tali i le fesili lea – O AI IESU? Lelei tele. E le tasi, pe na o le lua foi ni tali mo lenei fesili. O tali uma ua outou ta’u mai, e mafai lava ona sa’o faatatau iā Iesu. (fautuaina le faiaoga, ina ia talia ma faasa’osa’o nisi o tali a tamaiti faatatau i le fesili). E moni o Iesu o ona matua o Iosefa ma Maria, peitai na ala mai ia i laua le Alo o le Atua.

Tamaiti, o le tatou mataupu o lenei Aso Sa – **“OIESU O LE ALO LAVA O LE ATUA”**

O le tatou Tusi Paia na faitauina, ua tatou malamalama lelei ai, o Iesu o le Alo o le Atua. O le molimau lea a Saulo po o Paulo foi, ina ua toe vaai ona mata ma faafouina lona malosi, mai le mea na taia ai o ia e le pupula o le Alii, i le ala i Tamaseko. Ina ua faamaloloina o ia, ma ua vaai, ona tu ai lea o ia i luga ma papatisoina loa. Ua ai, ona malosi ai lea o ia. Ua faatasi atu foi o ia i le au so’o na i Tamaseko, ma nonofo ai mai i latou i nai aso. Ua faafouina e le Alii lona ola ma ua tumu foi o ia i le Agaga Paia o le Alii.

Tamaiti, o le olaga leaga sa i ai Saulo, o lona fusifusi lea ma faasauā i tagata Kerisiano, o e ua faatuatua i le suafa o Iesu. Lea la ua suia e Iesu lona olaga, e avea ai ma ave feau a le Alii, mo Lona finagalo. Ua faatuatua o ia i le Tala Lelei o le Faaolataga iā Iesu Keriso. O lea e lei toe faatali ai lava o ia, ae ua amata ona tala’i atu i sunako le suafa o Iesu. Ua ia folafola atu i tagata –“O Iesu lava o le Alo o le Atua.” Na ofo nisi tagata ina ua vaaia ma faalogo atu i le a’oa’o mai o Saulo e uiga i le suafa o Iesu. Na tete’i, auā o ia lenei na sauā i tagata i Ieruselema i ē na valaau i le suafa o Iesu. Sa ia fusifusi i tagata Kerisiano ma taitai i latou i le au ositaulaga sili.

Peitai, o le molimau ma le talaiga ua faia e Paulo, ua lē toe solomuli ai lava, ae ua matuā malosi lona faatuatua ona o le suiga tele ua faia e le Alii i lona olaga. E uii le fememea’i ai o Iutaia o lo o i Tamaseko, ae ua lē toe manatu lava i ai Paulo. O le mea taua ia te ia, o le iloa o le Tusi Paia ma a’oa’o loa i tagata, auā e manuia ai o latou olaga.

Na taupulepule Iutaia e fasioti ia Paulo, ae ua ave o ia e le au so’o i le po, ma tuu ifo i le pa o le aai, ua tuutuu ia te ia i lalo i le ato. Na faasaoina e le Alii lona ola, auā ua ia te ia le faamoemoe o le Tala Lelei, e fai ma vaa ma ipu i le finagalo o le Atua.

## **GALUEGA FAATINO: PASO**

Saili mai ni upu e mafai ona e maua mai le lisi o upu o i lalo, i totonu o le paso.



A	M	A	L	O	S	I	I	T	F
I	L	T	F	E	O	A	E	A	U
A	A	O	G	I	U	F	U	M	S
T	M	F	E	M	E	M	E	A	I
U	A	O	O	K	A	N	U	S	F
I	L	S	M	N	P	L	S	E	U
A	A	I	T	I	O	H	R	K	S
L	M	R	V	E	U	E	N	O	I
A	A	E	U	S	S	V	S	V	K
T	P	K	L	U	A	A	L	A	V

**UPU:**

ALO	TALAI	SUNAKO
ATO	IGOA	SAUA
IUTAIA	IESU	TAMASEKO
OFO	LAMALAMA	KERISO
FEMEMEI	MALOSI	VALAAU
FUSIFUSI	SAULO	

**PESE:** A’oa’o le pese lea - “All to Jesus I surrender”

1. All to Jesus, I surrender  
All to Him, I freely give  
I will ever love and trust Him  
In His presence daily live

Chorus:

I surrender all ..... (I surrender all)  
I surrender all ..... (I surrender all)  
All to Thee, my blessed Saviour  
I surrender all

2. All to Jesus, I surrender  
Humbly at His feet I bow  
Wordly pleasures, all forsaken  
Take me Jesus, take me now.

**A’OA’OGA:**

1. Talia Iesu i aso uma o lou ola.
2. O Iesu o le tatou uo.
3. Faataitai i a’oa’oga a Iesu.

.....

**ASO SA: 22 OKETOPA 2017**

**MATAUPU: IA AUAUNA MUAMUA PEI O IESU**

**SINI:** Ia malamalama le vasega, e tatau ona auauna muamua faapei o Iesu.

**TUSI FAITAU:** Mareko 10: 35 – 45

**FESOASOANI MO FAIAOGA:**

E i ai le upu a lo tatou atunuu tamaiti e faapea, “O le ala i le pule o le tautua” O lona uiga, a e fia maua se tofiga e peio le matai po o se isi tulaga maualuga foi, e tatau lava ona e tautua pe auauna muamua. Ae e le faapea o le a gata ai le ola auauna pe afai e maua tofiga ma faaeaina, ae ia avea tofiga ia fai ma ala e auauna ai. O lona uiga e le o ni tofi e nofonofo ma faamaepaepa ai ae o tofi ia galue ai ma saga faamalosi ai le ola auauna. O le mana o le fanau a Sepetaio o Iakopo ma Ioane, ina ia la nonofo o le isi ile

itu taumatau ma le isii le itu tauagavale o Iesu pe a oo i lona mamalu, o se mea na oo ai le loto tiga i le toasefulu o le auso'o. Auā foi o lea ua atagia le fia sili ma le manatu faapito o lenei auuso.

Peitai, o le manao o Iakopo ma Ioane oloo tali i ai Iesu “..... e lē o ia te au lea ona avatu, a e tau lava o e ua saunia mo i latou lea mea.” E le faapea e leai se pule o ia Iesu, o loo ia Iesu lava le pule, peitai o loo faamamafa e Iesu lona tulaga faaauauna. O ia o le Atalii o le tagata na sau e fai ma auauauna i tagata. Mo Iesu lava ia, e le tatau ona filifilia e le isi auauauna le isi auauauna. O lona uiga e lē filifilia e Iesu nisi mo lea mea, ua i ai lava i latou ua tofia e le Atua mo lea faamoemoe. E le gata i lea e lēoni nofoaga foi mo na o se toalua, fai mai Iesu, “ae tau lava o e ua saunia mo i latou lea mea,” o lona uiga e toatele tagata e mafai ona nonofo i le itu taumatau ma le itu tauagavale o Iesu.

E ui lava la i se lē fiafia le toasefulu o so'o ae sa taumafai lava Iesu e fofo le faafitauli, i lona a'oa'o atu ia i latou i le eseese ga o e ua avea ma alii o nuu ese ma le mea o lo o Ia finagalo i ai i lona malo. E lē mana'o Iesu e amio ona so'o i uiga o alii o nuu ese e auauauna i ai tagata. Ae o lona finagalo a fia sili se tasi o ona so'o ia fai ma auauauna, o se fia muamua foi, ia fai ma tautua. O lona uiga, ia tigaina ma auauauna muamua ona faatoa mafai lea ona faaeaina.

Tamaiti, e aoga foi mo i tatou a o tatou faafeagai ma aoga. A fia maua le poto ma i'u manuia lau aoga ia toaga i le aoga ma fai au mea aoga. E iai foi taimi e tofia ai tatou e faatino ni galuega ma feau. E tatau lava tamaiti ona faatino i le mea e gata ai le mafai ma le lelei. E le faapea e uma loa le feau na faatonuina e fai ona uma ai lea, ae vaai po o a nisi mea o loo mana'omia le fia faia e fai. E lē o se mea leaga le faia o auauauna faasili mo le manuia o isi tagata.

Faapea foi Iesu, e le na o le lauga ma a'oa'o atu, ae sa faamalolo foi i tagata mama'i ma fesoasoani i e vaivai. Ae o le sili o na mea uma ina ua ofo mai lona ola e togiolaina i tatou o tagata agasala e

ala i lona maliu ma lona toetu. O le atoaga lea o lana auuaunaga na afio mai aii le lalolagi.

**Uiga o Upu:**

- i) aliitai - avea ma pule i tagata.
- ii) f.38. - o loo faatatau i le auuaunaga a Iesu lava i le oti, a manana’o Iakopo ma Ioane e oo i le mamalu e tatau ona u ii le ala lea.

**GALUEGA FAATINO:**

Saili mai upu i totonu o le Paso (Puzzle)

Upu:- auuana, saunia, atalii, Iakopo, Iesu, Ioane, ole, faalogo, mamalu, papatisoga, tauagavale, taumatau, tautua, tagata, tiga, valaau.

u	g	o	t	a	g	a	t	a	f
p	a	p	a	t	i	s	o	g	a
I	t	a	u	t	u	a	g	i	a
o	a	s	a	u	n	i	a	s	l
a	u	s	g	I	a	k	o	p	o
n	a	t	a	l	i	i	l	m	g
e	u	s	v	a	l	a	a	u	o
m	n	t	a	u	m	a	t	a	u
m	a	n	l	o	t	i	g	a	m

v	s	I	e	s	u	s	o	l	e
---	---	---	---	---	---	---	---	---	---

**PESE:** (fati:- Tuu le tautua fia matai)

1. O le ola fia sili, fia muamuā  
Le isi lea vaivaiga, faalētagata  
Na o misa ma vevesi, malepe mafutagā  
Fetalai Iesu, faailoa le ala

Tali: O se fia sili ia outou  
Fai ma a outou auauna  
Le Atalii o le tagata  
Ua foa’i lona ola  
Ina ia magalo  
Le tagata agasala

**A’OA’OGA:**

1. A fia sili ia auauna muamua.
2. O Iesu sa auauna muamua.

.....

**ASO SA:** 29 OKETOPA 2017

**MATAUPU:** UA LILIUINA LE TUPU

**SINI:** Ia malamalama le vasega e mafai e le Atua  
ona liliuina le loto o le tagata lē talitonu.

**TUSI FAITAU:** Tanielu 3: 28 – 30

**FESOASOANI MO FAIAOGA:**

O le liliuina o le loto o le tagata mai i se mea ua ola ma talitonu i ai, e lē o se mea e faigofie ona tupu. O le mataupu o lenei Aso Sa, “Ua liliuina le Tupu,” o lo o faatatau i le tupu o Nepukanesa. O Nepukanesa tamaiti, o le tupu o Papelonia. Ua ia fausia se tupua auro tele lava ona ave lea o le faatonuga i tagata uma o le malo o le taimi lava e faalogoina ai leo o mea faili eseese e pei o pu, faaili, kitara ma isi mea faaili eseese ia faapauu tagata uma, ma ifo i le tupua auro ua faatuina e le tupu. O se tagata e le faapau ma ifo i le tupua, e lafoina i totonu o le ogaumu aasa e mu ai.

O Sataraka, Mesako ma Apeteniko, o tama sa Iutā. E le’i ifo i latou i le tupua na faia e le tupu. O se mea na ita tele ai le tupu ma ia faatonuina ai ana auauna, ia fa’aaasa faafitu le ogaumu, ia saisai foi ia Sataraka, Mesako, ma Apeteniko ma lafo i totonu o le ogaumu. O le aasa tele o le ogaumu, ua fano ai ma auauna na ave i taulelea sa Iutā.

Peitai, e le’i afaina Sataraka, Mesako ma Apeteniko i aasa o le ogaumu. O se mea ofoofogia ua vaaia e le tupu ma ana tulafale, ina ua latou vaaia ua toafa tagata ua tatalaina ua feoi i totonu o le ogaumu aasa, ua lē afaina i latou. O le fa’aaliga lava lea o le mana silisili ese o le Atua, i luma o nuu ese. E le gata i lena, ae ua fa’aalia ai foi le manumalo o le Atua o Isaraelu i atua faapaupau o Papelonia ma Nepukanesa.

Ua ofo tele le tupu, ua faalatalata atu ma valaau i taulelea ia omai. Ua latou matamata i tama ma iloa ai, e leai, se mea o afaina o i latou e oo lava i o latou ofu.

Tamaiti o le taimi lava lea ma le aso foi lea na liliuina ai le loto o le tupu ma ia talitonu ai, i le silisili ese o le Atua o Mesako, Sataraka ma Apeteniko. O le liliuina o le loto tamaiti, o le lagaonaina lava lea o le salamo, auā ua inoino i le leaga o le meana ia faia. Ua ia folafola foi o se fai se upu vale i le Atua o tama ia o le a oo i ai puapuaga. Ua ia talitonu e leai se isi Atua e mafai ona lavea’iina se tagata mai i se mea faapena. Mulimuli

ane ua tofia Sataraka, Mesako ma Apeteniko e pule i itumalo o Papelonia.

Ioe, tamaiti e mafai e lou ola talitonu ma faatuatua, ona liliuina se tagata e lē talitonu i le Atua. E i ai fanau o loo ola i se olaga e faigata ona faailoa atu iai le alofa o le Atua. Ua masani lava i latou i le faatupu vevesi, lima tagovale, tetee i matua, le fiafia i le lotu ma le Aoga Aso Sa, ma nisi lava uiga le manuia ua masani ai i latou. Tamaiti, o ilatou ia e tatau ona tatou fesoasoani iai ina ia mafai ona avea ma fanau lelei. O latou amio e mafai ona avea ma ala e liliuina ai i latou. Ia tatou faia faataitaiga lelei ma amio lelei ina ia tosina ai loto ma gauai mai.

O le afio mai o Iesu ma a'oa'o mai ma faia faataitaiga lelei aemaise lava i le faaolataga na ia faia ua mafai ai ona liliuina loto o tagata agasala ma faaolaina ai.

## **GALUEGA FAATINO:**

Tali mai i fesili nei:-

1. Aisea na mafua ai ona faasala ia tama sa Iutā e toatolu?

Tali: Ona ua lē usita'i i le poloaiga ia ifo uma tagata i le tupua na faia e le tupu.

2. O ai igoa o tama sa Iutā na le ifo i le tupua?

Tali: O Apeteniko, Sataraka ma Mesako.

3. O le a le faasalaga na faia i tama sa Iutā?

Tali: Sa lafoina i totonu o le ogaumu aasa.

4. Pe sa afaina ai i latou i le afi?

Tali: E leai.

5. O le a se lagona na oo i le tupu ina ua faasaoina tama mai i le ogaumu aasa?

Tali: Sa ofo le tupu ma ua ia talitonu ai, e moni lava le Atua o Sataraka, Mesako ma Apeteniko.

**PESE:** A tumau ia Iesu

**A’OA’OGA:**

1. E liliuina e le Atua loto o tagata.
2. Aua le usita’i i mea sese
3. Tumau le faatuatua i le Atua.

.....

**MANATU TA’IALA O NOVEMA:  
TALITONU I LE ATUA SOIFUA**

O le ola talitonu o le tagata i le Atua soifua, o le faailoga o le vava lalata o le mafutaga a lea tagata ma le Atua. E ui ina le vaaia e mata, ae lē mafai lava ona faaluafesasi lona lagona, i manuia o le Atua e faasoa mai i lea aso ma lea aso. Le ala foi lea o le taunu’u manuia o folafolaga na faia e le Atua ia Aperamo, ona o lona talitonu atoatoa i le Atua.

**ASO SA: 05 NOVEMA 2017**

**MATAUPU: O LE ATUA SOIFUA E LĒ  
FAATUSAINA I SE TUPUA**



**SINI:** Ia a’oa’o tamaiti ia o latou iloa, o le Atua o lo o tatou talitonu ma tapua’i iai, o le Atua soifua e lē faatusaina i se tupua.

**TUSI FAITAU:** Galuega 17: 22 – 34 (mo le Faiaoga)  
Galuega 17: 22- 27 (mo le Vasega)

**FESOASOANI MO FAIAOGA:**

O lea ua taunu’u le malaga faamisionare a Paulo i Atenai, ma ia vaايا le matagofie i ona laufanua, i le mau faatagata e faia i auro ma ario, ma ma’a taua anagata. O nei faatagata, o faatusa o atua faapaupau o loo ifo ma tapuai i ai tagata o lea itu o le lalolagi. O Atenai i ia ona po, o le taulaga o Eleni. O se isi lea mafuaaga ua tele ai nei faatusa o atua mamate i lea taulaga, ona o le manatu i tagata e o ane mo fefaatauaiga, ma tagata e afea lea taulaga mo matamataga ma tafaoga, ina ia tosina ane i le matagofie o nei faatagata.

Na iloa ai foi e le Aposetolo se fata mo tapuaiga i le Atua leiloa, ma upu o loo tusia ai; ‘MO LE ATUA E LE ILOA.’ Le ala lea o le faailoa ai e le Aposetolo o le eseeseaga o atua o loo latou tapuai ai, ma le Atua lea o loo taua; O le Atua leiloa. Ua fai atu Paulo; ‘o le Atua lena o loo outou tapua’i iai ma le lē iloa, o le Atua e lē vaايا e mata o le tino, auā e leai sona tino mai. Ae iloa e mata faaleagaga o i latou uma ua talitonu ma faatuatua faamaoni ia te Ia. O Ia o loo ola ma gaiōi ai le tagata.’

O lo o faatusaina ai e le Aposetolo le ata lea i se tamā ma sana fanau. I le va feso’ota’i o le tamā ma lana fanau, ia tatau ona felagolagoma’i, ia feso’ota’i ma fetalia’i i ni faafitauli ma manaoga o le fanau i le tamā, poo le tamā foi i le fanau. O le ala lea ua manatu ai Paulo, ia manino itu ia e lua; auā e lēō mafai e le matagofie o nei faatagata ona faamalieina uma manaoga o le tagata ola na faia e le Atua. O le manatu la o le Aposetolo, e matua lē faatusaina lava le Atua lē iloa lea, i tupua ua fauina e nei

tagata i auro ma ario. Auā e leo mafai e nei tupua ona faamalieina uma manaoga o le tagata soifua. E lē mafai foi e nei tupu ona tali mai i se mea ua tatou manana’o ai. Peita’i, o le Atua e leo va’aia e mata o nei tagata, o loo latalata mai o Ia i le tagata i taimi uma e mana’omia ai se fesoasoani. Poo le auro, ario, ma’a anagatā sili ona matagofie i mea uma o le siosiomaga o loo ola ma nonofo ai; e silisiliese lava ma matagofie o le Atua lē iloa lea. Le Atua lē iloa lea na fa’aali mai e ala iā Iesu Keriso.

Tamaiti, o le matagofie o auro, ario ma soo se ma’a taua o le olaga lenei; o loo latou faamatalaina ai se tasi vaega o galuega a Aao agalelei o le Atua i le lalolagi; Ae lē mafai ona faatusaina i le Atua soifua, le pule aoao i mea uma o le foafoaga.

### **GALUEGA FAATINO:**

Paso: Fa’aaoga le paso o lo o i lalo, e saili mai ai upu o lo o i lalo i le faalava, faatusa’o, afa ekisi ma le agai i tua.

Atua, fanau, faalogo, fatupese, manatu, auro, ario, faamaoni, mata’u, ola, gaoioi, faapalepale, Paulo, Arepako.

A	t	u	a	n	p	s	t	v	r	u	a	n	a	f
e	r	o	u	m	a	n	a	t	u	f	g	l	m	a
i	l	f	a	a	m	a	o	n	i	o	u	f	g	a
o	i	l	p	n	p	f	e	t	a	l	a	i	o	l
u	t	s	t	a	s	s	i	o	u	f	a	u	u	o
f	o	e	i	o	e	a	r	i	o	u	m	n	f	g
g	n	i	l	p	s	o	v	l	m	e	k	s	g	o
l	u	o	u	g	l	m	n	p	u	s	t	v	l	m
m	n	t	v	h	f	e	t	a	l	a	i	g	a	n
n	a	e	i	o	u	f	t	h	k	o	u	a	r	p
f	l	m	n	p	m	a	t	a	u	f	g	o	o	s
g	f	a	a	m	a	s	i	n	o	i	n	i	i	t

l	m	f	a	a	t	u	i	n	a	a	u	o	s	a
m	n	p	f	e	a	m	a	l	n	i	o	i	m	l
o	l	u	a	P	u	p	s	t	v	h	k	r	l	o

**PESE:** O le Atua e paia

**A’OA’OGA:**

1. E le faatusalia le Atua i ni mea tatou te faia.
2. O lo o fa’aalia le silisiliese o le Atua i mea uma o lana foafoaga.

.....

**ASO SA:** 12 NOVEMA 2017.

**MATAUPU:** UA SOLOĪA E KITIONA FATA FAITAILAGA O PAALA.

**SINI:** Ia a’oa’o tamaiti ia iloa le ese’esega o le Atua ma le tupua; auā o le tupua, ua na o se mea na fau e le tagata e faatusa iai se mea ua talitonu iai; Ao le Atua o loo tatou talitonu ma tapua’i iai, o Ia lena o loo tatou maua ai pea le ola i aso uma.

**TUSI FAITAU:** Faamasino 6: 28- 32

**FESOASOANI MO FAIAOGA:**

O Kitiona o le atalii o Ioasa, o le ituaiga o Manase. O le faamasino lona lima lea o Isaraelu na tofia e le Atua e fai ma

faamasino ia Isaraelu i le 7 tausaga, ina ua matuā tigaina i faiga lē alofa a Mitiana. Fai mai ua latou pule sa’oloto i fua o le laueleele, o lafumanu ma meatotino uma a Isaraelu, ma ua tupu ai le mativa i le nuu. Ua fia aai, a ua leai se mea ua totoe ma le nuu uma

Fai mai le tala tamaiti, ua fiaa’ai le nuu, o le ala lea o le tagi atu i le Atua mo se fesoasoani. O le tali a le Atua e ala mai i lana agelu; O le soloia i lalo o fata faitaulaga, o loo osi ai taulaga ia Paala le atua o Aikupito. Ma le tupua o Asaira ia vaeluaina i lalo. E alafa’i mai la le nuu i le taeao o le aso fou, ua uma ona faatinoina e Kitiona le finagalo o le Atua. Ua ia faia foi le taulaga i le Atua, i povi e lua na ia ave. O se itu na fia faao’o ai e tagata le oti ia Kitiona, lea na o ane ai ia Ioasa e tataua ona faao’o le oti i lona atalii. Peita’i, fai mai le tali a Ioasa; ‘O outou na, tou te finafinau ea mo Paala? Tou te fia lavea’iina o ia? O le na te finau ma ia, ia oti lava ia i le taeao nei, afai o se atua ia, ina faia e ia lava lana finauga, aua ua soloia e se tasi lona fata faitaulaga’

E atagia i le tali a Ioasa le tulaga o le Atua soifua o Isaraelu ma atua o nuu ese. Aua o le isi lea vaaiga pe’a tau Isaraelu ma ona fili, e lē gata ina tau e saili poo ai e malosi, ao le fa’aalia foi lea o le Atua malosi o itu taua e lua. Lea ua fa’aalia le eseese o atua mamate ma le Atua soifua, i le faata’ape’apeina o o latou tino, auā e leai se ola o i ai. Ao le Atua soifua o Isaraelu, lea o loo ola ai tatou e faavavau, pe a tatou talitonu ma faatuatua faamaoni ia te Ia.

### Uiga o Upu:

- i) Paala - atua tamaloa o Aikupito sa ifo i ai nuu ese na ifo foi i ai Isaraelu.
- ii) tupua tagata. - o faatausa o tagata po se manu e faia e le
- iii) Asaira - o le atua tama’ita’i o Saitonu
- iv) Ioasa - o le tamā o Kitiona

**GALUEGA FAATINO:** Galuega Faamatala

Ia tusi upu o loo i lalo i ni pepa malō. Tofu le pepa ma lona upu. Faafaō uma pepa, ona tofi lea o ni tamaiti se to'aono e piki le pepa a le tamaititi ua filifili i ai ma fa'aali i le vasega. Ia ta'u le upu; ona faamatala lea i le vasega le uiga o lana upu.

- O Paala-
- O le tupua
- O Asaira-
- O Ioasa-
- O Kitiona-
- O le Atua-

**PESE:** God not dead, He's alive

**A'OA'OGA:**

1. Aua le fefe i tupua.
2. Aua le pala'ai e finau mo le Atua.

**ASO SA:** .....  
**19 NOVEMA 2017**

**MATAUPU:** **UA PEPELO ANANIA MA SAFAIRA I LE ATUA'**

**SINI**                   Ia a'oa'o tamaiti ina ia iloa o le pepelo, o le tulafono lea e iva. E lē tatau ona solia e se tasi; auā o le agasala lea i luma o le Atua.

**TUSI FAITAU:**Galuega 5: 1- 11

**FESOASOANI MO FAIAOGA:**

O le pepelo tamaiti, o se amioga le lelei lea pe a fua i tulafono a le Alii na tuuina ia Mose, e lima taitaina ai le nuu o Isaraelu. O lona uiga, a pepelo le tagata, ua solia e lea tagata le tulafono. E mafai foi ona faapea, ua lē usitai le tagata i le Atua. Ao le a la se tau i o le tagata le usita'i?

Fai mai le tala tamaiti; o le ulugalii o Anania ma Safaira, ua faatau atu lefanua. O le manatu, e maua ai se tupe e foa'i atu mo le lotu. Peitai, ua le tausi i lea ofo sa fai. Ua uma ona faatau le fanua, ua maua mai le tupe o le tau o le fanua. Ua nana se isi vaega, a ua ave sina vaega i le au Aposetolo e pule mo le lotu. Na ta'u atu e Peteru ia Anania lana ofo na fai i le Atua, ao lea ua pepelo; Ona avea lea ma ala na to ai lana manava ma oti ai. Na o ane taulelea ma afifi ma ave ua tanu.

Fai mai tamaiti ua mavae itula e tolu talu ona tupu o lea mea, ona ulufale ane lea o Safaira le ava a Anania. Ua ta'u atu foi e Peteru le la ofo sa fai mo le lotu, ao le tali lava e tasi e pei ona tali ai Anania. Ua faailoa atu lo la pepelo i le Agaga o le Alii, ona oti ai foi lea o Ia. Ona o ane foi lea o taulelea, ua ave foi o ia ma tanu i tafatafa o lona alii.

O le iuga lea o le tagata pepelo i le Atua; O le oti faafuasei i se taimi e lei mafaufauina.. Auā e le'i manatu lenei ulugalii, o se taimi faatopetope lea o i laua. Peita'i, e lē faailogaina ni o tatou taimi, ao le mea ua mautinoa, o le tau i o le lē usita'i i le Atua; o le oti i se auala e le'i mafaufauina.

Tamaiti 'aua nei avea le suafa o le Atua ma ala tatou te lalafi ai i tua. O le mea ua uma ona ofoina mo le Atua, ia faia ma le faamaoni. E lē o le fa'aaoga o le suafa o le Atua e saili ai so tatou manuia. Ao le finagalo o le Atua mo e o fia maua se fesoasoani. E le tuulafoa'iina i tatou e le Atua i ona manuia faasoa mai; peafai tatou te foa'i ma le loto malie, ave ma le fiafia, ona faamanuia mai lea o le Atua; Ae lē o le avea oi tatou faapei o Anania ma lona toalua. E i ai nisi o tatou e aumai e matua sene e lafo i le aoga ma le lotu, ae o mai nanā e faatau ai le saimini. Pe lafo foi se

vaega ae tuu se isi vaega. Manatua tamaiti, e leai se mea e lilo i le silafaga paia a le Atua.

E lei pelogia le lalolagi i le ofo a Iesu na Afio mai ai i le lalolagi. O lona soifua ina ia faaolaina ai le lalolagi agasala; lea lava na taunu'u i le satauro, ma faaolaina ai le lalolagi uma.

### **Uiga o Upu ma Fuaitau:**

- i) faanana - nana, teu lilo
- ii) mana - ma ia, ave ma ia
- iii) 'ua to lana manava' - ua poloka faafuase'i le manava, ua lē toe manava

### **GALUEGA FAATINO: Taliga Fesili.**

Tali i le 'Sa'o', po o le 'Sese'.

- i) O Anania, o lana ava o Safaira.

Tali: Sa'o

- ii) O Peteru o le so'o o Iesu.

Tali: Sa'o

- iii) O le tau atoa o le fanua na ave uma ma le lotu.

Tali: Sese

- iv) O le pepelo ua faia e Anania, o le tofotofo lava lea i le Atua.

Tali: Sa'o

### **PESE: Suliveta Kurene**

Taua mai i le Tusi Sa, Safaira ma Anania  
Ofo atu o la fanua mo le Atua,  
O le a la o ma faatau, Ae aumai uma lona tau,  
Leai se mea e pule ai, Ae aumai uma ma tu'u atu,  
I le lima o le faifeau.

Tali: Ua tele tupe ha ha, Taulia le fanua  
Tonu iō la manatu, Sili ona vaelua  
E leo iloa mai e se tasi, Ae galo ai le maasiasi  
Silasila mai fofoga o le Tama oi le lagi  
La la la la la la la la He he he he  
Ua sau nei le tiapolo, Ma faasese o laua loto  
Talofa e na o le toilalo popo.

#### **A'OA'OGA:**

1. Aua tatou te pepelo i le Atua.
2. Ia faamaoni iā tatou ta'utinoga e faia i le Atua.

**ASO SA: 26 NOVEMA 2017**

**MATAUPU: UA VAVAO E IESU LE MATAGI**

**SINI:** Ia a'oa'o tamaiti ina ia iloa ona tumau i le  
ola faatuatua i le Alii, i taimi uma o le  
olaga. Ia tutusa taimi lelei ma taimi faigata,  
auā e leai se mea e faigata ia te Ia.

**TUSI FAITAU:** Mareko 4: 35- 41

**FESOASOANI MO FAIAOGA:**



O le a foi le faatuatua tamaiti? Ioe, o le talitonu i mea e lē va'aia. O lona uiga, o le faatuatua; O le faamoemoe ma talitonu i le Alii e lē va'aia e o tatou mata; Ae lagonaina e le loto ma iloa i manuia o loo tatou maua i aso uma. Aemaise ai o lana tausiga ma lana puipuiga malu i lo tatou ola i aso uma.

O le tala a Mareko sa tatou faitau ai. O loo manino lelei, na ō Iesu ma ona so'o i le vaa. O loo vaai ma auai faatasi ma le alii, ae lē talitonu ō latou loto e mafai e Iesu ona taofi i le matagi ma faamalū le sou o le sami. Ua na ona ta'u o so'o, ae lē iloa ma talitonu ia Iesu, o le pule o le natura o le foafoaga.

Fai mai ua latou tu'ua le motu o tagata, ae agai atu i le tasi itu o le motu i lea lava afiafi. Fai mai tamaiti, o si vaa itiiti na malaga ai Iesu ma ona so'o. Ua amata le faigamalaga, ae alu ane Iesu ua tofa i le aluga i le taumuli o le vaa. O lona uiga tamaiti; e lei faatagā moe Iesu, na moe mo'i lava Iesu faapei ona tatou momoe i le po. Ua to mai le afa ma ua fafati mai peau o le sami ma ua tumu ai le vaa.

Ua fefefe le au so'o, ona o latou fafagu lea o Iesu. Fai mai latou o Iesu o le a'oa'o; “..... ua e lē manatu mai ea ia te i matou a fano?” Na lilo i le au so'o, o le a usita'i le afā, ma le sami i se fetalaiga a le Alii. Na ona tula'i atu lava o Iesu ma fetalai atu, ona mate ai lea o le matagi, ma ua malū foi le sami.

Na liliu ane Iesu ma fai atu i ona so'o; “Se a le mea tou fefefe ai faapea? Se a le mea tou te lē faatuatua mai ai?” O ni fesili o loo faamalosi'au atu ai Iesu i ona so'o, ina ia mausalī lo latou ola faatuatua ma talitonu faamaoni ia te Ia, i taimi uma o le olaga. E lē na'o taimi lelei ma filemu o le olaga; a ia faapena foi taimi o puapuaga ma faigata. Ia to'a pea le tai ma pipi'i pea i le Alii, e maua ai lo tatou filemu e faavavau.

## **Uiga o Upu:**

- i) vaa iti - e leo se vaa tele.

- ii) peau - galu o le sami.
- iii) taumuli - pito i tua i totonu o le vaa.
- iv) fano - galo atu, mou atu, oti.

**GALUEGA FAATINO:**

Faatinoga: Tofi ni tamaiti latou te faatinoina le tala sa faamatalaina.

O le isi vaega o le vasega, o loo latou faitauina mai le tala mai le Tusi Paia, ao faatinoina.

**PESE:** A iai Iesu i lou vaa, ou te ata i le afā.

**A’OA’OGA:**

1. E leai se mea faigata i le Alii pea tumau le ola faatuatua iā te Ia.
2. E pule le Atua i le matagi ma le sami.

.....

**MANATU TAIALA O TESEMA: O LE ALII O LE  
FAAOLATAGA**

O le masina leni e iloa ai le Kerisimasi. Le aso e faamanatuina ai le fanau mai o le Alii o Iesu, le Mesia sa valoia e perofeta i le Feagaiga Tuai. E ui lava e lē o le Mesia lea sa manana’o i ai Iutaia e tusa ma faamaumauga a le Tusi Paia, ao le fa’aalia o le finagalo o le Atua mo le lalolagi atoa. O le Mesia e Afio mai e faaola le lalolagi uma i lona filemu. E lē o maseiga ma taua e pei

ona manana’o iai Iutaia; ao le faaolaina o agaga o tagata uma i lona filemu.

**ASO SA: 3 TESEMA 2017**

**MATAUPU: O LE TAMA UA FANAU MAI**

**SINI:** Ia a’oa’o tamaiti ia iloa o le tama ua fanau mai, o le Mesia sa valoia i le Feagaiga Tuai. O le pepe o le Kerisimasi. O le faaolataga o le lalolagi uma.

**TUSI FAITAU:** Isaia 9: 6 – 7

**FESOASOANI MO FAIAOGA:**

Tamaiti, o le tama lea e fai mai ai le mataupu, o loo faatatau i le tatou uo o Iesu. O loo valoia e le perofeta o Isaia le fanau mai o le tama lea. O le tama o loo sau e momoli mai se feau taua mo le lalolagi uma.

Ia manatua tamaiti, o lena vaitau i le sailiga o le pule ma le malosi o malo tetele o le lalolagi. E mana’omia ai ni ta’ita’i totoia mo le faatinoina o taua. O le manatu la lea sa iā Iutaia, o le a fanau mai le tama lea e manumalo ai Isaraelu i isi malo tetele o le lalolagi.

Peita’i, e lē o le uiga lea o le manatu o le perofeta. E le o se tama faapena o loo manatu iai Isaia. Fai mai o le atalii e i lona ua le malō. O le malō tamaiti, o loo faatatau i le lalolagi. Ae manatua foi o le ua e amo ai avega mamafa. O lona uiga la, e tauave e Iesu avega mamafa; poo agasala uma a le lalolagi. E igoa o ia o le Silisiliese. O lona uiga, e tulagaese lea tupu i tupu uma o le lalolagi. O le Faipule. O le Atua malosi. E lē o le malosi i taua, a o le malosi na te mafaia ai ona tauave tiga ma faigata o le lalolagi. O le Tamā o le faavavau. O le Atalii o le Filemu. O lona

uiga tamaiti. O le tama lea, e sau e aumai le filemu i le lalolagi uma. O le fuaiupu e fitu, fai mai e leai se mea e gata mai ai ona telē o lona malo, ma le filemu o lona malo i le nofoalii o Tavita ma lona malō. O lona uiga, o le filemu mo le lalolagi atoa. E leo fevesiaiga ma taua, ao le fealofani ia maua e tagata uma o le lalolagi. O le a fai o Ia ma faipule o le lalolagi uma. O lona uiga, e pule a'oa'o i le lalolagi, e le toe mana'omia ai ni ta'ita'i; auā ua ia te Ia le malosi uma lava na te tauave ai faigata oi le lalolagi. Fai mai tamaiti, o le a faamausaliina lea malo i le faamasinoga ma le amiotonu. O i latou uma lava e te'ena lea malō, o le a faamasinoina i latou uma. Ao i latou e talia lea malō, o le a avea i latou ma fanau a le Atua i le faavavau. O le uiga lea o le fanau mai o le tama. E fanau mai ma le amiotonu mo tagata uma e talia le malō e faavavau o le Atua i le lalolagi.

### **Uiga o Upu::**

- i) valoia - o le vaai aga'i i le lumana'i
- ii) perofeta - o tagata latou te iloa mea o le a tutupu i le lumana'i

### **GALUEGA FAATINO: Taliga Fesili**

1. O ai e faatatau i ai le tama lea ua fanau mai?

Tali: O Iesu Keriso.

2. E igoa o ia o ai?

Tali: O le Silisiliese / Atua malosi / Faipule

3. O le a le fe'au lea e sau Iesu e momoli mai i le lalolagi?

Tali: O le filemu.

4. O le a le manatu o Iutaia i le tama o le a fanau mai?

Tali: O le tama e ti'eti'e mai le solofanua ma lana pelu ma le ta'o.

**PESE:** Pese Kerisimasi. Pese 347 E le aso fiafia

**A’OA’OGA:**

1. O le fanau mai o le tama, o le oo mai lava lea o le malō o le Atua i le lalolagi.
2. Ua Afio mai o Ia ma le filemu i le lalolagi uma.

.....

**ASO SA:** 10 TESEMA 2017

**MATAUPU:** UA FETAIA’I KAPERIELU MA LE TAUPOU O MARIA

**SINI:** Ia a’oa’o tamaiti ia iloa, o le feiloaiga a Kaperielu ma Maria, o le momoli maiga o le finagalo o le Atua ia Maria, e ala mai iā te ia le fanau mai o lona Alo o Iesu.

**TUSI FAITAU:** Luka 1: 26- 33

**FESOASOANI MO FAIAOGA**

O Kaperielu, o le agelu a le Atua na auina ane e faailoa le Talalelei ia Maria le toalua o Iosefa, o le tinā ia o Iesu. Fai mai o le ono o masina o le ma’itaga o Elisapeta le to’alua o Sakaria; na toe alu ane ai Kaperielu e ta’u ane le finagalo o le Atua ia Maria. O Nasareta, o se aai o Kalilaia. O inā sa nofo ai Maria. Fai mai o le taupou o le aiga o Tavita; ao le’i nonofo o ia ma Iosefa. Na

ulufale ane le agelu ma fai atu; “Si ou alofa ia te oe, le ua alofaina, ua ia te oe le Alii.” Na avea upu ia a Kaperielu, ma ala na fefe ai Maria ma taumanatunatu ai, pe se a le uiga o le alofaaga.

Peita’i, na ta’u atu e le agelu ia Maria le feau, o le finagalo o le Atua mo le lalolagi, e ala mai ia te oe Maria. O le a e tauaveina se pepe i lou manava. O se tama tane, ma e faaigoa o ia iā Iesu. O Iesu la lea tamaiti o loo fai ma ā tatou uo. O Ia lea e ese le alofa iai tatou, ma tamaiti uma o le lalolagi, aemaise lava i tamaiti puapuagatia.

Iesu lea fai mai e sili o Ia, e ta’ua o le Alo o le Silisiliese. E foa’i atu e le Alii le Atua ia te ia le nofoaiga a Tavita lona tamā. Aua a tala le gafa o Iosefa tamaiti; e tau ia Tavita le tupu sa filemu ai Isaraelu uma. E fai foi o Ia ma tupu i le aiga o Iakopo e faavavau. Manatua foi, o le fanau e to’asefulu ma le to’alua a Iakopo, o le tupuaga lea o Isaraelu, lea ua fai ma nuu filifilia o le Atua.

O le ala lea o le tuuina o le pule ia Iesu, ina ia faailoa ia Isaraelu le finagalo o le Atua. Ona avea lea o i latou ma ave fea’u i le lalolagi uma; Aua fai mai le faaiuga o le mataupu sa faitauina; ‘...o lona malō foi e leai sona gataaga.’ O lona uiga, e amatamea Isaraelu, ona faasalalau ai lea i so’o se tafa o le lalolagi. O atunuu ma malō uma e talia o Ia ma lana faaolataga, o lona lea malō e faavavau.

O le uiga lea o le feiloaiga a Kaperielu ma Maria. O se feiloaiga filemu, e lē lagona se leo; Ae ua lagona uma e le lalolagi lona fanau mai, i le Aso 25 o Tesema. Lea o loo faamanatuina i tausaga taitasi.

### **GALUEGA FAATINO:**

Fa’aaoga le paso lea e saili mai ai upu o loo i lalo:-

**Iesu, Maria, gataaga, atuatuvaale, manatunatu, taupou, agelu.**

a	e	i	e	n	a	t	u	a	f	u	a	f
e	i	o	u	i	g	m	n	p	s	t	v	h
i	l	g	r	u	o	I	e	s	u	v	i	k
o	k	a	p	e	r	i	e	l	u	g	o	r
u	M	g	l	m	n	p	s	t	v	a	u	s
o	u	f	g	l	m	n	p	s	o	t	f	t
p	s	t	a	t	u	a	t	u	v	a	l	e
u	r	k	h	v	t	s	p	n	u	a	m	v
a	e	i	o	u	f	g	l	m	f	g	n	e
t	a	u	m	a	n	a	t	u	n	a	t	u

### Uiga o Upu:

- i) Kaperielu - o le agelu a le Atua.
- ii) taupou: - o le afafine o se alii o se nuu, e lei faia sona to'alua.
- iii) faufautane - ua tasi le mafaufau i le tama o le a avea ma ana tane/ teine muli e lei faia sona to'alua
- iv) atuatuvaile - fefe, mata'u, popole vale.
- v) taumanatunatu - toe foi i tua le mafaufau, tau mafaufau i mea na tutupu i aso ua te'a.
- vi) gataaga - o le aso mulimuli o le lalolagi.

**PESE:** Pese Kerisimasi. (Na fanau mai o Iesu, i Peteleema)

### A'OA'OGA

1. Ua talia e Maria le finagalo o le Atua..
2. Ia fai i tatou ma ave fe'au o le Talalelei.

.....

**ASO SA:** 17 TESEMA 2017

**MATAUPU:** O MEAALOFA MO LE PEPE

**SINI:** Ia a'oa'o tamaiti ia iloa o meaalofa na o ma makoi, na iloa ai o Iesu lava o le tupu o tupu, e lē faatusaina i se tupu o le lalolagi.

**TUSI FAITAU:** Mataio 2: 7- 12.

**FESOASOANI MO FAIAOGA:**

O se isi lea vaaiga o loo maitauina i o tatou foi taimi. A valaaulia tatou i se aso fanau, faaipoipoga poo nisi aso faapitoa. O le mea lava ua mautinoa e tatau ona ave, o se meaalofa talafeagai mo lea valaaulia. A leo lena foi, o se tupe e faateutusi.

Ao le vaaiga foi lea na iloa i le malaga a makoi na o e sue le nofoaga na fanau ai le pepe. Peita'i, e lē ose valaaulia, ao le fa'aaliga na iloa i le fetu mai Sasa'e. Fai mai na iloa e Herota le tupu o Aikupito ma Iutaia inā ona po, ma ia aami lēmu ai i le au Makoi, ina ia o latou ta'u ane iā te ia le mea o loo fanau ai le pepe, e fia alu atu foi ma ifo ia te Ia.

E ese le manaia o le manao o Herota a tamaiti. Ae tou te iloa la, o le togafiti a Herota na fai e fasiotia ai le pepe lea; Aua o le manatu o Herota i lena vaitau, e leai se isi tupu e sili ia te ia. Peita'i, ua le taunu'u lea manaoga; aua fai mai ina ua taunuu makoi, ma ulufale i le fale o loo fanau ai le pepe, ma latou va'aia ai le tamaitiiti ma Maria lona tinā. Ona faapa'u'u ai lea o i latou ma ifo atu ia te Ia. Ua avatu foi e i latou o le auro, o le pulu muro ma le pupu lipano. O nei meaalofa ua ave ma le pepe, o se ma'a taua taugata, ma ni mea manogi e pito sili ona taugatā. Ua na o tupu ma aiga tau tupu e ave iai nei meaalofa taua ma le anagata.

O nei meaalofa, faatasi ai ma le ifo toele a makoi tamaiti, na iloa ai o le tama ua fanau mai; o le Tupu o Tupu, o le Alii o Alii. Fai



mai na manatua e makoi le tama na valoia e perofeta. O le ala lea o le o mai mautinoa o nei tagata, ma lo latou talitonuga, o le pepe lea sa valoia; lea ua ta'ita'ina mai ai i latou e le fetu.

Peita'i tamaiti pe a va'ava'ai lelei lava iai; o le meaalofa sili lava a makoi mo le pepe, o le alofa. Aua ana lē alolofa i latou nei i le pepe, ae foi atu e tusa ma le finagalo o Herota le tupu, o lona uiga e lē taunuu uma valoaga a perofeta ia Iesu ma lana faaolataga. Na faailoa i Makoi e ala i le miti, aua nei foi atu ia Herota. Ona latou o ai lea i lo latou nu'u i le tasi ala.

### **GALUEGA FAATINO:** (Faatinoga o le Tala)

E manaia foi ae faatino e tamaiti le tala e pei ona faamatalaina, ina ia malamalama atili, ma maua ai le agaga o le Kerisimasi e tamaiti.

Tofi ni tamaiti se toatolu e fai ma makoi. Se tamaititi e agava'a e fai ma Tupu (Herota), ma se fale manu o loo iai manu ae o loo taoto ai le tamaititi ma Maria lona tinā. O le isi vaega o tamaiti o loo totoe, latou te faitau le tala mai le Tusi Paia, ao faatinoina e i latou ua tofia e faatino le tala.

### **Uiga o Upu:**

- i) Auro - o le maa taua anagatā
- ii) pulu muro - o le la'au manogi, e fai ai mea manogi mo alii sili poo tupu.
- iii) pulu lipano - o le la'au manogi e faatauina mai e Iutaia mai isi atunuu e fai ai suauu manogi.

**PESE:** Pese Kerisimasi. (E to'atolu tupu na ō)

## **A'OA'OGA**

1. Ia fai ō tatou ola ma meaalofo i le pepe o le Kerisimasi.
2. Ia tapena ō tatou loto mo le fanau mai o le pepe fou.

.....